

13684 27
867

國
藏
正
庫

自徐年端
張鳳舞先生

宣統元年夏六月

張鳳舞先生同叙年譜

函 2 册 卷号 4 12


張鳳舞先生同叙年譜

張鹿樵先生
自叙年誼

道光戊戌夏六月

廬江姻妣章燁敬署

先中憲公像



男元禧敬摹
元齡

鹿樵先生像贊

進司喉舌出倚股肱敷歷中外如水心澄春暉眷戀歸侍寢興
養堂既徹道山乃登憶昔粲花妙論傾倒賓朋噫嘻何象形之
惟肖竟叩以大小而不應

謹按 先生姓張氏諱大鏞字聲之號鹿樵江蘇昭文縣
人爲宋儒南軒先生二十四世孫 先生 曾祖父諱朝

綱太學生

誥贈朝議大夫山西道監察御史 曾祖母氏謝

恩旌節孝

誥贈太恭人 祖父諱仁美歲貢生

誥贈朝議大夫山西道監察御史 祖母氏王

誥封太恭人 父諱敦培乾隆乙未科進士歷官山西道監察

御史轉掌福建道監察御史署吏科給事中乾隆癸卯科

湖北主考官丁未庚戌兩科會試同考官

誥授朝議大夫 晉封中憲大夫山西河東兵備道奉

旨入祀鄉賢祠 母氏席

誥封恭人 晉封太恭人 侍御公生三子長大鑑廩貢生候

選縣丞三大銓太學生山西中場鹽大使 先生其次子

也嘉慶戊寅余與 先生同官京師令子元禧元齡皆請

業於余故余知 先生家世最詳而並爲奠繫如左

同里龐大奎拜題

鹿樵自敘年譜稿卷上



乾隆三十五年庚寅八月二十六日子時生於昭文縣城東榆樹頭之三省堂卽步道巷詩禮堂老宅之後街也

三十六年辛卯二歲是年秋 先公舉於鄉

三十七年壬辰三歲

三十八年癸巳四歲

三十九年甲午五歲

四十年乙未六歲是年 先公成進士

四十一年丙申七歲始入塾從黃先生諱兆蟾讀大學吾家

子弟類皆六歲就傅惟余以體弱獨遲一年同塾數人皆幼穉記得甫讀至康誥曰克明德章先生適外出眾皆嬉戲余從架上拾得紅柬一喜而袖之偶如廁誤墮溷中力

弱不能取又不敢聲張先生歸而見之命館童撈起究知
係余所墮傳聞於先公之前先公怒其污棄字
紙也立刻到書房中對先生將余重責二十板以示警戒
如先公之教子弟洵可法矣

四十二年丁酉八歲是年從汪思泉先生諱武贈學先生人

極醇厚書法工雅老於游幕先公自家延至京師一

路在舟中課余兄弟讀書循循善誘愛余尤真篤自內外

上下無不敬之重之抵京後連課兩年每竊聽其在

先公前譽余之心地慈慈迨後余十歲時先生以繕寫四

庫書忙先公另延崇明徐雪嶼先生課余兄弟而先

生則賓主歡洽仍住余家一年有餘庚子年春間先生起

身歸里余兄弟皆痛哭不忍捨又閱數載先公將先

生札薦於浙江富陽縣先叔祖諱福敏署中自是又轉應

揚州馬太守之聘甲寅年十月余倖列賢書赴金陵覆試

馬太守奉調閱卷先生同至金陵蒙其枉顧寓所接見之

下精神猶昔自後遂不得再晤矣馬太守後擢至河南巡

撫先生隨至中州其弟諱景焯由是得官現官睢州牧余

任河東道時先生之令嗣某以佐貳分發河南曾一通音

問今未知已補缺否追維舊德耿耿予懷先生凡所館之

地主賓投分動輒數十年其人品學問概可想見矣先生

係錢塘籍聞係吾邑善書家黃名步昌之婿

四十三年戊戌九歲

四十四年己亥十歲是年從徐雪嶼先生諱興文學先生即

先公之受業弟子也詩學最深梓有專集其他星相

皆精究微奧百不爽一 先公嘗薦往湖北學使吳白
華先生處閱卷有商以私者正色峻拒學使亦倍加敬禮
焉

四十五年庚子十一歲是年從同鄉沈葵岡先生

諱旭學先

生居心正直然諾不苟課徒嚴而能慈凡學徒飲食寒煖
無不關照周至亦極愛余每於稠人中誇獎過情惟性太
峭潔動與世迕

四十六年辛丑十二歲

四十七年壬寅十三歲

四十八年癸卯十四歲

四十九年甲辰十五歲是年四月從表兄翁紫書先生學先
生於癸卯舉於鄉 先公聞而喜曰吾明年得名師矣

蓋謂先生將應禮部試赴京也及是邀至塾中朝夕講授
余資性甚鈍作文艱有進境賴先生耳提面命曠若發矇
至今得以稍知理法又師弟情洽每於課餘談論情事上
下千年縱橫萬里動輒心心相印蒙先生期許甚大因而
循隨俗未有建樹負媿實多

五十年乙巳十六歲是年冬十一月考三通館膳錄係

欽派大臣在貢院考試有御史點名余偕席竹洲母舅等先期
在貢院附近賃小寓下榻至期五鼓起來食飯攜帶考籃
進磚門聽點詎意各御史辦理不善未將名牌宣示以致
先後不分數千人同時聽點擁擠不成事體自寅至酉竟
未點名亦無從再點到上燈時只得聽諸人一擁而入分
領試卷安排歸號已更餘矣題紙隨下係主善為師論磨

墨揮毫四鼓交卷而出飢寒辛苦有不忍言者幸年幼尙能忍耐次日發榜倖取復進聚奎堂覆試僅默寫論數行對筆跡而已席竹洲母舅亦同時錄取後以舉班議敘知縣分發山東補陽信縣竟因此獲罪發遣破其家功名之得豈盡可喜哉 向來考各館膳錄及考職俱臨時奏請特派大臣命題閱卷分別去取其中請托公行情弊百出近三十年來改定於鄉試未經中式之薦卷內挑取藉廣士子登進之途殊良法也余幼時隨任京邸北地嚴寒 先公每於冬月給羊裘一領是年因出門應試特將 先公舊羔皮褂穿用試畢歸家仍卽繳還不料凜烈難忍不得已稟明復取服之余之服重裘自此始因而知人生耐寒與畏寒非有異骨祇由習慣耳

五十一年丙午十七歲秋間初應京兆試題係子貢曰夫子之文章一節而道自道也一句季孫曰異哉子叔疑一句詩題蓬瀛不可望時余文章淺近 先公本不令應試因業師翁紫書先生力勸允許觀場

五十二年丁未十八歲四月紫書先生春闈報罷回里薦其同年太倉顧容堂先生自代於五月中開館容堂先生天資超邁詩文書畫俱負盛名於事無所畏難讀書每多創解其課徒也善取捷徑每一次會墨出畧覽數過曰得之矣旋於庚戌科成進士入翰林嘗謂余曰時文係取科名之具無事過高子之文已足取科名當更勉力汲古作一通儒每課餘相與考訂金石文字精研說文篆籀之學蓋以讀書必先識字也師弟相契之厚不異於紫書先生已

酉冬杪解館時贈余七律四章有清齋鎮日校讐書漢碣
秦碑辨魯魚此事本堪驚俗學何年重約結精廬休誇諷
過五千字更望名傳第七車等句甲寅歲余僥倖一第又
蒙寄詩四章惓惓之意孚於性命嗟乎以先生之豪邁謂
當曳履雲霄乃僅以郎官終且年未五十尤可怪也其五
是堂詩集余雖序而梓之然未竟之緒仍切望於後嗣世
兄云

五十三年戊申十九歲八月應試首題子曰不曰如之何一
節次題小德川流二句三題堯舜之知而不徧物一句詩
題六藝道德本薦而未中房師係直隸內翰張嘯巖先生
諱虎拜後曾任學院九月奉先公命回里完姻

五十四年己酉二十歲正月薛恭人來歸遂挈眷進京是年

會試題點爾何如至異乎三子者之撰容堂師以病未進
場紫書師卷房師力薦大學士韓城王偉人先生以其所
薦之房官平昔聲名不好疑而斥之洵屬命也余因
先公擢御史是秋始考官卷各官卷另編一號在至公堂
前左首貴介子弟熟識人多往往送號板送茶湯熱鬧異
常先公恪守禮法不肯向外簾官囑託而余平時足
不出戶外場官亦不知余爲何人之子獨行踽踽舉目無
親及尋至本號則早爲他人佔坐其旁空號又無號板蓋
盡爲公子輩取去作墊地支牀之用也向人致問始知考
官卷者可以不坐本號約友招朋比連任擇大約先下手
爲強余不得已站立號口竟日候監臨官過稟告情由承
其另送號板兩塊方能歸號安頓考具是人家俱得考官

卷之樂而余則深受考官卷之苦也首題回也聞一以知
十二句次題行而民莫不說一句三題不得已而之景丑
氏宿焉至人之大倫也詩題四時代謝揭曉後領歸落卷
首篇大主考墨筆連圈十餘行房考則藍筆批云理明詞
暢氣足神完詩知出處亦復穩稱係工部主事後陞觀察
樊先生諱士鑑所薦余執贄謁見先生執場中底簿
示余云吾房中分得官卷五本薦者三本然其二本吾皆
祇四字批語惟子卷最佳故加批八字不料官卷定額只
中二名因此見遺并云見遺時吾尙上堂力請既不中正
榜盍請中副榜大主考曰官卷不准中副榜老先生豈竟
不曉耶吾蓋實不知向例如此也其憐才之意深足銘感
惜余隨先公南歸後遂音問隔絕

五十五年庚戌二十一歲是年

先公分校禮闈得士如

辛筠谷少宰等皆篤行君子少宰時年三十二歲

廷試前執所書策樣請

先公訓示

先公取以示

鏞曰此子可得鼎甲也後果以第三名進呈

上將擬列第四之石韞玉拔置第一辛遂為傳臚

五十六年辛亥二十二歲是年八月隨

先公自京起身

回家辛筠谷少宰時官庶常贈余詩云鸕雛戲丹林五色
紛羽葆晨鳧傍林飛相知苦不早與君契天懷豈繫緣世
好昔者奉清塵一見開素抱平生不妄諛得子獨傾倒君
子自溫如玉山暎清皎從容涉其瀾所得廼不少貽我永
雪文朗朗滌煩燥百家與六藝伏念謀監腦旁羅科斗書
篆籀分黑阜小學世所尙頗不費搜討巾箱手隨錄部若

晉軍堡水斯走神腕皇頡相傳藁時時小乘禪別筆生花
藻爲我染水梅傳觀驚長老團扇出銀鈎新月烟雲掃汪
汪黃波澄乃復美要渺揮塵妙君房超然破煩惱我來曲
室譚竟日忘寒煥流觀山海圖棲心息蓬島世味漠無營
焉知蠶與蓼君言人世機剛折直易標一語勸迂辛佩若
琚與璆顧維兼倚玉孔庭媿深造每懷詩禮聞方歌洞酌
潦如何兄弟歡別我千里道燕山望吳雲頃刻驂騑杳琨
岡老鳴鳳將雛食瑤草君爲池上毛我疑科上稿別食會
何時佳期稷浮棗清時慶冠彈

天子方壽考翹瞻癸春雲羽儀向晴昊龍劍夜冲霄玉虹朝騰
寶神物豈終闕懷哉慎自保何用叙心曲秋風漸絳編
五十七年壬子二十三歲秋赴金陵應試首題舜有臣五人

而天下治兩節次題子曰父母其順矣乎三題無曲防三
句詩題天影落江虛薦而未中場前同鄉許韻史諱金照
至館中其翁紫書先生閑談曰耳食之輩動謂官卷易中
實則額少而佳卷多最難入選從前蘇州潘氏官卷稱勁
敵今其昆季名世榮世恩者在紫陽書院每考不出前數
名幸而非官卷矣余始耳其名是秋芝軒先生世恩掇高
第聯捷春官大魁天下見許君之言不謬

五十八年癸丑二十四歲
五十九年甲寅二十五歲秋應金陵試首題公西華曰五句
次題執其兩端二句三題如七十子之服孔子也詩題披
榛采蘭以官卷中式第三十名舉人是科江南官卷二名
其一卽潘世榮以令弟芝軒先生授職修撰亦由官卷取

中同鄉中解元陸仁虎及嚴本中皆與先公同歲生嚴則齒更長於先公科名遲早之不可強如此後陸嚴俱大挑二等陸尙莅學博之任嚴竟甫選卽逝座師閣學瑚和菴先生後官尙書編修顧筠巖先生後擢總憲現以少空告病在籍房師宓菊溪先生諱貴後官無爲州牧本科新定覆試之例聞報後重赴金陵在制軍署齊集全榜舉人糊名覆校因卽在金陵大會同年并謁見房師宓菊溪先生實歷科未有之事時督學使者胡希呂先生待士嚴而有恩向來中式新生到江陰署中填寫親供所領旗扁銀兩大半爲學書等侵扣希呂先生因覆試多士雲集卽移文藩司將旗扁銀就近提至金陵試院按名當堂給領各印封完好無損旣免諸人再

赴澄江之勞又杜書吏剋扣私索之弊并傳諭填親供者每十人進見一次先生向余等言曰子知陸某所以中解元之故乎前日有一門生送闈卷來看其詩獨清切有味因述在號舍中遇一人向其請問詩題出處荅以出在晉書并爲講明題意其人姓陸名仁虎常熟人却素不相識也夫以風檐寸晷在常情方忌人之知利人之不知而乃於曾未謀面臨陣相爭之人爲之詳明指示卽此道理便已該中解元然中一解元何足奇卽假而中會元狀元亦何足奇爲人惟當立品敦行耳諄諄訓勉詞厲意真數十年來空前絕後之學使也

六十年乙卯二十六歲正月拜別 父母偕翁紫書先生同行進京會試二月到京賃寓宣武門外法源寺中試題民

之所好好之二句柴也愚四句齊人曰所以為蜺龍則善矣一節榜發與紫書先生俱報罷先生先歸余定見留京移居南石槽何氏三姊家中一切飲食寒煖賴三姊曲為關照本為下帷攻苦計詎疾病纏綿竟未能用功是年在王家營起早之第一日早尖即遇見湖州王氏昆季以銜自後直至蘆溝橋無日不同行同宿孰知本科會狀即此兩人哉主司竇東臯先生以太不避忌第一第二俱中浙江人且係兄弟致招外議會元王以錫幾罹意外之患其兄勿菴先生不敢再有奢望而仍中狀元可見各有定命當是時東臯先生被人叅奏奉

旨將落卷全行檢送 圓明園另

派大臣挑取復取徐忻傅淦李 三人為中書徐傅隨即奉派

軍機處行走徐現任山西巡撫方其復取落卷時余本未嘗有倖心也

嘉慶元年丙辰二十七歲試題雖曰未學二句莫見乎隱二

句詩曰不愆不忘二句余雖勉強完場而大病之後精神

委頓斷不敢作倖獲想揭曉後偕馬君宗璉章君甫吳君

椿等其舟南返水程遲緩至六月十九日到家拜見 父

母慶幸之餘媿無寸進然自此加意調理體中漸覺復元

充實矣馬君號稷甫桐城名士後中己未科進士其子瑞

辰後中乙丑科進士即寓余家由翰林改官至工部郎中

吳君家揚州安徽籍號退梅後中壬戌科進士由翰林轉

科道歷京卿曾任福建學院道光己丑科以四品卿奉

派會試總裁章亦桐城人後官縣令

二年丁巳二十八歲

三年戊午二十九歲是年

先公仍延翁紫書先生在家

課余作文以老孝廉而仍在家塾從師實近時少有之事

先公期望迫切不稍吝費慈恩罔極自恨無以仰慰

高堂頗自奮勵乃六月中先生卽選任海州學博不能

挽留每課作文卽先公批閱方冀工夫純熟早赴次

年春闈不料十月朔日先公自王太恭人處歸

猝患中風目瞪口緊舌強不能言語余兄弟在書房中驚

聞此信趕進後堂省視不覺魂飛天外念自幼至壯皆賴

蔭下之福除讀書外諸不關心忽覩此狀手足無措遂延

醫診治幸閱兩日後先公神氣漸清語言亦徐徐復

舊而冬春之際又肢體作痛寸步難行余因此遂不上春

官以先年特地延師而次年不能應考豈非命哉是時康

茂園先生任淮徐觀察聞先公病專弁送長於推摩

之醫生前來接治其古道尤足感云

四年己未三十歲二三月後先公日漸向愈夏間竟能

行動如常喜從天降先是先公因望子念切於上年

十二月中詢之蘇州名醫繆方圓謂病體究竟如何繆云

病體斷不妨事二少君儘可進京會試我可力保等語

先公因命余於元旦到常邑城隍廟求籤余求得一籤

內有忽聞門內哭聲哀之句驚駭不敢呈視遂於籤詞桌

上隨手另取一紙歸家送閱先公再三詰問支吾荅

應心中惶懼之至後幸先公病體已大愈而祖

母王太恭人忽於八月申辭世方彌留時諸孫中惟余隨

吾 父母在旁送終餘皆有事他出余與 王大恭人

同日生辰故平日倍珍愛設聽醫生勸竟赴春闈則必

不能敬侍含歛豈非終身恨事神籤示兆靈感異常

五年庚申三十一歲二月奉 先公命挈眷入都補官蓋

余於戊午即循例得內閣中書因連年 先公病未赴

補至是 先公送至舟中臨拜別時諄諄然命曰勿得

罪於一人勿踈忽於一事用功會試盡心居官二者交勉

之大鏞敬誌弗敢忘四月中到京賃屋宣武門外粉坊琉

璃街在吏部投供候選其時只余夫婦二人女使二名一

花姬一天香皆內子隨嫁來之人外僕三四人用度極減

然每至過節度歲時典質殆盡余生平除買書畫外無絲

毫浪費蓋京居本屬大難而家中根基薄弱接濟不敷也

自庚申夏間至辛酉夏初並無官守余性愛客每花辰月

夕偕同鄉諸君如陸君叔華榮程君心宇定謨席君子遠

煥瞿丈菊亭頡及太倉顧容堂夫子蕭君百堂揆等杯酒

談心頗得友朋之樂或內城客來剪燈掃榻余固無倦容

而薛恭人料理酒漿脯醢之屬無不咄嗟立辦恭人生長

富家而自幼勤儉能耐勞苦凡京官眷屬互相往來另多

一番酬應飲食衣服亦各務時式鬪靡誇能甚至代夫營

謀名利貽笑大方恭人則從不出門惟夙夜持家以故二

十餘年京官所節實多也

六年辛酉三十二歲四月下旬接 先公手諭云汝本科

會試又未中候選尙難得缺與其閑住京師不如極早當

差特寄汝銀五百兩以爲加捐行走之費三兒亦照數分

授銀五百兩以示無偏設汝將來得中仍無碍也敬遵嚴
諭辦理卽於夏間同具科特用中書馬會元有章等四十
餘人同日赴 圓明園謁見各相其時大學士慶丹年先
生董蔗林先生俱爲軍機大臣王偉人先生在 南書房
行走皆在 園值宿故也自是分班入直同僚中前輩如
山西劉澄齋先生錫五學問淹通浙江徐古梅先生國楠
辦公老練徐晝堂先生志晉書法端麗山東李南池先生
鵬局度安詳皆稱投洽并同直之徐君元方黃君中模顧
君英王君鼎文李君振祐等閱數日必相往還或名利看
花或詩酒雅集殊不寂寞七月中奉派在稽察房行走其
職係校繕逐日
頒發之

上諭每月彙奏進呈一次向祇視爲閒曹率多委諸供事官之
手自四年正月

高宗純皇帝

龍馭上賓於彙進

諭旨內將遏密八音字樣誤繕遏滅經

上看出怒責相臣相臣俯首請罪大學士王偉人先生以向日
司此職者類多闕冗之輩特令改派英彥大加整飭定議
另派十人專管稽察房事凡下 園輪值領摺發抄及春
秋兩圍差俱責承稽察房行走之員承當遇有挑選協辦
侍讀亦先儘稽察房人員以示獎勵從此稽察房遂爲當
時要路矣計一月繕辦月摺多費十有餘金而下 園呈
遞及往來車馬之資不特費繁兼多辛苦余到閣甫及一

月卽奉簡派後此之擢侍讀仍基於此也

七年壬戌三十三歲三月會試頭場與吳棣花廷琛同號首

題爲人君止於仁四句次題道之以德一節據棣花云此

二題場前皆有擬作但係揣摩朱石君先生風氣今主司

係紀曉嵐先生首藝須另作矣見其經營慘澹直至夜分

始完頭篇二篇卽寫擬作三題居天下之廣居三句揮灑

而就榜發果得會元孰謂文章無定評哉其

廷試卷第八行未經寫足或囑其補滿以符格式棣花卽於

交卷處用小刀刮去數字重新添足四字繕滿全行閱者

惜其微有刮損痕棣花雍容曰祇不過不進十本而已其

氣度可想也孰知竟得狀元

仁宗睿皇帝特製雙元詩以寵之棣花係康茂園先生陳臬江

蘇觀風時拭拔之士前輩洵有巨眼是科曉嵐先生論首
題謂不可黏住文王說余首藝惟中二比切定文王後幅
推開說恰合主司意而竟未得薦命也八月赴熱河引

見奉

旨補授內閣中書實缺同時補缺者姚鏡堂前輩名學棗浙江

人丙辰進士文品人品俱高冬十一月以稽察房資格居

首得署侍讀

八年癸亥三十四歲二月

經筵侍班由翰林院移取名單進 呈恭候

欽點奉

旨派充文淵閣檢閱三月隨扈

聖駕謁

年譜

卷三

七

陵同行者為顏麗堂前輩名允璩丙辰進士自啓行至回京每

日俱住宿帳房公暇得游覽盤山勝景并海子內舊衙

門新衙門等處

行宮亦得瞻仰壯麗惟書生騎馬自媿文弱不耐勞苦耳是年

七月吾母席太恭人六十正壽相國劉文清公書名

重天下因求其賜書雙壽對聯蒙公贈句云喬梓大名各

臺閣椿萱六秩衍春秋公既書就袖至政事堂面交并向

諸同僚宣示曰此字字實在余非奉承渠也公向來為人

書箋祇落欸石菴二字不肯書名此對獨書東武劉墉益

尊重我父母之意良深感激我子孫當敬謹寶之此外

同年世好各製錦屏相贈侍讀劉誠齋先生偕各署友公

送有名之霓翠梨園全部爭來捧觴上壽因宴客竟日

九年甲子三十五歲時余尚未生子先公時切于懷屢

在家中為余覓妾鮮當意者禮部張君世彥先公庚

戌科分校春闈所拔士也一日枉顧閒談及此承其關切

願以甄氏女相贈余感其意屬薛恭人前往相視果端好

遂於是年七月七日以禮聘歸其吉日亦即張君所定從

此薛恭人與張君之配安夫人時相過從如親串焉今子

兩子元禧元齡皆甄宜人生也

十年乙丑三十六歲三月會試首題老者安之三句薦而未

中甫出場即值友柏大兄自家來京遂留住寓中手足久

別得聚誠為快事然大兄以通負紛集奮志彈冠盡售平

素收藏書畫為資郎之計余再三力勸不聽以數十年購

賞之名跡頃刻雲散烟銷良為可惜余京宦力薄不能買

之勉留祝枝山叙古千文王石谷青綠山水兩手卷今祝卷尚在篋中石谷卷早為馬秋葑前輩借臨失去究之弟兄雖以書畫易得一官而報捐未及半載旋即病故以大兄之才華倜儻竟止於此良深痛惜是年六月大兒元禧生余即馳稟南中以仰慰高堂望孫之念因思自庚申離家已及六載定省久違且京宦補苴負累日重漸有朝不謀夕之慮幸已得子可將眷屬遣回既可代奉晨昏又遂雙親含飴之樂且免京居人口眾多之累乃以所居兵馬司前街官屋轉頂於翰林程公元吉得價京平紋銀八百兩以一半還逋以一半為薛恭人挈甄氏妾及兒子等歸里盤費余則另賃小屋數間獨居供職時值有考取軍機章京之信俟考後如不取或取而不記名余亦定

見歸里安排甫定正在八月初旬雇車寫票忽家中由江蘇中丞汪稼門先生處差弁飛遞信來驚悉先公於七月十七日去世哀痛失措隨止住薛恭人等行期連夜設幕一面訃告僚友一面料檢行裝即於八月十六日率同眷屬奔喪九月中旬到家撫棺慟哭痛音容之不可再接矣方大兒之未生也甄妾病狀多端延各名醫診治皆云不像喜脉屢服藥而屢不效病情反覆幾將不測余亦只可聽之適二月中同年金陵談公名培來京會試枉過述其窘狀并云將以醫道謀生余因述及甄妾病久情形談急請診視余辭以母塵未浣宜稍歇息俟暑遲一日當專誠奉迓談不可遂延入內室診脉談笑曰是喜脉也為開一方祇一二早小殊餘皆常服之餌囑曰既素來

服藥太多此方姑且問日服之不必連進俟兩三日後再看何如詎料是日服其方後即神氣大安如其言間日再進一劑至第三日復請覆按談躍然曰不但喜脉的係男胎又開方連服數劑病即脫然計所服不過五六劑而自二月至六月安然無恙先生如達真神伎哉因而知同是藥品或效或不效或效而如神所爭只在輕重配合之間毫釐千里良非虛語特記此以志感當臨盆時翰林程公元吉適至余告之故程曰吾名甚吉祥盍即取其意故命名元禧也

十一年丙寅三十七歲正月上旬中丞汪稼門年伯薦江西地師尹一勺來余即邀同上山看視自北山至西山無不徧覽形勢數日後尹公指隆養基山地云此最佳詢之看

山人陶大云係孫直齋姑丈家之地其初買不過六金余因具青蚨二百千文易得之片刻之間成交立契吾鄉瑩地交易從無如此委速者余固厚其價值而直齋姑丈與先公本係姻親至好故彼此無一語計較爭論也二月內即請一勺子擇日開工營造是地居西山之巔工費倍鉅內外親友皆謂難以造屋即尹一勺亦云無庸再建丙舍余力闢眾議蓋鬼神所重者馨香若無屋即無厨竈春秋二祭冷肴陳設何以薦達馨香且地居高嶺登陟維艱祭掃之日設遇風雨必致旁皇失措進退維谷故殫心竭力特築數椽既備堂廡規模兼饒園亭勝槩即於中供奉先公神位并設立祭田勒碑記之繪圖詠之至今二十餘年來祭掃稱便凡此等處吾從不吝費也方指定

穴場時吾將啟土驗視有無石骨一勺子及汪中丞書來
 皆謂不可洩氣余曰工程完後葬期已卜而啟壙有石
 仍葬則于心不安不葬則力難再辦況洩氣之說祇子孫
 自為計耳余葬先人惟知求親體之安而不敢存自利之
 見一勺子等無以難余遂先營壙藏後舉各工余日日上
 山監視五月中工竣買舟詣揚州正定書院具禮幣求吳
 穀人年伯為先公謨墓誌銘既脫藁又到杭州求梁
 山舟先生書之山舟先生品誼高潔平生一介不取余祇
 獻時鮮食品數種尙峻却及遣使赴舟中璧還而余已解
 維不得已僅留枇杷一簍餘皆托其親友帶至常熟送還
 蓋枇杷閱日即壞不能不受也其清介如此所回使金紋
 銀三錢俱係親筆標識細字時年八十三歲而精神周匝

詳細由於澹然無欲道養得力耳九月中安葬先公

畢并吾母壽藏亦已完備自此始可重作出山計勉

圖上進冀振家聲

十二年丁卯三十八歲十月中服闋因是時天寒難以就道

先期於九月中挈眷起身至清江浦易舟而車錢唐陳曼

生鴻壽時官清江為余鐫刻名號圖章二方見贈祇頃刻

間而筆法得秦漢古意至今余所用印章惟此二方最佳

又贈書畫筴二柄皆可寶也河庫道談發華觀察組綬時

已臥病其弟孝廉組與余莫逆交飭差代余雇四套大

車五輛雖係官雇每輛價各紋銀五十金行路之難如此

時余棄產數十畝始有資斧就道吾母席太恭人向

隨先公官京師本係舊游之地且京中尙多昔時戚

好時相問訊因稟勸同行而

太恭人以家計為念執

意不從勉強赴都補官此心惘然若失十月中到都暫僦官菜園上街小屋數椽安頓行李同僚謂余此來賃居何陋十一月杪到內閣行走幸僚誼甚好有喜余之復至者有為余謀善地者各極關切陝撫徐晴圃前輩時官軍機侍讀即回明各相國命余仍辦侍讀事其青睞尤甚也

十三年戊辰三十九歲三月中由吏部帶領引

見復補內閣中書實缺會試首題德者本也二句仍未中座師

顧筠巖先生於本年二月杪服闋銷假即奉

派會試總裁出闈後甚為余惜自媿辜負長者之意秋得兵馬司後街官屋愛其屋後隙地甚廣老樹成林因誅茅架書舍四楹小亭一座環植修竹奇花暇日二三如已觴詠其

中蔡生甫先生題之曰茂林修竹山房蔣丹林先生題其園門曰福地烟霞余性疎曠所到之地愛植花卉京師軟紅百丈如斯清幽者渺不可得能知其趣者亦不過數人而已此屋前後共四層官屋祇兩層甚偏仄每月房金僅扣俸銀三兩有零餘皆歷住之人陸續增建前此許秋巖中丞葉雲素侍御吳荷屋方伯皆曾居之余於東首復賃李樸園太守房屋一所兩宅合而為一較為寬厥將有久居之意後兩年中書俸滿有勸余外就司馬者意頗欣動然撫視手植花木喜其扶疎漸長望其老幹龍鍾終戀戀不忍捨去遂定見內用甘守清貧與羣花依倚余之癡猷類如此計余前後京宮二十餘年優伶宴會之費絲毫不耗而書畫花卉屋宇三項每年動輒百數十金結習固不

可解也迨後侍讀任內 京察屢不記名少寇宋悅巖年伯薦一風水先生勸余畧為更改宅向以便催官余不聽

庚辰四月奉

旨擢授河東道中丞張蘭渚先生向余商懇頂住此屋而少寇史望之先生復介翁二銘太史再三說合余以業允蘭渚先生在前不能食言覆之蘭渚先生於是年六月初五日移居其中次日初六即奉

命簡任方伯人傑地靈風水豈可盡信哉

十四年己巳四十歲三月會試首題君子喻於義二句仍未中是科蔣丹林先生分校春闈出榜後枉過索余卷閱之歎媿萬狀余却處之泰然自此絕迹禮闈矣四月二十日甄宜人又生二兒元齡時夜已二鼓外余甫睡聞房中

老嫗開門備湯水詢知將臨盆即披衣起而二兒已生矣

適聞後園樹上有鵲噪聲因即命名雲鵲今改名元齡秋

扈

蹕熱河同署王小蓬值軍機並非輪派圍差而自請告圍隨往因堂允已遲無伴可結遂附余帳房同行軍機各員地方官例備公館到灤後余即與小蓬同居合巹塞外奇景豁人眼界其氣脉雄濶深厚宜乎歲

駐

鑾輿也是年恭值

仁宗睿皇帝五旬萬壽崇古王公等爭來觀祝奏樂

天上

錫宴外藩實為千古盛典因念福地神皋有畢生仕宦而未曾

年譜

卷一

七

到者 先公隨

幸上都至十餘次余初補官即赴熱河

行在引

見今又躬傍

六飛聞呼

萬歲不可謂非兩世幸事內閣圍差例派二人一侍讀一中書

余以攝侍讀而又兼中書之差蓋兩人并一以行則公費

稍多而賠墊亦稍省然職兼則務繁遇發本報之期每至

二更餘始回寓夜飯而當軍機差之小蓬早已安臥矣小

蓬後陞雲南迤西觀察終于任所

十五年庚午四十一歲是年下午後之點心即減去可見四

十後已漸衰矣

十六年辛未四十二歲余幼時易患不寐向未為大害至此

年所患特劇動輒竟夜不合眼百藥無效惟飲酒始能少

睡因每夜恣量飲之始頗欣然一兩年後遂致腿足欠痛

乃逐漸節減明知當戒飲酒而不能亦不敢也蓋官職難

曠次日起早必得前夜畧飲方可少寐片時自本年至五

十一歲外擢之日其間安然睡適者不過十餘日耳嘗曰

吾見人富貴皆不艷美惟見人入黑甜鄉則中心欣慕蓋

余自幼秉性謹畏惟恐誤公遇起早之期人五鼓我必四

鼓人四鼓我必三鼓雖數十年當官曾無絲毫疎忽過悞

而此心提撕警覺良自受苦節從前在塾中作文之時恐

先公責罵亦往往一藝已完屢看屢改屢改屢看卒

至反側竟夜若值下園及早朝引

見之日則從不合眼也

十七年壬申四十三歲是年延沈葵岡夫子課大兒讀書葵岡先生本係余幼時受業師性情古峭所至少與合者余前曾薦陝甘學使馬秋菴先生署中閱卷少積囊資歸里本不作出門計奈家運不辰難以家居又目覩南方出洋米貴奸商囤積接應之狀復奮然來京以老諸生而上書言事歷陳時政得失并言吾鄉米行王長發作奸情弊余恐其罹禍也借康伊山先生再三勸阻先生曰我於摺內聲明移弱息來京原拚此微軀作遠行計繼而至都察院投遞求轉奏各都憲憐其書生年老亦交相勸曰汝所言誠是然近日我們衙門中諸御史早有言及之者汝可毋庸再瀆先生百折不回聲色俱厲各憲始一面發坊收管

一面奏

聞照例請交刑部治罪方是時人皆爲先生危之詎意五鼓入奏後

聖恩寬大特奉

諭旨沈旭不必交刑部亦毋庸官爲押解聽其自行回籍可也

欽此自來越職上書皆譴責而先生獨荷

浩蕩鴻慈固由一生正直無私之報亦由

睿鑒高明洞燭其所指得實也隨有

密旨交江蘇撫臣查辦而王長發遂伏法吾邑遠近人民俱得

從此食賤厥功匪淺時有富戶因不能糶貴竊相咎之愚鄙之夫無足置論然先生自此無敢再爲薦引者亦無敢再爲延請者旁皇予寓勉令大兒從之未免年老有過火

處余屢屢力勸回里遷延不應余甚覺為難直至大兒十
 三歲察先生老病日臻另延楊內翰鎮源課之復贈贖勸
 行始怏怏就道嗟乎一沈先生也前善教而後不善教豈
 年力限之耶

十八年癸酉四十四歲九月京師有逆匪林清之警是年彗
 星芒爛數十丈直犯斗垣每於臨臥時察其象竊相疑慮
 至九月十四日夜飯後天光尚早余偕沈葵岡夫子在庭
 中徐步閑談忽光色如銀照耀庭際仰視有星自東南至
 西北而墜其勢甚低曳尾若帚其相詫異者久之次日十
 五午後李東山舍人昌平枉過情話坐良久適余僕自署
 中送飯畢肩食榼回李見而詢曰君今日輪值送飯耶余
 曰然李因言棗花寺菊花甚佳盍往觀因駕車同往至法

源棗花兩寺徘徊瞻眺逮日薄西崦各分手散夜二鼓後
 就寢忽聞雷電交作大雨滂沱私訝天時不正黎明將入
 署見正陽門半掩半啟門兵各掛刀箭森立狀異疇昔行
 至外東華門車不得前下車詢看街兵曰老爺尚不知耶
 昨夜宮中搜殺一夜矣余駭然急步至內東華門門閉不
 得入各官俱擠立門外往來探問消息蓋逆匪乘隙從東
 華西華兩門竄入勾通內監將謀為不軌幸

今上神武以

御鎗擊斃二賊勢稍卻又雷驚電射登屋之賊震慄跌地連夜
 召集四城兵勇入內搜捕賊之伏匿暗隙者尚多故閉門
 捕殺越三晝夜始淨翼日首逆林清就擒星墜之象斯驗
 自來賊寇未有勾通內監者亦未有始事即入

禁廷者林逆真罪大惡極之尤賴我

朝福運延洪

天威助順得以迅速蕩夷中外稱慶余送飯之僕是日自午門出故全未聞知若出東華門卽已遇害內閣後門偏近東華門茶房李姓出外探望被賊劈去一耳悶倒半日方醒同鄉該班之楊靜巖屈敏山兩舍人食余所送飯畢本可散矣楊云盍少坐飲茶詎茶未畢而賊警告遂閉內受餓三晝夜幸保平安其危已甚屈每以此抱怨楊云方在內窮搜肆殺之時正余偕東山坐寺烹茗看花之頃豈非奇事尤奇在余之僕人自內交臂回而竟不知影響也

十九年甲戌四十五歲自十五年至本年余俸滿引

見內用又 京察一等引

見又論俸推陞內閣典籍引

見今皆不能記憶日期惟蒙

恩復充 文淵閣檢閱每年

經筵侍班則總在二月初二三等日也

二十年乙亥四十六歲四月引

見奉

旨陞授內閣侍讀中書職任清華侍讀爲中書領袖總司票擬及合署事務漢缺祇二員一員在軍機處行走不管外事而本署之侍讀遂更繁劇一年三百六十日從無休沐歇班之日向來京師有句云日邊清要無雙地天下窮忙第一官卽指此官也余以孱軀應此劇職自擬辦公數月卽行告退乃日日披衣待旦薄暮散衙轉覺精神健爽習久

忘勞每直本章堆案擬簽准駁毫釐疑似之間悉心衡酌
隨機剖斷幸皆允當又合署中書差使皆由侍讀回堂簡
派余一秉大公不允情面同僚背無後言以此各相國皆
加青目偶有一日因恙不進署托人代為料檢而適遇疑
難事件同人皆旁皇失措余體質最弱而精神轉較寅友
周匝每日必為改正錯悞無數直至二十五年

恩簡外任連做閣讀六年之久實初願所不及大學士曹麗笙
先生辦公最精審每到閣看本見余在署即便放心或一
日不到必將是日所辦公事專差至余家中商確而後已
是以於余簡放後因

召對在

皇上前奏及云臣此後在閣辦本當分外費心緣素來靠得住

之內閣侍讀張大鏞蒙

恩擢任河東道矣此麗笙先生親口告余者良足銘感
十一月保送御史引

見未記名

二十一年丙子四十七歲春 京察一等引

見未記名

同班之軍機侍讀陸藻開列在前記名後閱數月

簡放山東沂州府知府又改簡調補青州府告病回籍先余而
升者官階轉遜於余遲速各有定也

是年二月初六日妾甄宜人因病去世隨於夏杪遣家人
吳升護送其柩附糧艘回南、秋得見江南鄉試進呈題
名錄蓋各省題名錄例由內閣呈進故先得見之知翁紫
書先生之令嗣二銘世兄高魁不覺狂喜先生苦志績學

僅以翰博終二銘自幼穎異早決其必能顯揚也

二十二年丁丑四十八歲二月翁二銘世兄到京卽留余寓中是科會元龐大奎吾邑西鄉唐橋人卽上科二銘之同年也吾邑人

國朝來未有會元龐君直接前明瞿景淳前夕三鼓外以爲脫科黎明竟報會元向例十名卷先期進呈有默記首卷詩中一二聯互相問訛者龐不應故同人皆不知也龐長於翁一歲丙子南榜邑中翁與龐及吳廷鈔皆英俊副主考陸心蘭先生言係蔣丹林先生祥堉戊午浙江所拔士丹林又係先公癸卯湖北所拔士故是三人皆爲先公之再小門生淵源有自不容泯也龐君素不工書雖入翰林旋於下科散館歸班終受楷法未嫻之累書法

可不早習哉吳由庶常散館改主事翁則由翰林開坊現任廣東學政

是年十一月十七日御史馮清聘奏八旗考試中書該旗參領先出圖結臨考時應照科場例親來識認以杜假冒頂替奉

旨所奏是閱刑部本有雲南民人因姦採取努箭草磨麪給姦婦毒死縱姦本夫者又有湖南民婦任氏因姦敗露羞愧自服鼠莽草求死旋經救活者或云二草同類異名皆卽斷腸草也未知確否

十一月二十一日到署接雲貴總督伯協揆答復合署公啟一件并復余札一件又致候合署同人每人各帖一封共九十封向例外省督臣拜枚卜之

命漢侍讀二人同合署漢中書公寄賀啟并開呈漢官名單協

揆拜

命時余等循照舊章蓋內閣體制與六曹不同相見稱師生
無堂屬之例原係極清華極風雅地也中堂稱謂侍讀及
各中書或幾兄或老先生各隨其平日交誼惟見滿中書
則稱某老爺滿大學士見漢中書亦稱老先生滿漢體裁
迥異漢中書皆進士舉人出身滿洲則祇由官生考取又
有派為中堂跟班者其體統之異因此余初到閣所見皆
然詢之老輩僉云如此近十數年間此例漸紊知者鮮矣
各相答復公賀牋啟或僅寥寥數字伯協揆係滿洲進士
中之極風雅者年齒最尊深知前輩儀型抑且啟中詞翰
斐美特錄於後以存薇省故事

附錄答啟

奎壁躔高星萃鳳池之辰

絲綸省秘雲連鸞掖之珂

制誥典自禁中判五花於青簡

政事宣諸門下起七草於黃麻

簪豪而袖挹香烟西院之梧桐曉蔭

納甌而堦凝春色東堂之芍藥宵芬

朱戶綠牕峯是蓬萊第一

金泥玉檢台依杓斗而三趾

公望之清華羨

儒紳之典貴苔岑同契蘭詵尙踈

荃札遙通葵傾倍切恭維

諸位老先生植品珪璋

紆才錦繡

枕經醅碎摘燕許之文章

汲古沉潛富蘇韓之掌故

振藻則揮珠削玉縹裝五百之函

拂縑則泉湧露垂黃帖三千之牘溯自霓裳高詠

英蜚玉笋班中迨沐

宸翰親題

榮逮金蓮隊裏曉箭仙桃之賦賈閣老策馬早朝

宮鴉禁樹之篇王舍人鳴騶入直

觚稜曦暖紆青曳紫而行

鰲背颺微振珮垂紳而至

侍芙蓉之闕下簪笏駢羅列槐棘之班前縹緗綵繅資積

薪而日上階拾級以雲升

掌制則黼黻

謨猷典寶則焜煌符璽

墨研五夜崔鸞盧鳳之思

法備六書蠶臥虬蟠之筆兼以風章辰告庚郵千驛而來

露簡寅承

乙夜三宣而下入

黃扉而珥管

萬幾之出納維勤依

丹殿以含香百職之弛張先稔

青霜武庫

全譜
卷上
潤色以典字謨言

白壁文昌

涵濡於宮裁院體宋子京人傳紅杏他年游歷尙書白太
傅郎是紫薇此時先呼學士佇見

藤廳鸞造瓊霄之

卿月流輝

藻榜蟬聯銀界之

文星朗曜

丹楯碧棟此座虛以待公

銀榜金甌其人後來居上逃矐

雲藹偃祝遙深翹指

奎杓馳依益劇弟學媿蹄泔才漸斑管青年釋褐幸叨侍

從之班白首素餐濫厠封圻之任蠻烟瘴雨違

鳳閣者十有二年棟日牖雲隔

螭坳於萬一千里戀

闕則夢縈青瑣懷人則眸障紅埃茲蒙

聖慈畀以協揆

龍綸遠賁非寤寐所敢期

鶴詔遙臨幸就瞻之伊邇惟渤海內召慮庶事之未諳潞國初

歸正朝常之待學蚊負山而難任鴉濡翼以貽譏所幸

仙侶傾襟韋絃交益

羣英接席圭臬有資正擬裁佈緇屣猥荷

先頒翰柬

瑤言瑩飾被樛櫟以綈錦之榮

渠約規繩進珉珎以鏤鏤之用佩

高雲之渥誼遙注鯨鶴景

舊雨之清輝馳依棖構驚經綺陌不箠策而已驅鶴到瑤

臺雖璩璋而亦舞此日南交歧首依北斗以望

星辰他時東閣摳衣向

西清而聯珂珮竚延

芝宇遐睇

芸栢率展寸丹虔通尺素肅候

文祉順頌

升祺諸惟

澄照不備不莊

年家眷弟伯麟拜

又專啟

奉節滇池遙睽

芝範頃披

公啟

飾滌逾涯雜誦臨風交縈感媿緬惟

鹿樵二兄鼎裊集慶

簪紱凝床

表領袖於薇樞竚

恩光於

楓陛翹詹

霽采臆祝曷勝弟謬領兼圻洎埃乏效茲蒙

聖恩優渥甌卜濫膺循省五中彌深惶悚所幸

蘭芬近契諸堪

韋佩藉資刻現閱伍黔垣風塵勞頓 同僚諸公未及一

一專函爰具覆啟並候帖各一祈卽分致是所跂屬專

泐鳴謝順候

升祺不旣

弟伯麟頓首

是日刑部進四川人民李仲均因姦謀殺本夫宋子順一
本該署督將李仲均問擬斬決姦婦宋張氏聲明尙有不
忍致死其夫之心刑部議以姦婦不知情之案必當時喊
救事後卽行首告方准聲請不得濫行牽引致滋輕縱今
李仲均謀殺宋子順旣誘令飲醉何難誘至僻地下手乃
直俟宋子順回家醉睡之後方始持刀往殺若非先與張

氏商允何至及斃本夫目無顧忌且李仲均始而入房疊
砍繼而將屍包裹爲時已非頃刻張氏何難乘空逃出喊
投約隣乃坐視伊夫慘斃所謂不忍致死其夫之心何在
卽云當時或被姦夫嚇禁迨李仲均回家後卽應覓問首
告又何以遲至四十餘日之後始行指拿姦夫到案難保
無通謀於前狡飾於後情事駁令另鞫具題余謹擬部駁
甚是簽加具說帖進 呈當日

內留旋奉

旨指出本內宋張氏之母先曾利資縱姦後因宋子順被殺畏
累自縊一層

諭以張氏旣因姦致夫被殺又致伊母戕生所稱伊母縱姦之
處伊母並無生供足據亦難憑信刑部未將此節指駁

飭交新任總督蔣攸銛提案親訛仰見

聖明洞燭無遺閣部臣工欽佩之餘益深惶愧

二十三日奉

旨山西太原府知府員缺緊要著該撫揀選一員調補所遺員

缺著周壽椿補授欽此 周直隸翰林曾任福建大主考

由御史截取外任品學俱優旋補蒲州府知府越三載余

任河東道即為余屬員余歸養三年周始以疾解官功名

洵有一定云

是月初十日回明各相國將滿洲中書貴寧咨送 文淵

閣檢閱移文翰林院查檢閱向祇漢缺六員近年因滿洲

漢軍各中書內亦有科甲出身之員紛爭不已故酌定咨

送漢中書二員後咨送滿員一員即定稿請各中堂畫押

存案貴君久經由中書升至別衙門被議仍回原任忽於

去秋丙子科中式舉人亦奇事也會典內載 文淵閣校

理由科甲出身之內閣侍讀及翰林等官內揀充近因翰

林人多無暇問及內閣有勸余商復舊規者余曰平生於

實有利益處尚不肯稍稍干人況虛銜乎置弗論

十一日因御史王耀辰奏年老士子應試其年例相符者

先令廩生大學十名小學五名公同具保由該學教官查

明實係立品老儒加送不准一概錄取奉

旨所奏尚是又請老生止進頭場免進二三場之處奉

旨所奏不通斷不可行 大埔謹案

國家優待老生三場完畢加賞清銜原屬

殊恩懋典乃近來冒濫不少至立品老儒則轉少若令廩生具

保教官覈實恐更增需索欺飾之弊所以真正老生情甘
隱伏也在王御史之意祇因老生進場點名時擁擠顛倒
竟有致斃者故請止進頭場然定制豈可輕改且卽進一
場能保其不擠壞乎惟在辦考官員善於立法如將年老
諸生另立一牌先期出示曉諭俟各諸生點完入場後再
將老生挨次點進庶於循照舊章之中曲寓體恤耆年之
意

吏部具題安徽巡撫奏請以捐免坐補舒城縣之候補令
某署理宣城縣知縣有先期托余者余查其捐免上庫在
宣城縣出缺之後恐開擇缺取巧之弊加具說帖奏明駁
之

二十六日奉

上諭李奕疇奏現定旂丁津貼名目易滋流弊請仍按舊章辦
理毋庸另立規條一摺旂丁領運漕糧優給行賄原不應需
索規費惟該旂丁等長途挽運不無需索相沿議給津貼乃
旂丁等恣意勒索年甚一年勢將無所底止前經孫玉庭奏
請統以各幫米石多寡酌給津貼禁止每船給費降旨准行
作爲限制乃禁其多索於限外非令其必取盈於限內也今
李奕疇奏稱旂丁指此爲正欸援引從前駁飭蔣兆奎等奏
請加征津米之旨以爲事類加賦蔣兆奎費淳前奏皆請多
征米額有類加賦是以駁斥至津貼限制與加賦迥殊該旂
丁等何得視同正欸該漕督受弁丁慫恿不願遵依限制含
混其詞請仍按舊章辦理以遂其無厭之求實屬闕於事理
李奕疇著傳旨申飭該漕督旣稱此後河道通暢丁力日裕

津貼一項定可日漸減除著卽責成該漕督嚴飭各弁丁總於限制之內力加撙節愈省愈善若於限外苛求逞其停兌勒結故智肆意刁難立卽嚴拿治罪如該漕督縱容袒庇定行嚴懲不貸欽此

謹案漕弊歷來爲江南之大害溯從前吾鄉諸老如蔣莘田先生陶子師先生各有蘇松浮糧議其時之所謂浮者僅止正額而言也前輩尙且憂心如此

天庾正供不容愆期重運日艱遞增津費費無所出則取之民究之民所倍出者津費僅其一而從旁之耗蠹居其十矣聖衷厪念惟恐傷民臣議紛紜迄無良策近數年間竟至公然以浮收字樣形諸奏章更復何所顧忌有田之戶視爲畏途正本窮源除却辦理清漕更無良法漕清則影射無憑

羣蠹自絕當此日而執清漕之說必共笑其迂昧然

國家元氣豈可坐視其日剝而絕不動念乎蔣莘田先生議中有北地營治水田之法其策甚善而事非易行余嘗謂田賦不可稍浮而運費擬另議支給蓋浮收律有明條此如爲臣當忠爲子當孝千古不易之常經也以此坊官猶有犯者况誨盜乎雖經費有常不容輕易議增然能定有限制則旂丁從此咸知撙節不至如取之於民者恣意勒索年增歲益也統計一年幫船津費不下數十萬之多誠恐度支易絀然以天下之全力養京畿之萬姓當尙寬裕况我

朝

聖

聖相承

覃敷闡澤恭遇

慶典蠲免錢糧及官民各欠動輒數百萬

聖德寬閔從無絲毫靳惜豈肯任聽官吏橫征暴斂借上供之名以竭下民之髓特患無剗切詳明力陳其弊者耳如道光三年秋江蘇水災幾於通省全歉其所失甚多設此議行則官無所肆其虐而民競得樂其生必將和樂召祥年豐屢告其所得不可藉補所費哉抑或更慮所費過鉅難以爲繼擬請於在京滿漢各臣僚俸米內扣放十之二三以北地所產之麥抵之同爲五穀之育人而運費之所節已甚鉅當亦補救之一策也且余十五六歲侍居京邸時聞太倉之粟陳陳相因堆積朽蠹難計其數今則偶一愆

漕卽慮無米此尤不解其故漕藉河而運收漕不善撫臣之咎而所以致撫臣任此咎者又河臣之咎也治河旣無其人治賦又失其本徒每年上耗

國用下竭民膏吾將如之何哉

是年夏初侍讀缺出擬正者有京察一等之聞人擬陪須另選一員向例將委用侍讀之各中書按資開列名單呈送各堂定期會集公同揀選近來軍機中堂不肯輕易出來而在外各堂又不便就商因此往來回話之閣讀愈覺爲難其時松董二相適派

殿試讀卷官同宿內閣余因將名摺二分先行呈送松相詳問各員勤惰余一一答覆松相將名摺遞與董相云卽定打頭之李光庭你用筆點出可也董相始猶謙讓繼被逼

不過幾欲舉筆余從旁急行攔阻曰此事尙須公同揀選董相因遂擱筆松相旋向余曰然則子去回明托中堂說我已選定李某矣余唯唯而退松相固位居首揆而托相又職總樞頃素來分不相下余躊躇再四始將松相之言宛轉回明幸蒙托相允可照點詎值松相又派朝考差使遷延數日松相忽忘前言命余再回托中堂另點其次之員松相人極古道坦白無城府其中未必有鑽營萋非者此事不知何以忽忘雖命余改回斷難遵辦况前日董相共聞此言豈能反覆當時董相聞此議亦感額向余曰公事實在難辦嗣填榜日松相似有疑余之意余即在政事堂不禁大聲曰門生在內閣十八年從未以自己之事干求各相矧肯爲朋友徇私董師相在署最久可以

證問門生此心可對天日也松相默然後賴曹中堂從中調停復行下園會同揀選仍定李光庭云

二十三年戊寅四十九歲新正初二日早起到浙紹祠辦理內閣團拜係余爲主人前輩中科分最深者章協揆桐門先生係乾隆壬辰科先伯二聞公分校禮闈所拔士李太守咸五亦是科進士俱未到宋鴻臚鎔早飯後先行同席三殿元姚秋農先生己未狀元龍汝言甲戌狀元吳其濬丁丑狀元龍吳二公皆到閣在余十數年之後是日奉

恩旨於本年八月明年三月舉行

六旬

萬壽鄉會

年譜

卷二

三

恩科十七日戴協揆戴大宗伯兩年伯招飲觀劇席設澗紹祠
共三席王石渠年伯因腹疾未到可亭協揆年七十四紫
垣大宗伯年六十六徐春帆年伯年六十七三公皆

先公乙未同年可亭協揆精神尤好平時在署能寫蠅頭
小字又每日必溫誦時藝二三十篇步履輕便年姪中在
座者王少宗伯引之卽石渠先生子也以四十年前之老
同年帶領各年姪談心話舊長幼秩然席間協揆云今年
游廠肆以二十文買得都門竹枝詞一本內有二句極妙
云糞車攬道從旁過便是當朝一品官舉座爲之一噱是
日爲甲辰辛丑己亥合乙未共四科團拜年遠人少合數
科方能成局己亥最貴者曹麗笙相國劉沁芳大農甲辰
最貴者彭修恬少寇茹古香大空吳雲樵少宰京師惟年

誼最重人家子弟可不讀書自愛耶

是月延鎮江趙姓到內閣大堂前看風水緣政事堂庭中
舊有大椿二株左右相對數百年物也近十餘年來左株
枯折托首揆面

聖時奏及奉

旨內閣爲百僚之首地關係匪細比年宰相勒保劉權之長齡
等皆因目疾成廢

特命戴均元經理補種以戴江西人知陰陽家術也戴協揆遂
委余轉邀趙君董其事

二月初三日到署戴協揆向余曰今早自園歸途間英
冢宰遣人傳知奉

旨戴均元授爲軍機大臣自揣年老恐不勝任擬具摺辭讓子

盡代我繕具摺稿余曰師相精神極好正當報稱何可辭
耶乃改繕謝摺赴 園入直

二十四日

皇上因恭閱

皇祖世宗憲皇帝實錄內載雍正十三年五月

諭內閣凡內外臣工若但知潔己而不知奉公國家安用此
木偶如馬齊高其倬魏廷珍甘國璧等非不能辦事之人乃
習成巧術慮及後進效尤等因特

申諭訓飭現在臣工有在朝多一具臣國家受一分害朕實懼
焉之

旨

大鑪謹案自來貪鄙之臣誤國而庸碌之臣誤國更甚苟

全祿位小廉自持詡詡然附託名高品貴而國家之休戚
漠不相關其居心尙可問哉揆其故皆由於讀書不透不
能明理或明理而不能養氣以致庸懦竊位遇事餒阻也
聖訓煌煌洞鑒時弊爲人臣者當時時莊誦奮勵媿悔須知盡
心卽所以盡職爲國卽完其在我

二十五日奉

旨刑部奏蒙古搶刦之案有民人在內者請先令承審官分別
是刦是搶照刑例強盜各條及搶奪攔搶各條分別治罪似
此引例紛繁轉滋淆混正所謂科條旣備民多僞態無所措
手足矣嗣後蒙古地方搶刦案件如俱係蒙古人專用蒙古
例俱係民人專用刑律如蒙古與民人夥同搶刦核其罪名
蒙古例重於刑律者蒙古與民人俱照蒙古例問擬刑律重

於蒙古例者蒙古與民人俱照刑律問擬著爲令欽此

查刑部官員平日留心律例乃牽引支離一經

聖明指示遂明白易遵

三月初一日酉時清明節而大風揚沙紙窗色暗正在此時

康伊山先生之夫人余五妹之姑也於前月病故余書聯語輓之云鸞馭遙升八秩慈章揮老淚鳳毛濟美一堂和氣慰先靈蓋伊山先生之母太夫人年八十以外尙在而妹倩昆季輩人各一心故余書此規之其叔龍山觀察見而贊嘆曰鹿樵真通人也亦深知余用心之苦耳

又輓吳庚亭刺史聯語云金臺月冷慘棠陰溯瓠子興歌尙留治績玉樹風摧傷蔗境幸蘭蓀擷秀克紹前徽庚亭

係余之族姑丈由直隸河員洊陞州牧其子河南通判先三載前病故其孫已捐運判

自二月至三月下旬風猛沙黃間日卽作據野人云菜蔬遇風沙皆焦百物增貴早象可慮

李舍人

昌平

湖北人辛酉進士號東山於本月杪傳補軍

機章京東山年十六七時值楚北邪匪滋擾卽親率鄉勇督剿其人具才畧敦氣誼詩文俱有根柢上次考取軍機未曾記名先是署中韓舍人

文顯

等才能出衆於嘉慶四

年考取軍機未記名至十年復考仍欲保送而爲衆議阻遏仿照御史不准再送之例也然御史不准再送奉有

諭旨考送軍機章京則並無此等明文十八年考軍機時東山復欲保送同署忌刻者卽援韓例爲言余毅然將東山首

先開列旋蒙中堂派送引

見記名當時同人鑒余公心而此例既開後進亦皆稱便計余侍讀任內凡開列保送軍機章京三次皆惟其才不泥資格大學士曹麗笙先生稔余此中無他動輒虛心下問謂中書人數甚多其短長賢否我不如子之悉舉子所知可也如李君彥章喬君用選當時皆因才具長而越資保送今已各陞太守侍讀矣

四月初八日熱氣蒸騰有如火炙早起卽烟塵濛濛午後熱更甚色更黃風沙漸大未刻後天色益紅身穿單衣尙覺燠熱不可耐申酉之交忽然東北角上紅光一團騰躍而上宛似火球其狀比日輪尙大頃刻窗紙俱作火色隨後又有黑氣跟隨紅團而上余時正與西席屈侃甫先生

坐談陡見窗紙作暗互相詫異數語未畢而滿屋驟黑如夜行深窖中兩兒在內正喫夜飯俱擲碗驚走須臾稍露微光旋又大黑約兩刻許隱隱聞雷聲一響黑氣漸散室內復明而紅光燭天炎灼逼人半空中宛似雨血者然當紅黑氣交作之時飛沙吼風臭霧撲鼻人人色變直至酉末時候雷電交作紅氣始散此今年第一次雷聲也霹靂一聲到地房屋俱震妖氛或因此稍解究竟不知是何災異也十一日曹麗笙相國自園到署云今日輪值各員一二品以上皆

召見

諭及初八日酉刻黑氣之事并云聞明中堂說記得乾隆二十三年三月初七日亦曾有此變異明中堂今年八十四歲

矣

十八日刑部具題奉天省民婦高氏毆死伊夫王歲一案
本內聲稱伊夫先於去年正月內夜間赤身剝其童養媳
小英褲子圖姦小英喊嚷該氏聞聲拉阻嗣二月間伊夫
復欲圖姦仍剝小英褲子小英不從喊嚷又經該氏勸阻
并將伊夫村斥數語被小英之父聞知將王歲拴住對衆
斥責并欲喂以草料經衆勸息詎王歲仍不改悔又於夜
間醉後圖姦小英硬脫衣褲小英拒阻該氏聞鬧起身向
拉王歲卽取木棒毆打該氏奪獲木棒王歲用頭向撞該
氏順用木棒回毆致傷王歲額顱等處殞命刑部以與他
故逞兇者有間惟名分攸關將高氏問擬斬決 先是彭
修恬少司寇會言及此案以其夫屢次圖姦子媳確有証

據該氏於黑暗中回毆致斃究與別事逞兇者稍異遽與
斬決情稍可憫第刑部爲執法之地竟難申說或將來進
呈時內閣可以衡情酌擬云云適本日送閣余爲添票九
卿定議具奏簽并加具說帖進呈旋奉總理刑部之章中
堂面告余曰此案本部已論過幾次該氏究已回毆三下
且姦尙未成姑且撤回再與曹中堂商酌票擬可也越三
日呈進仍從余言

附錄說帖

查本內高氏因伊夫王歲屢次圖姦伊童養媳小英向阻
互毆致傷王歲身死刑部以名分攸關將高氏問擬斬決
臣等核其情節該氏之夫王歲兩次圖姦子媳俱經該氏
聞喊斥阻反被王歲毆打一次並未分爭并經伊媳之父

邊某將王歲拴住欲行送究經衆勸息嗣王歲復於夜間圖姦伊媳該氏聞媳喊嚷坐起拉阻被王歲拾棒毆打該氏將棒奪獲王歲用頭向撞該氏還毆數下因其並未噴聲點燈照視王歲已因傷殞命是王歲累次圖姦子媳確有實據該氏奪棒還毆時值黑夜既據刑部聲明與他故逞兇者有間是以照擬票簽外添寫九卿定議具奏簽進呈伏候

欽定

六月初二日輪值

御門侍班五鼓至 圓明園 賢良門外俟甫辨色時

皇上御勤政殿 大鑪 等侍班者依次入跪奏履歷訖退班仍從

賢良門出

聞諸前輩云從前雍正年間有因侍班而蒙恩特擢者誠曠典也

本月二十二日奉

旨帥承瀛充江南正考官帥係 先公癸卯科主試湖北所

拔士其時年僅十七歲後屢躋春闈在京一館餬口形容寂寞將以教習滿期就縣令旋於丙辰科成進士

廷試第三名後因密保受

主知擢至九卿今科江南一榜人才俱爲 先公小門生矣

前此甲寅科何公 元煥 分校順天鄉闈戊午科蔣公 祥暉

主試浙江戴公 敦元 主試山西辛公 從益 主試福建盧公

元偉 分校順天鄉闈庚申科帥公 承瀛 分校順天鄉闈辛

酉科帥公又主試廣東乙丑己巳兩科蔣公又分校春闈

計數省及數科

先公之小門生幾徧天下其外官做

房考者如江南大令王公

之導

於庚申科入簾後曾將取

中之同門卷寄來此外各世兄有任遠省知縣分房得士

而未寄齒錄房卷者尚多卽小門生中膺使節而掌文衡

者亦已不少如近科江南副主考陸公

言 廖公

鴻藻 皆是

也余落拓無能一官沉滯世交中往往覲面相逢佯不認

識或值有事見委之際則又貌爲恭敬連稱世叔矣人當

自反於世道乎何尤是科帥公奉

旨後余絕不往賀因係本省考官而家中子弟輩現皆應考尤

當遠嫌

七月初八日在署拆封知余門人李

家蕙 奉

旨充山東鄉試副考官

李生福建人其祖官海州州判與翁紫書先生爲同僚卽

受業焉後來京奉紫書夫子命請業於余旋入翰林膺

簡命惜其年之不永也

十一日直宿 圓明園 朝房夜飯後偕滿票簽友人散

步至虎城看虎豹據云每虎日給生肉五斤兩虎各在一

城狀甚瘠另一豹伏城隅見人嗚嗚作聲似雷其狀較虎

猛斑作圓紋新豹也由永寧寺過橋沿荷池菱蕩而歸迨

望萬壽玉泉諸山蒼翠若挹迴非京師塵起汚人景象次

日接南中家書知吾鄉五月中缺雨插蒔甚難米價昂貴

十九日 老母誕辰署事託人代去昨夜大雨竟夜卯

初遂止午刻放晴地上幸已乾潔庭中轉少炎威厨夫僕

役各極歡欣親友枉祝者交頌吾

母之福余亦萬分

慶躍歷數吾

母誕辰從無雨露衣失容之事或前後

日皆雨而本日總晴是日同署諸公公送清音一部堅辭不獲已也次日謝壽在朱蘭友同年處遇見給事中卿

培廣西人樸質有書氣雖有車而無跟僕向蘭友借書一

函自攜登車而去其風趣可想聞其居京用度極省概不酬應一年只須三百金為京官者皆當取法

二十七日同鄉楊氏遣人報知質堂水部作古大為驚駭前十九日質堂尚在余家飲壽酒豪興勃發也余書楹帖

輓之曰宦轍名場五十年壯志銷磨燕邸二難驚弱一程兒幼女三千里歸途跋涉鸞幃孤影慘成雙蓋質堂為楊

封翁之嫡出子余表姊丈也文才頗優應試屢黜為水部主事二十年未得補缺子女幼弱妻妾熒嫠而其庶出之

兄靜巖比部掇科名其子

希銓

又登翰苑洵人各有命云

八月十五日刑部送閣四川省民婦曲盧氏毆死伊夫出

嫁之母鄭楊氏一本川督以毆死夫之嫁母例無治罪專條若援照毆死夫期親尊屬律罪止斬候應比照雇工毆

死家長律問擬斬決刑部議以查例載義子過房在五歲以下恩養年久或十六歲以上曾分有財產配有家

室若於義父母有犯毆罵即同子孫取問如律義子之婦亦依前擬歲數照本例科斷其義子後因本家絕嗣有故

歸宗而義父母無義絕之狀原分家產原配妻室不曾拘留遇有違犯以雇工人論又雇工人毆家長死者斬立決

各等語此案曲盧氏係鄭楊氏後夫鄭泳洪抱養義女配與鄭楊氏隨帶之子曲已娃為妻嗣曲已娃因曲姓無人

攜妻歸家另住曲盧氏仍常至鄭楊氏家暫住鄭楊氏令
盧氏洗穿蘆蓆未允鄭楊氏向毆曲盧氏用斧毆傷鄭楊
氏殞命查曲盧氏先為鄭泳洪義女其嫁與鄭楊氏前夫
之子曲已娃為妻復係鄭楊氏為之婚配曲已娃亦曾隨
母改嫁同居撫養旋因本生無後夫婦一併歸宗實與義
子有故歸家原配妻室不曾拘留之例相符自應照例仍
以雇工人論應如該督所題曲盧氏依雇工人毆家長死
者斬立決例擬斬立決

是月為同鄉應京兆試諸君接場主人八人方伯蔣繼勳

編修王家相刑部主事楊景仁及其子編修希銓戶部主

事屈廷鎮候選兵馬司副指揮屈軼候選知府俞烈及余

也楊希銓以內簾官未到此為吾鄉相沿成例本科有創

議廢此舉為各請之說者余不可

本月二十六日係余誕辰余歷來謝客不備麪惟翁二銘
程心宇兩君先期宿余家不便卻之留欸夜飯此數年來
余誕日從不在家惟本年值休沐之期亦難得事也

九日初一日到吏部商議同年周鶴立補缺事周吳江人

大挑一等親老告近改掣安徽奏署蒙城縣繁缺未實授

丁憂服闋以母老仍赴安徽省於二十一年九月到省委

用至今已二年矣安撫奏署定遠部議不合例經內閣票

擬雙簽進呈奉

特旨准其署理部議猶以其服闋文結雖已到部而現在行查
有無次丁尚未准其起復將欲另摺具奏余謂即應行查
亦應於初起復時即辦何至遲待兩年之後尚未查明且

奉

旨准署有何格碍難行而必執不合例之說以奏駁乎其議遂息

是月初五日明相國遣使至余寓面詢余明日到署否如到署則相國有面商之事余問其中堂何事到署則云實無所事窺其意殆欲余至其第中面談而未便直言也余對以俟署中公事畢後當於午刻親詣第中謁見詎意次早卯刻到署而明相已先在署等候余隨到政事堂參謁蒙諭云本約今午屈到敝寓因恐公事繁劇不敢勞動特親至署面商袖出進呈頌冊稿屬爲商確妥善其意十分摛抑向余作揖稱謝至再以八十五歲出將入相襲封公爵之大老而精神周匝謙光下逮宜其福壽無量我輩後

生小子動輒驕倨真該媿死迨後余爲商安繕正送看呈進特荷酬賜內造繡囊貢綢袍褂等件長者之賜弗敢固辭庚辰四月余擢任山西河東觀察相國尙坐車親來枉賀蓋家貧不能坐轎也并面獎曰山西地方得子如此體面人去真便宜他們且感且愧計余在署追隨相國數年見其年登耄期而蠅頭細書之四六章奏朗誦不遺一字上馬下馬并不須人扶掖何異伏波翁哉我

朝大臣中絕少驕矜者就余所見如慶太保董太傅王文端伯協揆諸老皆謙抑可風聖人云如有周公之才之美使驕且吝其餘不足觀况等而下之乎謙卦六爻皆吉君子當守以律身

彭公

浚 聶公

鎬敏

同來懇余爲呈進冊頁附內閣同遞余

以兩公俱由開坊翰林大考奉

旨改部之人新例部員不准進冊兩公以現在候選尙未補缺無衙門可歸而以前曾蒙

恩簡任講官欲效媚茲爲詞余不敢遽諾囑其轉請曹中堂示商辦理次早問曹中堂云已堅卻之矣本衙門定於十五日恭進九卿等頌冊而十三日

御門善慶補授通政使司通政使善係正詹其冊歸翰林院進今轉官曹中堂諭歸內閣彙進而內閣奏摺名單甫行繕竣今以一人改除要換八十餘員官銜名單且係黃面紅裏之摺各中書能繕此摺者甚少只得連夜改換屆期至宮門外恭交 奏事官收明數日來因此事勞累殊甚呈進後始釋重負是日丑刻在 乾清門外月色中見江

南主考帥少寇回京復

命因告余曰場中見內簾房官署昭文縣令杜昭詢知

師母起居甚好已作請安緘卽交杜令帶呈又以未中余

胞姪豐玉爲歉并云杜係君之同年君知否余答曰不知

蓋余從來不與本邑父母官通尺素也

同署李樸園於進冊之後候

旨延佇較余遲數刻始回署向余述本日各省呈遞貢物有廣東省進貢翡翠字七言對聯一副甚爲新奇寶貴而余以先出未得見

二十八日辦江蘇等省

勾到簽是日五鼓大風至辰初稍息未刻後風勢又作陰霾竟

日

本日江西考官中書李彥章回京復

命

十一月初二日到

子諡文恭前太傅大學士董公靈前行弔奠禮

薛畫水前輩來辭行稔余素患不寐贈一方云用洋參整枝者開水泡俟水色黃傾去貯磁碗內糯米桂元肉襯底飯鍋上蒸以黑為度再將姜汁少許拌之晒乾切片每睡時噙三五片生桂元肉一枚俟濡軟後和津嚥之立時睡熟

蔣簡圃來述及其尊翁年八十二歲於上月廿六日患紅白二痢諸醫以年老不敢用藥勢甚危險適吳霽峯中丞自豫來京言張牧村觀察年七十餘去年患痢幾危用紅

白淨糖各一兩和勻清水兩飯碗熬至杯許服之見效簡圃遂如法治之一兩服後其尊翁即大愈云係海上方也簡圃又云詢之王定九少宰囑其尊翁病時喫煮極爛豆腐用蒜泥蘸食并用高糧炒黃開水沖炮當茶飲之定九名鼎陝西韓城人醫推名手現為尙書軍機大臣

十二月十三日內閣京察過堂午初軍機大臣事畢後托首揆及戴協揆到署在政事堂偕明曹章三相公同酌定余幸列一等向例漢侍讀二人俱保一等托相以聞人侍讀在軍機行走深知其才具光景不肯保送各相以向例為請托相堅不允侍讀不保一等實從來所無也歷來侍讀兼軍機行走者事事占先今獨反是余益滋媿此外一等四人典籍李光庭中書李昌平魏茂林袁紹安先是托

相不稔外間差使勤惰祇就人之儀貌察看點出中書陳

詩陳汝庚二員向各堂商酌余回明該二員係散走之員

平日毫無勞績不足以示鼓勵托相乃改換李昌平袁紹

安李嘉慶六年進士明白勤能久任委署侍讀兼充軍機

章京最爲公允袁嘉慶十四年進士明白出色資較李淺

而差亦勤凡此等地方閣讀一官最爲難做迎承相意則

輿論不平據事直言則謗私紛起余惟不避嫌怨秉公行

之幸上下鑒諒帥仙舟先生嘗謂余曰君領袖薇垣數載

聲名甚好可見向來人言非盡無因否則何以獨不聞有

訾及君者耶丹徒陳舍人書會一日在園中直房向余曰

凡人總未必能背後人人說好獨老前輩則合署同僚人

人皆背後說好實在何以能之余自揣生平心直口快每

多得罪之人若遇公事則尤不避嫌怨必揆情度理期於

允當而後已卽有時良友請托情不可卻亦必審慎行之

無妨公道世有一概聽情卒致所袒之人轉受其害者比

比皆是其始恨余而終服余者或因此耳

本年自開印至今無日不見星而起到閣辦公幸封印稍

可休息乃本月廿五署中供事來稟

頒賞

御製戊寅再舉東巡展謁

三陵大禮慶成記八十分連夜趕辦謝

恩摺傳知各該衙門於二十八日同時進內呈遞

二十七日五鼓到署爲何陶兩舍人行銷假文書蓋年內

銷假到閣者明年新正

單恩方可邀

封典歲除日到蔣丹林副憲處看慰之本年都察院京察有滿州御史色某者年老艱於拜跪填入有疾文冊已送至吏科續又將其改入三等為給事中李振祐所劾奉

旨交軍機大臣查議得實請

旨交部嚴議吳芳培蔣祥墀等俱降官 吳與李給諫之父頴

園先生同年同房交契素厚人有議李欲得京察未遂故有此劾然公事公言無妨直道為大臣者不可從刻亦不可過寬也

二十四年己卯五十歲

本年元旦

特賜百官筵宴小臣於嘉慶十四年正月元旦恭預

盛典今閱十年又霑

渥澤實為平生幸事 筵係光祿寺預備數人合餽餽桌一張兼有鹿脯等饌俱係

內廷珍品自

丹墀以下至庭中兩旁陳設肴席幾滿上冪以布前墀正中設黃幄黃案案上供碧玉大酒池池中安放大碧玉杓俟任人挹注之狀是日

皇上陞殿百官就宴迭奏四夷樂舞

昭示綏懷風動之休尚書以上列坐

丹墀之上自侍郎起以次坐 墀下一品二品之級於此判

然方

聖駕將出未出時大鋪忽聞琤琮之聲正疑惑間細審詳視乃

知庭中兩旁預宴各宮領取

賜品攜歸致銅盤相擊有聲也

大鋪

敬俟宴畢徐散兩次叨

恩預宴從未挾取絲毫

初四日到浙紹祠爲內閣團拜作主人大學士章桐門早刻卽來至暮方去精神矍鑠向例前後輩到齊後俱團拜此次桐門先生爲大學士合署應執門生禮卽出衙門後輩中其門生尤多未便同拜桐門先生謙抑之至必欲團拜余力止方罷事有經權此乃權而得中也

在楊成甫舍人處遇江西鄧公攜宋板初學記五經各一部五經祇有經文無注上有甯子堅收藏圖書據云每部紋銀七十兩爲盧南石大農買備進貢用新年見此好書洵吉祥善事

十九日開印到署票擬朝鮮琉球兩國賀表向例開印後數日恭進朝鮮表章一元旦一冬至一歲幣一

萬壽聖節其表四道元旦長至

聖壽節俱另有方物表及

中宮狀此每年定例也今年以

皇上下旬大慶另添一分賀表及方物表

中宮狀故須分別票擬特飭供事到 國史館檢查乾隆五十五年

高宗純皇帝八旬萬壽及嘉慶十四年

皇上五旬萬壽

絲綸檔兩本比對斟酌擬簽進呈琉球國則賀表並非年年有也

回明各中堂挑派中書十員兼管

年譜
卷上
誥勅房及中書科事

本月廿六日 京察京堂各官引

見奉

旨宋鎔徐如澍各予原品休致皆 先公同年也因往看之

吏部京察過堂之日余因在署辦公不克分身前往移文
知照吏部

二月初三日卯初進

乾清門外聽候排班引

見黎明時托中堂向余諄囑曰少頃口奏履歷聲氣母太高亦
勿匆遽須從容朗背其意期望甚切此老秉心公正部僚
中或過事趨承必鄙而抑之若辦事認真結實則心默識
之遇事賞拔者屢矣余在內閣當差與軍機中堂形迹更

疎不知何以垂關至此辰初二刻在

乾清宮丹陛引

見余爲漢官 京察一等人員之首列余前者祇滿洲侍讀裕

泰一員頭班五員三四五皆翰林院侍讀中允贊善也謹

遵相訓小心奏背及全牌

發下頭班只記居首之裕泰一名本日一等八十餘員記名者
僅二十員

刑部題本有湖北天門縣乞丐彭某年三十三歲忽於廿
一年蓄髮穿耳改扮女裝捏名張么姑娘圖姦拐婦女并
曾學習符咒爲人治蛇咬傷哄騙錢文同行丐婦及鄉民
賈氏俱被姦宿經河南省看出盤獲援律問擬絞候部議
援照十二年邢某之案改擬絞決竊思以三十餘歲之男

子忽能蓄髮穿耳改妝圖姦且其鬚鬚如何時剃供招內
漏未詳敘殊不可解恐有不實不盡也

河南信陽州牧梁君達榜戊辰進士福建人與余同出顧

筠巖師門在友人席間相遇枉拜索書因贈楹帖云連牧

心盟淮水白買隣眼向蔣山青信陽為淮水發源之地而

梁又卜居金陵也

余甲寅同年在京者日少本年在思豫堂搭席圍拜每人

分金大錢一千文到者朱珩周鈇楊惠元聶鎬方應綸

劉嗣綰敏登額張汝晦汪鑑史積賢及年姪王至桂陳登

泰共坐三席

三月初三日行文戶部預借飯銀備恭辦

萬壽經棚之用

查乾隆五十五年恭值

高宗純皇帝八旬萬壽自正陽門內大街至西直門一路陳設

王會凡各省勝景自來故事皆備瑤宮琳宇瓊樹琪花

百戲雲連千山錦簇皆淮浙商人供辦先期遣匠到京丈

量地段回南製備停安用巨艦載至燕臺按地排架不爽

尺寸復囂以呢罽潤以藻績其費約至千百萬本年十月

皇上六旬萬壽各大臣抒誠效悃奏請於西直門外起直至

圓明園

宮門外

御道兩傍三十里之長由九卿等衙門分排地段捐建經棚

座落臚祝

聖壽虔展蟻忱其各經棚不相連屬之處再由內務府發

全譜 卷上 五
帑量爲點綴彌縫俾免寂寞以備

乘輿出入

觀覽誠

慶典也內閣雖極清苦而居百僚之首理當倡率但費無所措乃移咨戶部預借二十五六兩年各官飯食銀二千兩備用旋蒙托中堂派滿侍讀裕泰及余兩人總辦其事余自笑曰我之書狀如何能辦王差然任無可諉因與裕公悉心商度幸裕公謹慎明白極能約束其家丁得以協力同心是時六部等衙門矜奇炫異花樣爭新奉托中堂面示曰我們內閣與別衙門不同當以辦事爲重不必在此等處見長也余聞之不勝欽服方且遵守此意堅持定見不肖過事粉飾詎不一月而裕侍讀蒙

恩簡授四川松茂道另派滿員一人互理其事始用法源寺之戒律僧繼改智化寺之音樂僧迨七月間奉戴中堂諭必

要添用伶工蓋以各經棚俱製備頌

德祝
釐之歌舞而內閣未便獨無也維時京師梨園騰貴時愈遲則價愈昂九月中工屆垂成滿友又仿照吏部式樣於棚後搭架蓆片假山余難以阻之連夜趕辦增費五百餘金是差供備

鑾輅經臨僅不過三日而三日中又每日不過一時許乃僧衆之費千餘金優人之價九百餘金余自咎未能擲節然竣工後總核其費較六部等衙門所省尙多方改用音樂僧時裕君與余同囑法源寺僧代邀數名寺

僧毅然拒曰不特我們不去轉邀設或老爺們自去邀來
我們僧眾見之必捲堂全散余笑問其故則云譬之守貞
婦女豈肯與娼妓共一室居耶其戒律之嚴如此儒者立
身幸勿出此輩下也

初七日本衙門繕摺大學士明等列銜奏明昨日在

午門前拆封考官本章奉

旨點派外簾官宗人府主事德喜保因病未到照例知會禮部
行文場內令於外簾官內通融辦理

貴州省奉

旨蠲免二十五年正賦十分之二例應具摺謝

恩而該省京官現無可以奏事之大員具呈畱京王大臣懇據
呈代奏由內閣繕摺附報寄 圍

內閣大堂前上年奉

旨補種之椿樹未活因請李東山舍人另擇本月初十日辰刻

易種槐樹一株蓋以槐性耐久而政事堂尤為合宜也

御史于德培參奏初七日耕藉從耕九卿皆未成禮有不

終九推而先散者有倩人扶犁者奉

旨交畱京王大臣查明交吏部都察院嚴加議處旋經畱京王

大臣等傳集從耕九卿詢問尙皆終九推九返之禮因繕

摺覆奏

十六日夜亥刻月蝕自下弦起直至上弦全行食竟月暗
無光如紅丸一個為黑影一規罩住而紅丸之中時有黑
氣旋繞不住約三刻許始從下弦透出一絲光影向所未
見也

十九日在浙紹祠為同鄉會試諸公接場主人楊景仁及

其子希銓屈廷鎮及其子彥深龐大奎王家相蔣繼勳及

余共八人客趙同春翁心存程定謨張應星龔榮鄧復讚

屈廷鉞周榮鼎吳廷鈺江之升錢毓麟蔣庸蔣共十

三人

為屈侃甫集漢隸書楹帖贈之句云坐擁郡國圖經大觀

勝竟家禪風騷體則小霸宗盟

四月初八日揭曉會元費庚吉武進人據其同鄉云其祖

甚有陰德家本素封好施中落曾欠糧銀官符火急將媳

金簪質庫為完糧資行至半途見喪家貧不能歛即以所

質付之空手回向媳述其事媳云如此亦甚好但質票可

還我其祖檢橐并票失去媳乃另取他物付質庫俾免追

呼媳即今會元母也蘇舍人應珂亦籍隸武進為余述如

此吾邑及內閣本年俱脫科內閣應試者向以鵲巢為

驗巢巨則出鼎元甲戌丁丑兩科狀元龍汝言吳其濬皆

中書也本年鵲巢於將成時忽拆去宜其脫科但內閣後

門樹上從無鵲巢今年忽有一巢見者異之豈移於後遂

於署中無相涉耶

同鄉新進士蔣廷恩

朝考第二以六十八歲之人尚能與英俊角勝亦大可喜引

見

特用內閣中書至余寓謁見執後輩禮甚恭方其有聲壇坫余

尚在襁褓聞今大寇韓桂舫先生進學係蔣廩保而韓駁

歷中外久任尚書蔣則踰躄四十年筆耕餬口今始一第

仵列清班功名遲速不可強如此

本年庶吉士散館清書列三等之強

望泰

漢文列三等之

趙榮俱奉

特旨改授內閣中書趙書法極工因詩中誤筆出韻遂置三等

第一庶吉士散館用中書自此始

上面諭諸大臣曰趙榮改用中書並非因其父趙秉冲曾任內

廷侍郎念其祖死於

之難強望泰之父死於滑縣之難

俱爲國家忠臣故特加恩改用中書爾等勿謂中書一官不

好前此孫士毅及現在之章煦俱由中書擢任大學士其傳

諭趙榮等務當感激朕恩等因欽此仰見

聖主篤念忠良至意凡在臣民皆當欽感

滇省候補同知同年王

鼎文

歿於任所余旣唁其令嗣

至

桂復爲出知單懇先後各僚友從重致賻交其世兄攜往

爲扶柩之費余亦竭力相助幸得四百金 王同年金陵

人字勉之在閣行走十有六年與之相識者無論親疎遠

近交口稱道其能全陞侍讀王卽擬陪因外用在前值滇

省請挑遂入選然非其本願也家多道累衰親弱眷留京

度日尙難安能回櫬余情惻於中勉爲籌畫幸其令郎已

成孝廉將來可紹前烈

五月十八日在署出知單知照三品以上大員合辦恭進

皇上六旬萬壽圍屏

六月中偶過廠肆攤上以錢二十五文買得抄本新荷異

授仙方一本檢視知尙缺一本未知可續買全帖否李樸

園典籍以近詩見示因和其韻作卽事書懷七律二首復

再和其韻三首翁二銘孝廉亦和二首朱黼堂舍人亦和二首皆指近日署事二銘復和韻六首又示苦雨詩六首除余自作詩已刻吾面齋集中不再錄第錄同人諸作於後

楊鎮源

張星晃朗麗長庚七寶莊嚴海月生慈竹春深鸞尾潤高桐蔭密鳳巢成橫渠筆秃三千管博望槎通九萬程視草歸來揮逸翰惟將鼓吹答承平
濃薰衣染御爐煙領袖清班導路先磨角細書窺汗漫稀膏神伎運方穿開簾偶拄看山笏伸紙難停下水船會得指禪非說法何須成鏡更磨磚
蜜房辛苦釀黃蜂花樹親栽地不童懷抱幾人窺朗月奉

揚他日憶仁風題名雁塔尋常見接武龍門咫尺通卻喜袖中滄海納衆山高下傍衡嵩

身儕清貴愧儒書棲集同條別苑枯瀑直仍如寒豹隱舐

豪空學亂鴉塗羹香每憶分吳鱸前年假館第中鼓叩偏勞拂

海鳧閣下傳餐羞伴食酸醎難近列仙厨入直諸公各以已資具早饌惟

窮措大則事畢先歸

袁紹安

視草鴛庭閱兩庚先生在署二十年朝朝染翰朵雲生中書獨領

官非冷上考頻膺績有成先生兩次京察一等信是燕公諳故實不

從柱史問章程天書式有未協者經先生隨時更定秋風莫漫思鱸膾先生

以堂上齒尊長有望雲之思爲掌絲綸答太平

倚籬連裳向日邊班資徒占百曹先葫蘆依樣頻年畫芍

葯當堦幾輩穿惟看往來馳禁馬莫將利濟祝天船黃麻
草罷催宮漏細數駒光過八磚

故紙長鑽笑類蜂眼看堂吏半頭童珮聲冷帶池邊月鈴
語喧聞閣上風愧我三千陪未隊憑人六萬見神通年來
報稱江郎管簣土何曾補嶽嵩

同受 堯天雨露濡休將寸草計榮枯鱗堪橫海終乘浪
蹄可追風莫問途三殿簪豪原小鳳六年秩滿亦飛鳧此
閒素有調梅手皓首欣看飽 御厨桐門相國由中
書海升台輔

陳運鎮

盡日衙齋似守庚素絲不覺髻邊生卷中松鶴情偏戀有種
松調鶴江上蓴鱸計未成薄酒微醺多妙理新詩自課亦
嚴程廿年驅馬東華路飽歷升沈意氣平

幾人勲業上凌煙騏驎何妨駑馬先其羨旋風摻大筆閱本
擬簽日數誰能炙轂運方穿京察屢列一等菊松滿徑成

陶宅書畫圍身似米船所藏圖書甚富卻惜鳳池歸緩緩日移槐
影遍花磚

退衙蕭散比游蜂硯水琴塵課短童傾壁有聲愁聽雨寓舍
有圯于望門無刺懶趨風益為小沼輕條聚竹當疎簾乳
燕通累世清才高藥省尊大夫初亦固知江左有荀崧

倪迂畫法米顛書詩仿蘇黃格不枯夢繞吳門忘遠道夫太
人不樂就養身依 禁署是夷途嵇家愛養軒軒鶴諸郎
尚居里門 屈子寔為泛泛鳧先生遇判罷五花翻一笑蓬鹽何似

太常厨入直食具
頗草草

朱璜

慶逢大衍歲先庚壽世才應間世生雨露
 新恩三接近
 雲霞麗句八义成濯人秋水曾推李坐我春風喜侍程健
 筆真如華岳峻俯看羣唱萬山平
閣長詩包羅萬象和章雖琳琅滿壁持較甚平

矣平

井梧一葉報秋庚似水流年白髮生惟仗匠心雕木朽但
 經仙手點金成瑤壘山鳥驚鸞彩蹀躞駿駒步驥程風度

曲江朝野望不煩簾肆問君平
前月曾有術者謂閣長官至八座

一枝斑管灑雲煙後輩人人快觀先簿領多於春筍束詩

心巧擬綠楊穿
閣長一面擬吟詩神妙得未曾有 詞華艷麗三株樹

魄力沈雄萬斛船公輔經綸才子筆愧他學士負花磚

書聲鳥語館玲瓏
閣長書齋顏曰書聲雜鳥啼館掃地焚香侍短童佇見

鴻猷承 湛露豈容臚膾憶秋風
閣長氣度閒遠每有午橋綠野之志 每行

翰墨三真妙餘事丹青六法通領袖清班聲價重水之江

漢嶽之嵩

讀罷新詩字字珠幾回欲和笑腸枯秋蛩細響低頭語春

蚓斜行信手塗西掖清晨欣伴鳳 北堂華誕喜趨晷
是月

為伯母太夫人壽辰 鰕生預計稱觴日飽飫郇公美膳厨

翁心存

玉漏遙傳乙夜庚蓬萊頂上綺霞生鳳池清切三霄近鴻

筆紛綸七步成領袖久為黃閣老歸心只戀白雲程故山

梅信應相待遮莫多情動廣平

墻角垂垂掛盜庚高齋野趣自然生編籬樣比前年巧栽

竹陰看上番成退食焚香時靜坐課兒學字日分程從來

大隱如君少休更歸山羨子平

絲綸閣靜帶祥煙地接蓬壺得氣先天上卿雲輝萬象人
閒砥柱導三穿裁量每秉中和尺津逮同登大願船恰喜
聖朝無闕事尋詩緩緩步宮磚

昂藏官作折腰蜂祇合雲中拜玉童紅葯花翻心捧日
黃麻草就腕生風張來廣樂鏗鏘奏坐到靈查曲折通真
箇去天三尺近壽山高處聽呼嵩

君典其事

新詩爛漫五雲書味白清腴筆不枯探得驪珠明顆顆垂
將仙露潤塗塗盤香篆字縈銀鴨流管招商唱玉鳥臙馥
殘膏沾丐遍絕勝一嚮飫天厨
牙籤錦暉散如煙博識當今讓茂先過眼十行看葉掃精
心百步見楊穿清芬人入芝蘭室秘翫家藏書畫船座上

自來無俗客不妨寒具設方磚

埋首啜他故紙蜂前身原是侍香童高情嚼遍梅花雪逸
典招來海鶴風文字因緣小遊戲林泉位置大神通何當
共拄仙人杖鎮日追陪躡華嵩

枉讀司空城旦書三年飢走硯田枯狂來自射劉蕢策窮
到仍循阮籍途涉世勞勞轅下驥浮生泛泛水中鳧長安
索米非容易慚愧馮諼食上厨

程定謨

壓倒才人李夢庚
流將出細把工夫鍊得成卻愛湖山頻夜語為憐風雨阻
秋程同鄉我最相依久知道君心水樣平
騷客寅年巧歷庚瀛籌五十紀崧生紫芝器宇千人見黃

閣文章一手成鶴骨自應多得壽驥材未許早回程笑看
人海如漚泛身置雲霄眼界平

福地深藏綠樹煙

福地煙霞君山房匾額也

著鞭不羨祖生先豔侵簾

影花新蒔香上堦痕筍細穿退食偶斟陶令酒浮居半仿

米家船從來人物歸平淡笑把詩心付研磚

花院敲碁僕盡工篇分滂喜課奚童

君僕皆善奕又每以書法課家童

其

心皎若孤懸月此意翛然大雅風定字久推鴛掖長趨朝

長待鳳城通歸來讀畫雲山滿趣永田家愛戴嵩

六上長安笑故吾一番磨鏡一番枯渴來屢下陳蕃榻此

去寧遭阮籍途

君爲子籌行囊纖悉必周

客夢未遙仍企鶴文心欲瀝

自慚鳧老饗慣記郇公譽香味三年飽上厨

秋字冥濛不散煙君教移榻得幾先雨聲掀屋三更圯天

影當空四面穿奇絕詩書仍插架險於波浪欲傾船劇憐

窗外歲蕤竹片片青痕盡壓磚

卅年詞翰愧難工聊寄吾生比菟童話舊更番愁夜雨噓

枯積歲受春風親因容易參三昧

楞嚴經救護親因度脫阿難

福命居

然卜半通記得編年先子集

先君於乾隆庚午出都赴豫有句云可憐稚子才三歲不

省流離只問家稚子謂先兄守樸流離無奈向河嵩

高歌吾已得新吾一劫風吹鬢未枯但使妄除天外想不

知危歷世閒途游蹤戀壘同秋燕心事隨潮若信鳧自笑

青瑣無一片偷兒底事欲登厨

旬日內偷兒兩番窺伺

萬縷情深繫柳煙依依真在別離先翻嫌驪唱催人速宵

斷魚書使眼穿秋水性靈藏劍匣春花意趣憶觥船祝君

一語應歡喜秘篆千秋得古磚

恂恂二子課兼工多慧何慙任氏童案有縹緗勤世業衣
無綺繡儉家風巖稜兩代鴛池峻雲翮雙飛鳳闕通請老
優游他日事定臚冠蓋慕蕭嵩

鄉情因甚屢支吾為憫西華手振枯謂王山孝廉高義薄雲傾

我輩多情載月滿歸途盟堅春渚思尋鷺影裏秋衾對尺
鳧欲報銘心慚句劣莫同書畫列籤厨

鹿樵前輩招飲卽席奉呈

李光庭

春光到處是瓊筵風雅于今屬茂先紙上煙雲評海岳李東

山前輩攜米元章墨
跡冊子來辨真贗篋中卷軸出瑯嬛畫圖品自兼神逸
畫家以神品爲
上逸品次之酒味醇無判聖賢畢竟主人能愛客夕陽

纔下燭光然約不繼燭
未免破例

作意佳肴盡旨甘獨醒人亦喜沈酣主人素不嗜飲
此夕酒興甚豪蓴絲

莫漫縈張翰木耳偏宜餉李聃嘉肴羅列惟菜羹
白木耳二味尤美廿載春

明空夢夢半窗花韻尙穉穉歸來剩有頽然醉畫理詩情

愧未諳

附錄苦雨詩

翁心存

四面雲頭閣不流闌風伏雨幾時休直傾萬斛天瓢水併
作連宵薊樹秋幾處鐘聲猶帶濕無邊煙色迥含愁人閒
咫尺應難辨擬泛靈查問女牛

撥盡銅爐一炷煙力微敢擬補天穿漾開簾額波難定滴
碎蕉心夢不圓自古悲秋惟我輩而今聽雨況中年破書
殘篋牀牀濕獸客情懷倍可憐

漱灑平堦水一窪飛鳧拍拍以爲家浹旬只恐生禾耳三
尺多應沒稻花永夜虛堂盤蝙蝠衝寒殘漏學蝦蟆明朝

斗米應增值歎息吾生未有涯

冷氣陰森徹骨寒秋來始覺客衣單被池綿薄裝仍綻簾
角嫩生熨不乾乳燕巢空求食急飢鷹翅重欲飛難庭前
菊蕊伶俜甚雨打風吹不汝寬

從來塗淖說江鄉如此愁霖未慣嘗無數水衣多透榻有
時蝸篆亦緣牆若爲桃梗嗟微命欲療河魚少禁方自信
泥中吾有分故園秋色莫荒涼

年時綺席倒金樽秋雨秋風憶白門連日心情如中酒懷
人況味最銷魂附書南國憑潮信翦燭西窗認夢痕北巷
東隣車轍斷寸衷脈脈與誰論

七月初六日夜半大雨傾盆余寓中東書房一楹塌倒向
日程心宇宿其中因先一夜有偷兒窺伺余屬心宇於本

夜移榻扇閉較嚴之對面屋中而僕人曹升仍宿東屋據
云黑闇中似有人從睡夢中拉之出者甫至中堂而瓦解
牀碎矣奇哉數有前定而鬼神之相在爾室也尤異者藏
書三架靠列後墻墻從架上倒過而書全無恙架僅微損
真大幸事時心宇將歸余書隸對贈之云萬卷課兒心自
足一官醫俗夢俱閒頌其自此得補學博可無求于人且
余日夕軟紅見人之爲教官者心頗羨之而不覺情見乎
詞也

十九日 母親壽辰同署諸公送清音雜劇各一部承
辦內閣

萬壽經棚之金玉部潘姓亦送清音三部樂工更番迭奏是日
天雨連綿座中諸客傾耳之餘轉覺披襟增爽

八月中刑部監犯陳溥應入本年朝審情實而在監自縊
奉

旨提牢司獄等官俱革職內刑部候補主事馮思澄係甲戌進
士人頗勤能向例得提牢一年卽補實缺馮資格最後越
次派充誠爲便宜忽有此意外之處分刑部原奏祇請交
部議處奉

特旨革職於此見凡事只宜守命安分不可但揀便宜路走也
後馮復以他績改官內閣中書

初四日報到奉

旨諭知雷京王大臣等

聖駕行至喀喇河屯已進卞倫門距行宮不遠所乘之騎前蹄
偶蹶以致墜騎

聖躬一切平安惟右臂微痛旋令蒙古醫士按摩痛卽漸止次

日安抵避暑山莊諸事照常等因當卽恭摺覆奏

原任大學士勒保於十二日亥刻病故由內閣具摺恭報
旋奉

旨封爲一等侯俟伊子承襲時改爲三等侯卽給予諡

二十五日隨同江南同鄉諸公在內閣大堂前跪遞恭謝

寬免積欠

鴻恩之摺

二十六日余五十初度余向不自壽而同署各友公送金
玉部黎園在浙紹祠爲余稱祝堅辭不能況余卯出申歸
安能偷閒相就迺到署避之而諸君殷殷相款之意并筵
席代余設辦逕至其地演劇開樽以待并不要余費絲毫

不得已於退直後赴領盛意帥仙舟少司寇曹芸浦少司
馬何硯農太守齊秋颿觀察朱堃雲山人皆來枉祝同鄉
相好如翁二銘等則皆在余寓中宴集自揣老大無聞良
深愧怍繆薇初舍人贈余壽聯曰預話蓴鱸高品格閒圖
松鶴小神仙蓋知余有歸省之意曾繪種松調鶴圖也
九月偕同署諸公到勒文襄公家行祭奠禮
顧渚茶舍人英自烏魯木齊戍滿回京卽往看之喜其面
目如舊然邊沙萬里忽忽已踰七載同是昔年薇垣聯襪
之羣而以我較之已勝語云退一步想海闊天空渚茶尙
有老親在家也

二十六日

皇上

皇后自園回宮一路

觀看經棚點綴

小臣大鋪

先在本衙門棚前站班伺候迨

皇后經臨時謹遵

旨漢官皆退班

南掌國王召蟒塔度腊新襲父職叩關請

封進貢並遣使祝

嘏其貢物有馴象等件非如朝鮮等之有年例貢敬爲擬發進

呈

是月廿六日爲大學士六部九卿等進恭祝

萬壽冊頁共三十八函二百三十九本

章蘭臺親家之太夫人七十正壽余寄壽聯云子舍蔭慈

雲看西曹譽望南國屏藩共仰金闈承懿訓孫枝輝列宿

正東閣梅開北堂護麗遙擎玉笋祝長生蘭臺現署楚藩
其弟質甫官比部其子瑄香官水部

初六日丑刻在

太和殿前隨同百官行三跪九叩首禮恭祝

皇上六旬萬壽

十三日丑刻到

經棚內曹中堂已先到片刻矣寅卯間

明中堂托中堂曹中堂三位次第到齊辰初

皇上自園回宮各中堂在棚外石道旁跪接

聖駕

鑾輿經過內閣棚座所供佛像之前

皇上在輿中俯首合掌仰見

聖天子敬神如在之心小臣大鑪等跪於棚前在各中堂之後

敬俟

駕過退班旋奉

恩旨各經棚內俱

頒賞銀兩當卽繕摺恭謝

二十日武

殿試傳臚

皇上陞殿後武狀元及探花俱未到因進去稍遲至

皇太和門

皇上已升座樂作門官不准其再進去是以遲誤旋奉

旨將二人革去一甲一名一甲三名作為武進士罰停

殿試一科俟再隔一科令其復行

殿試卽將榜眼作為一甲一名授職頭等侍衛功名已得而

復失由於自取凡趨公應試可不慎之又慎哉

前一日夜間余在家見北方一帶天有紅光次早進署方知是

西華門內文穎館災延燒館屋三十二間

皇上及

阿哥俱起來本日將該館值班人等交刑部審訊所有治河方畧等書本盡行燒燬無存曹中堂係總裁云要自請處分

本年恭值

皇上六旬萬壽各省秋審情實人犯俱免勾乃二十三日奉旨將甘肅虧空案內數至一萬兩以上逾限不完之知縣二人斬決并刑部堂官俱猝不及知

聖裁獨斷真不可測謹查是案虧空之員甚多各予監追勒限完繳若每限能稍措繳些微

聖恩卽從寬貸然所欠愈多則所限愈寬此二人限屆已滿而絲毫未繳或云恃本年

萬壽免勾之

恩遂不上緊設措詎知

神武燭照如此耶其同案犯官有數逾二萬兩者勒限轉寬恭遇

今上御極

覃恩免追肆赦真乃有幸有不幸云

二十七日到思豫堂爲軍機大臣戶部尙書盧南石先生祝壽因不收分金祇送鑲玉如意一柄南石先生本年九

月三十日六十正壽奉

旨俟

萬壽後於本月二十四日爲其
賜壽稱慶故各官以次申祝也

十一月初四日內子誕辰同鄉王藝齋侍御翁二銘孝廉
等俱來稱祝往年此日余總在署客過不克相陪本年值
長至節前三日齋戒期內不進本章故余得在家與諸親
友談讌竟日真難得之事也

十二月禮部具題二十五年元旦禮儀本聲明明年正月
初四日

皇上親祭

祈穀壇正月初一日應齋戒起向例齋戒期內不受朝賀欽遵

嘉慶四年

諭旨請

皇上於祭

壇之次日初五日

升太和殿受百官朝賀

十三日接家信知元興姪於十月十三日病故此子讀書
作文俱好爲吾家之秀深爲悼惜隨作家信致何氏三姊
囑其諭勸元興姪媳蔣氏節哀以撫養嗣子成家立業庶
使亡姪瞑目於地下吾家節母謝太恭人卽是榜樣
是月在署領得

覃恩誥命二軸

先公於御史任內已得五品

封誥原無藉余之封贈惟余照例應得二軸敬念品級雖同而

侍御與侍讀

制誥迥異是以仍爲

先公請贈

李二尹

再洪

自貴州來帶有李氏四姊信一件并寄余山

羊皮袍褂統一副及賜兩兒瓶袋扇套各二事以遠別四十年之姊弟相隔幾萬里之程途而情長意重欣慰之餘良增感喟每見人家手足之間衡宇相望可以不時過從當春秋佳日或堂上壽辰骨肉團圓奉觴稱慶洵爲家庭樂事若余與四姊自幼分離見面莫必前此曾挈兩甥回常省親而先公已不及見余又遠宦京師不能握手一語在京尙有便郵可以通信自余從河東返里後距二尹帶書之時歲月如流忽忽已十有餘載曾未再通一信究不知其現在生死存亡如何言之痛心

二月初二日早天色昏昏日初出高數丈時余坐車向東行走見日氣濛濛輪外無芒宛如月落景象心甚異之十八日天極寒余於署中公事畢後衝寒到海淀爲戴可亭年伯道大拜喜

十九日午後自署散後卽到宴滙堂赴朱黼堂舍人之招酉刻回家忽頭眩目花胸次作惡用靈寶如意丹取嚏後轉出冷汗不止幾致危殆幸嘔吐後漸就平安並未告假祇歇班一日

廿二日到

予告大學士章桐門先生處晤談片刻先生爲先伯父二聞公壬辰會試門生又與先公爲辛卯同年同官軍機內閣今年七十六歲精神充足祇因腿疾力請歸田真大

福分

二十八日接山西席三母舅信知三弟於本月初九日未刻在東場大使任所病故大爲痛惜三弟上年俸滿保薦可望升階忽有此變其爲人平日不知節儉逋負累累垂沒時又生一子並未見面後顧茫茫浩歎無策隨札致沈筠堂監掣爲之照料盤柩及眷屬回南諸事賴候補大使顧君淮甚爲出力得以安速起身余自念同胞兄弟三人幼時惟余多病且弱今強壯之兄與弟皆次第謝世獨余之孱弱孑然幸存可傷也哉

兵部具奏失去

行在印信奉

旨堂官俱摘去頂戴交吏部嚴加議處當月滿漢司員革職鎖

拿審訊並

派留京王大臣將此案提集官員書吏嚴訊一有端倪卽行具奏謹查此案連審兩月之久竟無實在消息迨後始知上次圍差於

行在兵部帳房中夜間爲人竊去而差旋時以空匣裝點交代經收之員不加檢視直至本年圍差復欲攜帶其案始破各官互相推諉釀成巨案

聖心甚怒各予譴責余之世姪山西何君甫以進士觀政兵部亦在應譴之列由於少年不更事也凡人經手當官事件無論物之巨細事之大小皆當親眼審視反覆鄭重毋得稍自疎忽致取咎戾近日人情往往事不如意輒曰運氣不好如此案之兵部收印司員以並未過目於前致捏

飾獲罪於後豈得諉之運氣哉

俗諺立夏節人各稱量可免炷夏本月二十三日立夏余稱見重一百三十斤內子一百十五斤大兒八十五斤二兒五十五斤

本月十一日報到奉初十日

上諭現在簡用乏人著內閣部院各衙門於京察一等未經記名各員內遴選才具優長者出具切實考語保送俟回鑾後由吏部帶領引見欽此

大鑪

蒙大學士曹加具考語復行保送二十八日由吏部復帶在

賢良門引

見大鑪

名在頭班第一蒙

恩記名頭班共五人在

大鑪

名後之四人亦皆記名甫閱一日

於四月初一日即拜

簡授山西河東道之

恩命向例道府缺出由軍機處進單請

簡此次未由軍機進單軍機處亦并不知有此缺蓋因本日湖

南藩司翁

元圻

來京

陛見自陳年老請改京職仰荷

俞允即將浙江按察使左

輔

陞授湖南布政司山西河東道葉

汝芝

升授浙江按察使而以葉之遺缺

特命

小臣大鑪

補授故外間不及知也是日報到已在未刻連

夜趕赴

園中朝房恭繕履歷片及謝

恩請

訓之摺比繕好漏已三鼓候至

金部
卷上
宮門啟後進內恭交

奏事官呈進初二日辰初二刻傳

旨召見

皇上在勤政殿東暖閣大鏞跪定後免冠叩謝

天恩

上曰汝江蘇何縣人臣奏蘇州府昭文縣人

上又詢做官幾年在閣所辦何事臣一一奏對

上曰汝名朕常見甚熟故簡汝為道山西省分最好並無虧空

民情又好河東道兼管鹽務汝去好為之當以察吏安民為

要臣叩頭祇謝

天訓

上以首微向外示退狀臣即整冠出方起立將退時見

上取臣摺似有

御筆標題之意寸心惴惴不知奏對有無錯悞迨出至

勤政殿東間值

召見之軍機大臣大學士托戴二公方進去即讓路趨出在

宮門外祇候半時許戴相先出告余曰頃奉

皇上面諭本日召見新放河東道張大鏞人甚好可見汝等所

保不錯并

諭及人才原該秉公保薦如近日副都統各員皆甚平庸汝等

即傳諭各衙門另行遴選保送候引見等因戴相因曰將來

得送副都統之人不該感念你耶大鏞聞之感悚交并是

日四更時雨意頗密方懼霑衣失容迨

召見時晴霽開朗尤為可喜

初九日托農部魏春松先生代領養廉并將應領之銀抵作捐加二級用

初十日劉芙初太史韓對山比部兩同年及馬元伯三人爲余公餞同席有新授甘涼觀察張君本枝亦同年也

十二日到鴻臚寺謝

恩畫押曹吏部宜方招飲 晚刻張蘭渚先生亦招飲

十七日鮑覺生先生招飲

十八日籍隸山西之何硯農太守劉員外大懿合同招飲

李東山宗政蔣笙陔狀元袁稚山舍人羅寶田編修帥海門檢討亦公同招飲

二十一日到吏部禮部兩處畫憑

二十三日程春廬先生招飲

二十四日內閣委署侍讀十餘人公同招飲

二十五日蔣雲簪起居譚芝田侍御董琴南翰林戴春溪禮部公同招飲

二十六日農部張君熊詔招飲張籍隸山西又昔年同署

交好因於席間向其挪借盤費銀五百兩每月一分息約期半年後卽本利并寄還之渠尙有另托事件余堅却之平生不敢徇私也張蘭渚先生先於余甫記名未簡放之日訂定要余現住之屋連天篷議價京平紋銀一千一百兩蓋因其昔爲 先公同官又曾爲余等之大公祖實

讓之也又向章質甫親家挪借紋銀二千兩并余囊中所存之九百餘金又在戶部借支廉銀五百兩合五千餘金方得料理出都赴任蓋自京至河東山高軌隘四套大車

不能前行只能用三套車所載少而所雇之數多盤川倍費余雖向不酬應而外面畧爲點綴已不可少外任豈易做哉

曹相國麗笙先生招飲同席者翁方伯元圻林觀察則徐林與余同日記名後余二旬

簡放杭嘉湖道余甚羨之蓋江鄉一水之近便迎養也

五月初四日挈眷起身出京蓋自嘉慶十二年十月到都彈指又十四載矣歲月磨人河山久負余本有退志此行非初願所及也由井陘獲鹿入山西平定州界直抵并垣謁見撫軍成果亭先生和平溫雅書味盎然洵滿洲中之讀書君子藩司則邱南屏先生臬司趙雪村先生俱極相得盤桓旬餘擇吉六月初七日赴河東本任時鹽務廢弛

商力告疲辦理極爲掣肘余在京卽有所聞到省後成撫軍係兼官鹽院亦甚焦心余躊躇轉輾自揣察吏安民於平日所讀之書相通尙可自勉釐務則素非所習又兼今昔不同地方各異頭緒紛雜從何理其端弊竇叢生從何杜其源一路愁思焦慮切切於懷雖前呼後擁鼓吹排衙轉不若作京宦坐破車之意氣軒昂此中坦蕩到任兩三月後體察訪求始知商疲固由賠累而叢弊總基於官僚欲繩商必先律已猶之欲飭屬必先整躬仍舊事無二致也先是余自京至省屢有人言及河東商情刁詐動輒侮慢官長余聞而惡之遇事裁抑不稍假借後察其苦累情真余慨然嘆曰商亦民也我輩做官當以愛民爲主豈容判商於民之外哉力加噢咻而其困漸蘇

河東僉商退商兩弊爲官場利藪有行賄萬金而詭詞告退者其情可憫然

國課攸關豈容徇私廢公是在良有司持正不阿見利思義加撫綏除苛派俾商人有贏無絀自然各安生理奚至詭計求退哉余出京時有西商喬應昌者浼其鄉友密懇余云其退商之事部中安排已妥祇求余蒞任毋挑斥其鄉友卽余寅好也余唯唯否否至是平情細酌如此事准駁關係合綱大局向例商力彫乏具呈本道由道檄縣確查如果屬實取具各結申覆再由道詳院准退仍責承原商舉殷實之戶代充接辦層層考核以防規避今喬應昌逕向部中說合做成機關聞其在京花費不下數萬金將本地該管之官自鹽院以下一舉而空之尙復成何事體國

家又安用設立鹽院鹽道等官耶前任鹽道威令不肅致各商刁抗成風已難整飭若喬應昌再遂私計則人人藐視上憲鹺務益不可問余故於備具公牘之外另敘紅稟申說實在情形蒙成撫軍首肯照詳咨部迨再奉部駁寅好中亦有札來勸余姑從部議余仍力持不可再駁再頂當是時余據理直爭置一官於度外幸而部中迄從余議方喬應昌之抗匿不到案也余遴選委員徐珊前往介休會同該縣傳提該縣向徐問曰大人委君此差爲調劑計乎抑真要人乎徐答以本道新蒞任此差不照例委鹽屬官而破格委我地方之員其不能將就搪塞可知不得人不敢回也該縣無奈始將喬應昌交出押解到案余卽發監掣同知收管責令照舊承辦引地毋得貽悞取咎衆商

始各懾服此事余非故負我友亦非有隙於喬在公言公
不得不顧大局耳終余任三載呈請以消乏告退者不下
數十家余察知其偽一概駁斥其實在貧乏而借引地以
營私者慮其悞公則又不待其告退而檄飭綱總公舉殷
實之戶易充迨後鹺務日有起色各商得以沾潤前任內
已退之戶又思具呈復充格於例而不准可見事在人爲
也喬應昌案公牘錄後喬應昌并於下次本省鄉試獲中
舉人是科晉省闈題係周監於二代一節喬之考作祇攢
轉文選成篇甚不類題亦竟獲雋信乎文章有神也自後
該商伺余進省迎至半途寓中親來叩謁仍懇余爲之退
商余仍力拒之

爲詳覆事嘉慶二十五年七月二十一日蒙

巡鹽部院成 憲檄內開嘉慶二十五年六月二十九

日准

戶部咨山東司案呈嘉慶二十五年五月十三日准山

西巡撫成 咨稱據河東鹽法道葉汝芝詳稱准部咨

河東商人喬應昌覬覦咸宜引地在部具呈實屬不安

本分應咨山西巡撫卽行斥革其所遺白水鎮安引地

並令該撫速卽另選妥商辦運等因遵查河東鹽務自

嘉慶十二年復商以來各商承辦引地鹽未定價錢價

較昂是以經營尙屬踴躍近因銀價日增資本虧賠遂

至多方求退新報之商無不百計求免辦理甚屬掣肘

此案前因喬應昌夥商張大亨赴部呈請歸并咸宜引

地經前道將張大亨擬以杖罪並查明喬應昌家道實

屬殷實仍令復充在案茲該商復以欲歸併咸宜引駕
迴引地又生覬覦赴京妄控大部行令斥革原屬照例
辦理惟招商維艱課運未便虛懸且恐各商紛紛效尤
致開規避之漸相應仍令照舊承充至其不安本分妄
控之咎未便置之不議應請照不應重律杖八十折責
示懲理合詳請咨部等情為此合咨等因前來查該商
喬應昌從前曾與咸宜包商王樹重爭訟嘉慶十六年
復囑令商夥張大亨赴部具呈欲行歸併咸宜韓城引
地經本部以該商呈內既稱日形疲乏則所辦白水鎮
安引地尙恐竭蹶有累引課何以又復覬覦咸宜韓城
妄逞互併之計其為不安本分已可概見應咨山西巡
撫轉飭查明該商妄控情由據實報部嗣經該撫以該

商訊無知情亦無主使情事仍請留充白水鎮安引地
商人復經本部行令嗣後如再有爭訟之處仍將該商
斥革嗣於嘉慶二十四年十月內該商喬應昌又欲歸
併咸宜引地復行在部具呈竝請經本部以該商屢次
妄控實屬不安本分行令該部即將喬應昌斥革所遺
白水鎮安引地另選妥商辦運報部查核等因各在案
該撫自應遵照部咨辦理乃此次復以招商維艱為詞
仍請留充似此圖併引地健訟之商若不即行斥革何
以儆刁風而肅鹺務且查該省各引地近日屢經咨請
更換新商更不應以招商維艱藉詞寬縱應仍咨該撫
遵照本部前行即將喬應昌斥革其白水鎮安引地另
選妥商辦運報部核辦可也等因准此查河東鹽務向

來退商必須接辦有人方准告退該商喬應昌意欲歸

併咸宜引駕迴引地前據該道查明詳咨在案今准咨

駁若照

部咨將該商喬應昌斥革此風一起將來各商紛紛效

尤赴

部呈控告退與河東鹽務大有關碍况該商喬應昌不

但引地虛懸且有應完本年課項及借領生息本利銀

兩均未清欸安得任其脫逃置身事外除飭介休縣嚴

傳外合亟行知為此仰道官吏即便查明敘具妥詳呈

請咨覆仍飭令介休縣將該商傳提到案解交該道衙

門責令辦公清項毋違等因蒙此遵查喬應昌家道殷

實人甚詭詐其於上年赴

部具呈欲圖歸併咸宜引駕迴引地

大部惟知該商妄爭健訟而不知其有機械變詐之心

若遵照斥革不特遂其陰謀詭計且於河東鹽務大有

關碍緣近年銀價日昂商人貨本賠累因而多方求退

欲革不能者不止喬應昌一人該商之所以復敢赴京

呈控顯因前次商夥張大亨爭併咸宜韓城引地案內

曾奉

大部議覆以嗣後如再有爭訟之處即將該商喬應昌

斥革之語是以此次藉爭引駕迴引地為名又復控告

希圖革商脫累當其進京具呈之時眾商各有天良均

悉喬應昌之詭計求退尙人人竊議其非繼見該商奉

准革退得遂其私則又人人竊羨其巧咸以為此後退

商各人自可主張無須鹽務衙門經理心存藐視呼應不靈所關非細今奉

大部以喬

應昌

不安本分圖併引地健訟行令斥革等

因伏思該商僅止覬覦爭告並無另行爲匪不法業經前道擬以不應重杖似足蔽辜若必革其商名設或將來再有如喬應昌之赴

部遞呈覬覦引地者

大部又將何以處之不革則與喬

應昌

之案先後不符

盡革則河東無商行鹽

國課無着轉輾思維殊多掣肘所有喬

應昌

向承辦白水鎮

安引地該商胆敢於

憲臺咨請仍充未奉

部覆之先竟置應交本年課項及借領生息本利銀兩於不問卽行潛逃回籍抗提不到

職道

現以課食攸關

飭令總商先爲代辦無如各商因其並未消乏詭計求退衆皆不允且有冀

謹信

一商與喬

應昌

誼屬連衿自

喬

應昌

退後冀

謹信

心懷不服疊次具稟是其至戚尙

然如此則衆商之各抱不平更可概見至於奉

部駁飭晉省引地近日屢經咨請更換新商更不應以選商維艱藉詞寬縱等因一節遵查嘉慶十二年復商定例凡有告乏商人必須自行舉報殷實新商來運接辦者方准告退近年雖有更換新商詳請咨部更名但均係乏商自行舉報並非官爲招充今喬應昌既不消乏又不舉商藉以興訟被革爲詞遽行逃回原籍置身

事外從此貽悞課食咎將誰歸再查節次舊商告退新商初報之際兩造紛紛互訟有經年累月未結者是以運城商情不特以充商為畏途即舉商自代亦視為畏途在喬應昌之私心不過希圖奉

部斥革並非自行告退兼可免舉報新商之累其巧詐隱情已可概見總之喬應昌一商即欲遵

部斥革亦須該商暫行承辦俟舉報接充有人方可斥退現距領發新引為期僅止一月不能尅期招舉新商

所有二十六年白水鎮安新引應請咨請大部俯念課食緊要將喬應昌商名暫免斥革仍令該

商照舊承辦倘敢故意悞公從重究辦如能始終奮勉聽其舉有接替之人即將該商遵照

部咨革退職道身膺鹽務重任為顧合綱大局起見理

合據實詳請

憲臺查核咨

部並請嚴催介休縣勒傳喬應昌到案交給委員押解來運以便飭令承辦實為公便為此備由具呈伏乞

照詳施行

為詳覆事嘉慶二十五年十一月初三日蒙

巡鹽部院成 憲檄內開嘉慶二十五年十月十八日

准

戶部咨山東司案呈嘉慶二十五年八月十二日准山

西巡撫成 咨稱據河東鹽法道張大鏞詳稱前准部

咨河東商人喬應昌覬覦引地在部具呈實屬不安本

分應咨山西巡撫卽行斥革其所遺白水鎮安引地並
 令另選妥商辦運嗣因招商維艱咨部仍請留充奉部
 駁飭等因遵查喬應昌家道殷實人甚詭詐其於上年
 赴部具呈欲圖歸併引駕迴引地大部惟知該商妄爭
 健訟而不知其有機械變詐之心若遵照斥革不特遂
 其陰謀詭計且於河東鹽務大有關碍緣近年銀價日
 昂商人資本賠累因而多方求退欲革不能者不止喬
 應昌一人該商之所以復敢赴京呈控顯因前次商夥
 張大亨爭併韓城等處引地案內曾奉大部議覆以嗣
 後如再有爭訟之處卽將該商喬應昌斥革之語是以
 此次藉爭引駕迴引地爲名又復控告希圖革商脫累
 伏思喬應昌僅止覬覦爭告並無另行爲匪不法業經

前道擬以不應重杖似足蔽辜若必革其商名設或將
 來再有如喬應昌之赴部遞呈覬覦引地者大部又將
 何以處之革則與喬應昌之案先後不符盡革則河
 東無商行鹽

國課無着轉輾思維殊多掣肘所有喬應昌向承辦白水鎮
 安引地該商胆敢於咨請仍充未奉部覆之先竟置應
 交本年課項及借領生息本利銀兩於不問卽行潛逃
 回籍抗提不到職道現以課食攸關飭令總商先爲代
 辦無如各商因其並未消乏詭計求退衆皆不允再查
 嘉慶十二年復商定例凡有告乏商人必須自行舉報
 殷實新商來運接辦者方准告退今喬應昌既不消乏
 又不舉商藉以興訟被革爲詞遠行逃回原籍置身事

外從此貽悞課食咎將誰歸總之喬應昌一商卽欲遵

部斥革亦須該商暫行承辦俟舉報接充有人方可斥

退現距領發新引爲期僅止一月不能尅期招舉新商

所有二十六年白水鎮安引應請咨部俯念課食緊要

將喬應昌商名暫免斥革仍令該商照舊承辦倘敢故

意悞公從重究辦如能始終奮勉聽其舉有接替之人

卽將該商遵照部咨革退理合據實詳請咨部並請嚴

催介休縣勒傳喬應昌到案交給委員押解來運以便

飭令承辦等情除現在飛飭該商原籍查拏外所有喬

應昌未便遵照斥革之處相應咨明等因前來查河東

商人喬應昌於嘉慶十六年在部妄控請併引地當經

本部移咨山西巡撫飭令該商以後不得更生事端如

再有爭訟之處將該商斥革在案嗣於二十四年該商

又復在部具呈瀆請併引地本部以該商屢次妄控實

屬不安本分兩次咨令山西巡撫卽將該商斥革亦在

案茲據該撫咨稱據河東道詳稱該商僅止覬覦引地

若必革其商名設或將來再有如喬應昌之赴部遞呈

者大部又將何以處之等語查各省商人赴部具呈亦

所時有本部查其情節酌量准駁均係查照例案辦理

總期事歸平允豈能盡援喬應昌之案爲據况該商旣

有拖欠課息等銀前咨內卽應詳悉聲明乃經本部駁

斥始行咨報又不將所欠課息若干分晰聲敘殊非核

實辦公之道應咨該撫轉飭該道查明該商前欠銀兩

卽行嚴追完繳以清課項至請將喬應昌暫免斥革聽

其舉有接替之人即將該商遵照部咨革退一節查喬
應昌以未經覆准革退之先即連夥脫逃置身事外該
道何以任其推卸來去自如亦非情理但該處商人既
以告退為得計亦未便遂其詭詐之心所有喬應昌引
地應咨該撫或仍令承充或令該商保商接替飭知該
道酌量情形妥為籌辦以期課運無悞並令該撫嚴飭
該道妥速辦理報部查核毋再因循致干未便可也等
因在此合亟行知為此仰道官吏即便查明該商喬應昌
所欠本年課息銀若干即行嚴追完繳以清課項至
該商引地或仍令承充或飭另保新商接替之處該道
酌量情形妥速籌辦以期課運無悞詳請咨
部查核毋違等因蒙此遵查商人喬應昌前於本年八

月間經

職道

詳請飭提來運押令照舊承辦引地業據

領引辦運其所欠課息等銀亦已嚴追完繳在案茲蒙

前因伏查該商喬

應昌

家道殷實並未消乏眾所共知

誠如

大部來咨所云該處商人既以告退為得計未便遂其

詭詐之心所有喬

應昌

引地自應責令照舊承充以為

藉端爭告希圖革商推卸者戒緣奉檄飭理合詳請

憲臺查核咨覆為此備由具呈伏乞

照詳施行

又有商人祁

天興

於余未到任之先早經告退在案惟所

舉自代之郭

俊三

屢提不到左枝右節輾轉成訟祁固消

乏屬實而郭

俊三

却被該縣計誘營私代為捏情申覆余

駁飭嚴提該縣不得已始將郭俊三交出到案隨派令接辦引地迄無異言此輩總係良民惜其受地方官之愚弄枉費一注錢財耳此與喬應昌之案一則壓以大部一則錮於縣官僉謂其必不能翻余獨毅然行之部不能不允而縣亦不敢不遵一時多余之風力各商亦從此震懾公事易辦矣余豈好為是矯矯哉

國課所在無可如何第於嚴厲之中仍寓慈祥之意有病我商者必去之有侮我商者必禦之商課督令早完而商情必加優卹務俾力量充裕不至視為畏途此我願也本年九月廿九日徵課截限之期余詳報掃數全清自鹽院以至本署庫官皆詫為數年來未有之盛舉郭俊三案公牘并錄於後

為詳明事竊照商人祁

天興

承辦潞城靈石洪洞安邑

一籤引地前已消乏告退舉報新商郭

俊三

經前陞道

詳請

憲臺飭提旋據崔

靜常

白赴

憲轅呈請投認接辦蒙批仰河東鹽法道查明該商能

否承充等因前護道正在查辦間即據祁

天興

以郭俊

三先於四月十三日經前任鳳臺縣陶令差押赴運詎

陶令旋即病故而崔

靜常

乘機串差匿文得賄頂充竟

赴

院轅飾詞投認以為郭

俊三

脫身之地崔

靜常

祇係趙

永吉

夥友一旦不用則窮無所歸况為其作夥數年家

道虛實伊所盡知現在奉查崔

靜常

可否充商其家道

較之郭俊三百不及一雖係舊夥不敢不據實具稟併

懇追查郭俊三人文下落等情當經前護道據稟檄飭

鳳臺縣確查詳辦而祁天興又以崔靜常知有行查之

件自運回籍將鄉地鄰佑通為布置朦朧出結懇請行

查鳳臺縣勿令崔靜常將無作有捏情詳充等情是祁

天興兩次具稟力證崔靜常之不可當商情詞何等確

鑿迨職道到任之時祁天興的名祁堪偕年季各商一

同稟見亦曾面稟舉報之新商郭俊三實係殷實懇提

來運接辦崔靜常並無產業等語為眾商所共聞職道

覆查卷內有總商王恒泰等奉前護道飭查具覆之稟

亦稱崔靜常係趙永吉夥商不敢冒昧承保職道復徐

加訪察輿論僉同大約與祁天興疊次所稟情形暗相

符合此職道之所以必欲提郭俊三來運接辦課務也

乃自八月初二日專差前往鳳臺縣守提直至九月二

十二日忽據該署縣顧令備文將崔靜常押解來運而

所提之郭俊三轉不解交雖稱郭俊三目下有病不能

批解但崔靜常本係在運號辦事之人何庸押解前來

尤可異者該署縣來詳所訊祁天興親供據稱崔靜常

的家道從前原不細知自他呈請認辦後細為訪察方

知他財本業產甚多係屬殷富可以充商又供前稟郭

俊三殷實原得自風聞如今細察他家產四門分析資

本沒有多少等語前後自相矛盾殊出情理之外充商

係

國課攸關斷不容顛倒了事在該署縣或聽奸商之狡飾而

職道斷不能受該署縣之朦混現當整頓之際若以重大之課務誘諸空虛之夥商承辦必致貽累無窮除駁飭該縣仍一面嚴提郭俊三到案查辦外所有祁天興退出潞城等處一籤引地茲據李商陳疑泰具稟情願接辦前來查陳疑泰為靈石縣謹飭富厚之家自乾隆二十九年充商以來辦理妥協洵屬殷實可靠現在新引已到所有祁天興退出引地未便虛懸業經職道批准陳疑泰飭令趕緊領引代運俟試辦二三年後如果實在妥善再行詳請咨部歸併立案至郭俊三未便任其詭計陰謀置身事外即使果係老病其子既能代父到縣訊供即可代父充商容俟守提來運訊究明確另擇現在虛懸引地責令

承接如此辦理庶運務既歸核實而此後奸商亦息賄脫之念矣是否有當理合詳請

憲臺查核示遵并請嚴飭鳳臺縣勒傳郭俊三到案添

差協同道差押解來運以便訊辦實為公便為此備由

具呈伏乞

照詳施行

秋七月杪驚聞

仁宗睿皇帝龍馭上賓神魂失措哀痛萬分距小臣謝

恩之時祇三闋月

聖訓尙如昨也因憶上年七月

聖駕將至熱河忽所乘御馬失足墜地豈幾先兆耶率屬成

服迎

詔郊外擇公署敬謹設

位朝夕舉哀行禮旋聞

今上繼登大寶孝思超越隆古舉措協於大公

綸音垂爲法則又足以卜我

國家億萬年有道之長中外臣民哀痛之餘同深額慶

自敘年譜稿卷上

終

琴川博文齋劉寶成刊

鹿樵自敘年譜稿卷下

道光元年辛巳五十二歲

正月遣家人吳升孟升回常恭接

席太恭人來署以

便侍養并同迎何氏三姊來晉以盡我手足之誼詎

太恭人不果來三姊亦因而不行余遂有告養之志矣

重修北門外龍神祠之圍牆全倒其餘亦剝落不成規

模朔望行香觀之不安因籌款委員修葺其費無多且係

地方官分內應辦之事本不欲勒碑誌之偶見庭中巨碑

橫臥於地意必舊時鐫刻也命匠扶而植之詎意磨礮完

好未鐫一字豈當時修理者功屆垂成而移節他省抑冥

冥中若或使之有待余來耶爰親記其事屬幕友席君書

丹刻之次年霖雨爲災新砌圍牆仍倒乃易以磚碑文公

續并錄於後

重修運城北門外 龍神祠記

嘉慶庚辰之夏余膺

簡命分巡河東既視事凡祠廟之列祀典者例得致祭而

龍神祠在北門外不一里出郭直視平原漫衍僅舊宇三楹

在頽垣宿莽中心耿耿不自安亟思修整以妥

神靈會初履任簿書旁午又河南漕政甫改商運民銷一切

轉運事宜鈎稽綜核靡有暇晷越明年辛巳三月諸務稍

稍就理始委員勘估擇日鳩工未旬而垣墉榱桷圯者

築之斜者正之窳者剔之且黝堊之丹漆之雖限於舊規

艱於經費未能恢崇巍煥而甫出郭門即遙見新廟奕奕

不至如向者之荒蕪莫辨矣惟

神興雲致雨澤潤生民厥功甚偉而茲地之特建

神祠則尤在於鹽池渠堰之仰資保障焉然商民之求助於

神者

神能默相之渠堰之淤澱頽潰者

神不能代為修濬之也所望官斯土者本恤商愛民之實心

以敬事

神

神之膏以雨而應以候也必矣渠堰之修工費甚鉅籌款匪

易余尙有志未逮茲因葺祠工竣敬誌其顛末如此并為

後之來者勸焉

請動歲修盈餘銀修改 龍神廟圍牆用磚砌詳稿

為詳請修理廟工事竊查運城北門外姚暹渠北岸有

龍王廟一座祈雨祈晴歷著靈應惟週圍牆垣向
來用土杵築每遇雨水過多卽行傾圮屢修屢塌徒耗
工費自應一律改換磚牆以肅觀瞻而資鞏固前經
道檄飭庫大使夏蔭南查勘確估去後茲據該大使估
需工料銀二百九十九兩三錢造冊申送前來職道按
冊覆核並無浮冒應請照估在於歲修盈餘項下動支
銀二百九十九兩三錢發給該大使收領除督飭趕緊
購料興修一律完固俟工竣驗收另文報銷外理合將
送到估冊具文呈請
憲臺鑒核再歲修盈餘銀兩係屬閒款並請毋庸報
部爲此備由具呈伏乞
照詳施行

運城

文廟規模壯麗當年工程甚鉅歷任修理視爲具文任聽工房
弊混以小木易巨材亦無過而問者余蒞任之初齋肅展
謁見兩廡倒塌

先賢神位露處惻然傷之奈接篆伊始百務茫然無暇修理
迨後接見屬僚詢其因何頽廢至此僉云經費鉅而無款
可籌余日夜在心飭承檢送舊時案卷詳加披閱當乾隆
四十年間其時物力豐盛迴勝今日而前運使沈旣堂先
生修理已大不易無怪歷任之束手也捐廉獨辦則力有
未能勸商集脇則罔肯響應乃創議撥款興修恐干院駁
余特自撰詳稿使之無隙可抵并一面具詳卽一面開工
又慮假手屬員及吏胥等徒滋耗費於每日午後親往稽

查一次擇屬員中誠實可靠之解州州判張誠修委之協
查但責督工不令經管支款也詳稿及碑記錄後

請用鹽池息銀修理 文廟詳稿

為詳請動用鹽池生息利銀修理廟工事竊查河東運
城

文廟自歷年大雨之後一切殿廡屋宇俱已坍塌并有全行倒

塌之處職道於上年六月間蒞任瞻謁之餘見

先賢神位半多露處心竊惻然本年二月間

憲臺按臨運城職道隨同謁

聖荷蒙

憲諭急應修整但前後殿宇工費浩大職道再四圖維

若逕派坐運兩商捐辦在運商則以向例不在運城應

考為詞誘之坐商而坐商又半多貧乏是此項工程斷

難派商修理悉心籌議查有鹽池生息一項原係眾商

捐款預備運城各項工程之用竊思工程緊要當以

文廟為先現在息銀存有五千餘金並無別項開銷與其按商

分派曠日遲久何若動用現成款項即可剋日興工况

鹽池生息本銀原係商捐現在息銀仍由商出即與捐

修無異且查河東宏運書院膏火一項每年即在此項

開銷今修理

文廟尤為重大應請即在鹽池生息項內支用職道現已帶同

解州州判張誠修親往確實勘估共估需銀二千五百

兩有零擬即擇日興工除備造估册另文申送外所有

動用鹽池生息銀兩修理廟工緣由理合具文呈請

全譜
卷下
四
憲臺查核示遵再此項係屬商捐例不報
部合併聲明爲此備由具呈伏乞

照詳施行

重修運城

文廟碑記

運城學宮之設其端委詳見舊志大要以旣富宜教爲重
夫茲地之富以商茲學之設亦以商而晉之富民視商爲
畏途避之惟恐不速猾吏奸胥從而高下之其弊百出富
且不保何有於教大鋪蒞任數月訪察旣確悚然曰使者
奉

天子命來脫不剔弊除奸宣

上德意以重卹民隱其尸位孰甚乃整飭之噢咻之莠者鋤之
良者懷之此政也卽教也

文廟爲立教根本之地顧坐視傾圮尙安在其宣德意哉然經

費無出前之人欲修不克者屢矣查乾隆四十四年前運

使沈公

業富

修葺時由坐運兩商按引攤費其數無幾至

一載後猶嚴檄頻催今距前又數十年商力益疲設仿而
行之遲滯將益甚非所以敬

至聖而崇文教也審顧躊躇毅然於鹽池生息項下撥款興工
復懼選材弗良司事或怠間一二日必親往督視經始於
道光元年三月初七日閱兩月卽告成內而

大成殿兩廡明倫堂敬一亭外而

崇聖殿尊經閣名宦鄉賢各祠皆巍峩堅整是役也不請

帑不累商而戴功迅速咸謂河東未有之舉蓋裕立教之源
在盡保富之實富願其保而忍令於正則外多所輸將哉

年譜 卷下 五
士之升斯學者澤詩書植品節克副

盛世養育賢材之意而不徒以獵取科名為務使者有厚望焉

鹽池內地野狐泉卽前朝惠民館爲巡鹽御史督撈採之所泉聲潺潺晝夜不斷清水一池林木幽秀余偶以查鹽過此略憇覺滿目塵昏忽焉朗靜洵運城中第一勝境惜年久倒廢無完善之屋可以棲止乃決意修之其地非比各祠廟可以動支庫欸因首先捐廉二百金飭僚屬及各運商量力捐助整舊恢新各處題以扁額俾昔日名賢勝賞之地不至埋沒荒蕪亦爲政者之責也其泉之上巖飛雲閣中供奉

呂祖象夙著靈應余嘗以稍旱默禱拈香歸輿而雨絲灑潤

矣敬謹列入祀典朔望行禮并於中丞閱池閱兵蒞止之日亦請行香展禮著爲定例所有重修碑記附錄於後

重修野狐泉亭記

野狐泉亭卽前明惠民館爲巡鹽御史督撈採地日久頽廢余履其地泉聲潺潺坐而樂之顧敗屋數椽漂搖風雨歸然魯靈光矣迺捐俸修葺之僚屬暨各商協力襄事克葺厥功進重門而翼然者六角亭也方池夾亭中通以橋顏之曰廉讓之間再進爲廣廈五間顏其中曰延薰堂其前庭東西廡各仍其舊堂後重構三楹爲聽泉所面岡臨流蒼靄排闥顏之曰來青過此小憇忘其身在塵境也繞泉而北渡石梁復折而東古柏斜聳作龍形根嵌石罅若連若斷急筍堦護之而以朱闌廣可容席憑欄觀水得滄

浪趣焉堤上構小亭名之曰湛碧與停月臺遙遙對峙由是上石磴陟層坡巍然峙空者飛雲閣也閣中供

呂純陽真人像不知昉自何時查舊志祇名凌虛亭乾隆年

開前解州知州言

汝泗

續修志圖內始見之勝地煙霞靈

山香火殆神仙亦樂此耶惠民館之舊址到此而止余復於閣後拓地百弓構堂五楹登堂而白雲萬疊晴雪千頃掩映几席間此舍雪之所由名而泉亭勝景于是乎益備其旁添小屋數椽俾司泉者居之他如庖漏之屬皆備焉周圍繚垣計共二百三十餘丈經始於辛巳孟夏迄仲秋告成今春二月復植柏樹二百株桃柳桐榆槐杏等樹各數十株夫林木之成待十年而余顧亟亟焉為後來者計毋乃拙甚然世事之以巧而坐視其廢者可勝歎哉館之

左舊有

關帝廟并鼎新之連以牆合而為一覽斯泉者勤思夫地寶之何以旺商困之何以蘇渠堰禁垣之何以次第修治自不得以遊觀之地目之矣

畫泉亭覽勝圖畢口占三律

李時亮

係海鹽秀才時為余刑幕

使君清賞處索畫愧難辭遙寫公餘興兼題別後詩經營

離海事徒倚石欄時我亦幾回到拈豪心自知

泉壑有仙氣登臨如在山曠懷天共遠小坐客忘還流水自終日白雲長閉關牙旗林外偃踪跡總高閒

營築誰能畫將心補化工卷簾看晴雪種樹引薰風谿逕

只如此煙霞時不同圖成忽神往吟嘯藕花中

奉題泉亭覽勝圖

林芬 時官芮城縣其人詩品甚高

一池晴雪費經營池上亭臺又落成撰得洗心清妙句知

公最愛此泉聲

公撰光搖銀海防迷目韻落珠泉藉洗心楹帖于延薰堂上

入門谿逕復如何高閣臨流任嘯詔舍雪堂前一登眺

新公

築舍雪堂于呂仙閣後

蒼茫離海濟人多

迴廊曲檻自幽閒別有奇情顧盼閒聞說中條似龍臥白

雲滿地不還山

鹽池即在

一片濃陰碧似苔還疑有鶴夜深來波光雲影徘徊處築

箇凌空護柏臺

粉垣迴抱隔塵氛四面何緣繞綠雲付與園丁無別法一

篇種樹柳州文

時設園丁繞牆種樹

雪谿邀我與同游

夏四月中浣雪溪約游泉上

曾為聽泉半日留不料

暗中收拾去揮毫落紙更清幽

十五年前載酒人延薰重到感彌真

余與劉松嵐觀察飲于泉上今十五年矣

可憐一掬寒泉水幾度荒涼幾度新

將何結識古神仙拋得黃金便有緣手種荷花三萬柄清

風常在野狐泉

恭和遊野狐泉韻

黃憲臣

廣東人時官萬泉知縣

陡落條山曲磻幽嵐光迴合此全收亭臨柏鳴千重翠泉

接銀河一綫流高詠樓頭凌鶴鵲行春池畔集鳧鷗遙知

波及新栽樹父老年年指某邱

松風謾謾白雲湧響答流泉石上琴苔印巖均畱展窗月

涵波底見天心逡巡附驥登長坂省識和羹報上林句琢

瓊瑤仙客捷併將遺愛勒碑陰

黃

仁

松江人時官稷山知縣

翼然泉上小亭幽百里銀濤眼底收天爲蒼生開福地人
欽令望重清流風塵虞坂常追驥煙雨吳江合付鷗休暇
不愁仙境隔底須把袂憶浮邱

影搖石瀨瀉寒澗消息薰風欲鼓琴千里白雲游子意一

牀明月故人心家秋山兄頃有信來詢及觀察德政之美大參惠澤流離海廣

厦歡聲震士林清譙叨陪欣未艾新栽嘉樹已成陰

鹿樵觀察以游野狐泉詩石刻見示次韻奉寄

翁心存

畦亭春滿且尋幽拓室臨池萬象收近鹽水偏饒淡味出
山泉總是清流政成添得扶疎柳民靜渾如浩蕩鷗殊有
陶唐遺俗在不須高蹈挹浮邱

中條滴翠映寒澗鎮日周旋鶴與琴疏鑿略施經濟手清

冷聊寫祓除心微波不動魚忘餌樂意相關烏護林莫便
抽簪歸去也好教蒲霍遍棠陰

同鄉沈君廷璜前曾任福建汀漳龍道因公鑄級蒙

恩錄用選任山西平陽府同知調任監掣正余屬也方其在刑
部總辦秋讞作名司官時余尙爲書塾弟子沈固蹇遇而
余亦非飛騰者今幸同事一方可期得力乃本年正月間
一病而亡其身後毫無所積余飭各商從厚致賻始得料
理其柩南還其尊人欽伯先生前官運司病歿署中今其
子又歿於監掣之任兩署相距僅咫尺豈非前因後果歟
來署監掣者蒲州府永樂鎮同知陳君世昌號藝蓀湖南
名解元也詩翰文與吏治俱優遇事頗有膽識余所屬府
州縣中惟渠最賢亦惟渠最相得彼此有知己之感署任

半年裨益不少惜乎其才不偶命沉抑下僚余屢屢力爲保薦冀大憲破格用之蒙各憲亦甚首肯而機緣少合若天假之年此人必當大展抱負乃不兩年卽病歿此余追念良友時呼負負者天竟何如命竟何如於此見人生各有定分不可強也

監掣一缺余力保安邑縣知縣秦恆柄堪以勝任所遺安

邑一缺余保解州州判張誠脩升之此兩人者秦則老誠

穩練張則勤敏自愛皆平時得力之員也張已奉

旨准陞而旋因丁內艱未赴任

是年六月河東一帶地方頗旱心竊憂之自揣德薄安能祈降甘霖且地方舖戶惡習一聞官司禱雨斷屠卽各增長糧價雖雨不減民旣苦旱兼患食貴寸心默禱冀得時

雨不至重困吾民遷延數日絕無雨意不得已出示斷屠七日向來設壇

關帝廟中其地距司署二里許而迎請

城隍神

龍神赴壇並禱焉余曰以神就人非敬也三祠相距頗遠若步禱則余體孱弗勝轉致精疲誠渙何以對越神明仍坐輿率屬雨纓素服每日詣

三廟虔禱兩次原擬七日不雨仍不撤壇務期得請乃已至第三日在

武廟行禮畢後次至

城隍祠卽雷聲大震黑雲四布頃刻大雨如注余偕僚友待至雨歇始詣城外

龍神祠行禮有尼者曰雨已得可勿往余曰是何言耶迨至城門而水深已及馬腹余且喜且幸第四日即謝降撤壇自上年六月蒞任政如絲棼晝夜屏營至本年五六月間頭緒清楚余心少閑因太恭人不肯就養正擬六月間暫時休息俟八月秋涼請假旋里此余本計也忽於六月下旬奉到省移知奸商范立德因挾圖并引地被余駁飭之嫌赴京訛控總商王恒泰尉世隆兩家并誣及余奉

旨交撫臣秉公查辦余遂觸暑進省矣撫軍委首府將該商再四窮詰據稱本無誣控道憲之意祇欲圖詐王尉兩商因訟師云若不并誣道憲則案僅咨而不能奏供畢伏地流涕惶恐之狀可笑旋傳拏訟師已聞風逃遁經撫軍將該

商問擬杖徒覆奏完案查該奸商伎倆神通結交書吏敢於妄作妄為所供委咎訟師之處殊未可信第既已問徒押在府監例應即時起解乃任其逍遙佇尤可笑者歲除前數日茅津渡口船已封渡忽有一人輿從輝煌頭戴藍頂勢張甚大聲呼渡舟子答以奉官封渡不敢擅開則鞭斥隨之正喧呶間該管縣丞聞聲出署查視則戴藍頂者即范立德也其旁隨侍一人又係府司獄某之僕也駭愕不得其故詢之乃知賄通司獄將私往河南而司獄恐其遠颺遺僕跡之幸而署縣丞之陳蔭即秋間在省審問時委令看管范立德之員故識面破案否則倘被闖越過河或在豫省別滋事端則晉省自撫軍至首府失察之咎甚重該署縣丞不敢扶同隱狗具稟請余示遵余飭交平

陸縣將該犯等押回省中仍交太原府收管酌辦若論該奸商之罪余正可飭縣拏解嚴訊一面申詳撫軍奏請從重辦理在該奸商不足惜而太原府則必不能保全又何妨大度置之耶次年春該商尙托病逗遛并具呈以親老丁單贖罪經余駁飭不准復敢夤緣至京具呈刑部由部據情代奏奉

特旨范立德不准贖罪仰見

聖明洞燭而外間官場之事大率類此者甚多殊堪浩嘆計余此行往返幾至三月回署而鹺案叢積趕緊料理刻不得閒且甫經結案而卽具呈請假跡涉不雅恐負至尊委任之意遂不得不將歸計暫遲矣

十月中御史梁

中靖

奏河東鹽務仍歸地丁奉

旨交撫臣同藩司葉世倬悉心籌議撫軍謂事不可行而身兼鹽院恐有議其圖潤者未便直陳將如該御史所奏請改歸地丁葉方伯則因未悉原委不得主見札來邀余晉省面議定奪余以甫自省回本任公務遲擱已多不得脫身且往來僕僕致勞屬邑車馬供頓之煩亦非體卹之道乃備具公牘詳攄所見并加札復方伯云卽來面談亦不過舉要舉詳今已盡詳牘中如同晤語惟祈酌辦方伯見而欣然答書曰無層不到無義不搜閱之令人曾次雪亮頓有把握不勝佩服之至另具稟撫軍亦呈此稿撫軍恍然曰該道尙不避嫌吾可避嫌耶兩公卽照余原稿公同覆奏仍照舊章辦理所有公牘附錄於後

浙江道監察御史

臣梁中靖跪

年譜 卷下
奏爲河東鹽課請仍歸地丁輸納以順民情而抒商困且永
除私梟之患恭摺

奏

聞仰祈

聖鑒事竊惟鹽法首重便民而爲患莫患私梟欲除私梟之弊
宜先去官鹽之名而後聚衆藐法之徒其患不戢而自消
蓋無官鹽自無私鹽無私鹽自無私梟也伏查河東鹽務
自乾隆五十七年課歸地丁之後鹽價平賤百姓無貴食
之虞販徒斂跡州縣無緝私之案十五年之久民情相安
國課無虧蓋以攤入地丁者無幾而買賤鹽得以倍省其費
也嘉慶十二年因私侵占淮綱復招商領運自商運至今
已閱十五年而淮鹽未見暢銷可見兩淮滯銷並非河東

課歸地丁之故自復商以來運脚辛工一切浩費加以州
縣陋規價值較前幾長一倍又攙雜硝土民不堪食至疲
乏之商力不能運所配引地每慮淡食是利民者不免有
病民之虞若鹽課歸入丁糧每兩所攤不及一錢之數本
屬無多而得食賤鹽自無不樂於攤輸且有糧戶皆有業
之家似於貧民食鹽更有裨益至行鹽引地全賴商人殷
實方可轉運不匱近年以來晉省富戶以充商而致匱乏
者不可勝數每遇報商之時卽爲州縣之利凡稍有家貲
者差傳到案勒令充商往往托情行賄營謀求脫以飽州
縣之私橐故有家私者皆遷居別省以冀倖免試思稍有
餘利不致賠累何至背離鄉井人人視爲畏途此皆目前
實在之情形若引課攤入地丁聽民販賣如布帛菽粟之

年譜

卷下

七

流通則食無攙雜之鹽市無昂貴之價揆之民情無不樂從而富室不至遷移矣且鹽有官引而販私之徒攘為利藪如河南之汝州山西之屯留陝西之富平等處皆為私梟出沒之區往往百十為羣聚黨持械明目張膽公然列肆售賣即稟官查拏而捕役反被毆傷州縣懼于處分匿不詳報苟且彌縫而梟徒益無忌憚若不早為消除日復一日黨類愈眾其患不可勝言臣愚以為私販者以有官引之故若課歸丁糧地無配食之限鹽無官私之分人人皆可售賣此輩結聚無利其黨可以自散故配地行引商民之受累固宜矜恤而結夥聚黨私販之為患尤宜預防

仰懇

聖恩俯察民情仍照乾隆五十七年之例河東鹽課歸於地丁

輸納則億萬編氓共沐

皇仁於無既而案無緝私永絕梟徒之患矣臣愚昧之見是否有當伏祈

有當伏祈

皇上聖鑒訓示施行謹

奏

為遵札移查以便議覆事道光元年八月十七日蒙巡

鹽部院成 憲札內開道光元年八月十六日准兵部

火票遞到

軍機大臣字寄山西巡撫成 傳諭布政使葉世倬道

光元年八月十二日奉

上諭御史梁中靖奏請將河東鹽課仍歸地丁輸納一摺解鹽行銷晉省及河南陝西引地自乾隆五十七年改歸地丁徵

課嗣於嘉慶十一年復改依舊制設商行運今該御史復以改歸地丁爲請國家定制期於永遠可行此在立法之始通盤籌畫計及萬全晉省鹽務三十年來屢更其制究竟歸商歸民何者爲便著成 督同藩司葉世倬詳悉確查並體訪地方情形驗之既往熟籌將來虛衷商榷如何定制可以經久無弊據實覆奏該御史原摺著發交閱看將此諭知成並傳諭葉世倬知之欽此遵

旨寄信前來承准此合亟恭錄札知札到該司即便欽遵速將該御史所奏河東鹽課仍歸地丁輸納緣由通盤籌畫計及萬全詳悉確查並體訪地方情形如何定制可以經久無弊悉心妥議據實以憑察核具

奏仍將發去火票卽移送臬司彙繳毋遲計粘抄原奏一紙

等因蒙此查

貴道綜理鹽法究應如何可期經久平日自有真知灼見擬合移咨爲此合咨

貴道請煩查照

院札承准

廷寄內奉

旨事理希卽將該御史所奏河東鹽課仍歸地丁輸納無妨礙通盤籌畫計及萬全體訪情形如何定制可以經久無弊妥協核議移司以憑定議詳請

奏明幸勿延緩望速

計粘抄原奏一紙

爲咨覆事道光元年八月二十六日准

貴司咨開道光元年八月十七日蒙

巡鹽部院成

憲札內開

云

計粘抄原奏一紙內開

云等因准此伏查河東鹽務漢唐以來即設官經理

招商入課之法始於前明宏治迄我

朝乾隆五十七年以前歷數百載之久無改五十七年因商

力疲乏議將鹽課改歸地丁行之甫及十餘載旋於嘉

慶十一年因聽民販運無一定口岸蒙古鹽斤乘間侵

越解鹽遂致解鹽又夾入蒙鹽侵越淮綱屢次禁辦總

無良法經

欽差

英初

會同查議非設官商不能杜絕私販

奏准仍舊招商辦理此三十年以來河東鹽務遞改之由也

溯查往事其久者若彼其暫者如此今若但為西省商

人計裁撤鹽務課歸地丁既便民又絕私誠為善策惟

國家之利弊必須熟籌各省大勢計出萬全未便僅就一處

情形計議解鹽行運地界與淮綱處處相連淮鹽之成

本愈昂解鹽之行銷愈速如兩淮等處鹽務亦議裁撤

都歸地丁自可相輔而行倘第裁解鹽必害及淮引查

解池分東中西三場每年定額刮鹽五千七百餘名近

年東場產鹽稱旺中場次之西場經水冲沙壓之後久

成廢畦固由地利不同亦由人力未盡緣統計三省領

引之地計口授鹽三場每年只准出此數目額外餘鹽

私行出場即應嚴禁小民縱盡力澆晒多獲鹽觔而不

能售賣徒耗工本是以池內尚多廢畦然祇此額定之

鹽猶且防範難周刻刻慮其夾帶侵越如鹽無官私儘

數准其出場銷售民間從此力加工本昔之廢地盡成

良畦計大池內每年產鹽即可比前增倍加以大池外又有女池六小池及蒲州府之南北二灘等處現在所極力設法查禁者將來產鹽更必數倍於大池蓋鹽既無所謂私如布帛菽粟之聽民間自爲流通弗能禁其澆晒安能禁其行銷必致此省之民販仍爲彼省之梟徒非併鄰綱一例裁撤其勢必不能行之久遠已往之跡卽後事之師前此之甫裁而旋復者當亦出於萬不得已自古兩害相形則取其輕復商以來原不能保其絕無侵灌然有定額之侵灌較無定額之侵灌畢竟尙有限制此爲河東計不得不爲兩淮兼權熟計也從前乾隆五十七年課歸地丁時計攤鹽課銀五十一萬餘兩此時添入吉引課銀六萬八千餘兩又添河工經費

銀十六萬四千餘兩較前攤課更多晉省富戶競以商賈營生不以田土爲重素稱鉅富之家資本全在外省營運其僅僅置有田產數十百畝者轉非殷實之戶是課歸地丁亦祇能有益於晉省之富室而未必有裨於晉省之編氓現經

院憲於嘉慶二十四年調劑乏商具

奏准於山陝每引加鹽十觔免其加課豫省改爲商運民銷各商已免賠累卽如近日有圖得引地而百計營求者迥非昔日畏避求脫情形商力漸蘇於此可見總之辦理鹽務迄無良法裁則利於河東不利於兩淮不裁則衆商中良莠不齊雖經屢次設法調劑亦難保其久而無弊惟在隨時量爲損益本道職綜鹺綱緝私督銷動

易干議一經裁撤卽失重負然斷不敢自圖安逸預避處分而不爲

國家通盤籌畫安謀久遠之計尤不敢以迹涉嫌疑而言稍隱忍茲就管見所及據實直陳其應如何再行博訪輿情折衷定議期於至精至善之處仍由

貴司核辦可也擬合移覆爲此合咨
貴司請煩查照施行

山西學院陳官俊由

尙書房師傅仰膺

簡命督學山西因撫軍成具摺參

奏奉

旨交長中堂齡赴晉查辦兩公各加降黜并

特命長齡暫署撫篆旋以江西布政司邱樹棠

擢升晉撫邱係前任山西藩司與余舊好未便聞其來而卽去跡類尹邢之避只得靜候到任晉謁於是余歸省之志又不得不少遲矣

二年壬午五十三歲

二月進省謁新撫軍邱南屏先生停留數日卽回三月杪撫軍蒞運盤庫查池閱兵一切照例辦理酬應甚忙迨撫軍一路查閱營伍畢回轅已屆五月節七八月間霖雨兼旬山水陡發姚暹渠及東禁堰黑龍堰長樂堰等處疊次沖決接續告險澁池有浸灌之勢萬分危急夜間姚暹渠決水直灌運城北門而進平地水深數尺該處居民廬舍皆係土墻被水之後頃刻倒塌商號鹽庄漂沒無數居民

紛紛移徙躲避或棲依廟宇或借宿人家滿目悽慘之狀
爲地方大吏者覩之切抱不安其致此之由半因水道不
脩半因奸民偷挖緣鹽池逼近條山四面高坡大嶺惟池
獨窪大雨之後環山數百里水皆就下若侵及池中涵性
立敗自唐宋以來層層築堰處處疏渠導水曲折而赴大
河古人立法至善誠所以興利源而防遠害也

國朝初年尙設有專管渠道之官後卽裁却迨裁商之後則
更無人問及水利者嘉慶十三年勉強復商諸事苟且塞
責各大臣但知復商而不知深謀遠慮以致水櫃渠身湮
塞就廢官此土者竟不知分潤催科之外尙有治水一事
至於近池居民利其餘地可以耕種日久侵佔忘其官地
渠身堰址狹隘滋甚猝遇霍潦壅滯慮其浸損田禾則私

挖堰根將潦水灌入池內從前有因決水病池獲案正法
者官旣不知水利民復從而嫁禍積習相沿遂至事不可
爲矣然此固人事亦關天運康熙十八年及乾隆二十年
間鹽池兩次被淹課無所出嗟臣竭慮殫精束手無措具
詳鹽法志中今以時計之又閱六十餘年而余適當其厄
試思每年池課六十餘萬兩若一經浸灌此六十餘萬兩
無從著落余能晏然告養乎內思 太恭人年將八秩
定省久違急欲歸侍而外值時艱若竟置身事外坐視民
瘼不特公議不容亦且私心難昧乃晝夜督飭屬僚及商
人等趕緊堵築又苦無米之炊費無所出不得不嚴派各
商捐貲協力旣勸之以義復脅之以威凡囊沙填流植木
排椿壘石灌灰并製造水車等法無不兼收博用運城左

右木行麻袋等鋪價值驟昂爲之買運一空飛札調屬員中能事者迅赴工次協辦先將東馬道及各渠堰決口處搶護平穩堵截斷流此急救而治其標也次再委員確估姚暹渠李綽堰大脩工程此稍緩而治其本也蓋李綽堰堅實姚暹渠疏通則全池可保無患此二處工程專爲保護澁池起見故專資商力雖有生息銀可以借支亦係商捐至凍水河則專借民力脩之舊河寬深各五六丈綿亘數縣利澤甚溥一路建有環洞石橋年久淤成平地厥工甚鉅方其始事旁觀者咸有難色余札調平陽府經歷王玉先往猗氏縣一帶委曲開導諭令該處民人試挑一二處未幾工竣於是按照地畝分段挑濬各處民人踴躍赴工復量加獎勵不數月間舊日河形全復此可見臨事貴

持定力委任務得賢員而小民雖難與圖始仍易與圖終也卽如此河若待籌款辦理非十數萬金不可豈非俟河之清今乃不費一文而衆力易集此事實蒲州府同知陳世昌參贊之力居多其功良不可沒計自本年八月至明年三月余寢不安席食不甘味者閱半年有餘幸而回天之力澁池獲保澁產轉豐眞乃僥倖成功次年四月請中丞蒞運各處查驗畢具摺覆奏其時屬員中有覬覦因功超擢者余告以此乃職分內事毋妄想所有各詳稿附錄於後

詳請 奏懇動用銷價息銀鑲築東馬道內護堤工程

稿

爲詳請

奏懇動用息銀築堤帮護鹽池馬道以禦水患事竊查得鹽池東垣外俗稱陡坡大灘緊逼鹽池池垣之外僅存馬道一綫單薄可危其灘北為陡坡高十餘丈南距山麓之蚩尤等村地勢較灘亦高數丈灘之東復有東郭灘其堤曰東禁堰再東又有任村灘其堤曰黑龍堰三灘層疊相連以次遞高數丈本年夏秋雨多山水盛發灘水本已泛漲九月初三日起復大雨三晝夜突於初六日黑龍堰東禁堰同時決口水勢全注於最低之陡坡灘內極為浩瀚當經職道督飭各員將兩堰決口冒雨堵築并飭令各商捐貲將一千六百餘丈之馬道通體纍石填土加高帮濶茲已次第具報工竣由職道驗收在案惟馬道上面雖已加高而裏面空無倚靠緣馬道

以內池形低窪故也以寬廣數十里深至八九尺一丈及一丈數尺之灘水僅禦以單薄之馬道實不足以資鞏衛此時水勢未消固屬可慮而風浪尤為可畏該處逼近南山風力倍勁一遇東南風作波湧浪高新脩之工屢被掃刷塌陷雖經隨時搶護得免冲灌而風力難禁其不狂即單堤難保其不潰現在情形實屬時時危險急須設法疏消方免後患職道連日帶同各官員四面周歷相度奈東南北三面非峻嶺即高灘就中擇山麓之畧平坦處擬挖深濠不特水勢難以逆行且土性沮洳甫經試挖一二尺水即由底上冒更無可以開挖引河之地西面即係鹽池而池又比灘轉低數丈實屬無計可施伏思鹽池關係

國課數十萬兩又為晉陝豫三省民食攸關本年霪雨如注
 山水過多突然奔放實非人力所能支固不敢耗費無
 益以與水爭亦不敢坐視危殆不弭水患職道督同各
 員悉心講求務冀於萬不可為之中作一稍有可救之
 想茲據監掣同知秦恒柄蒲州府同知陳世昌等會同
 稟稱籌議各條皆不敢輕率貽害惟有從鹽池墻內緊
 靠馬道築堤一道由北而南自四舖以至七舖止約長
 十里底寬二丈四尺頂寬八尺其高則隨地勢之高下
 以二丈五尺為準於池北陡坡取土運至南岸十里之
 遙又須採辦蘆蓆木椿等件皆為晉省罕產之料工用
 未免浩大通盤約算需費總在五萬餘兩但望兩月之
 內東南風不大俾得趕緊築脩工料堅實此堤有十分

之工馬道即得十分之力幫護馬道可保萬一等語職
 道覆加酌核明知工價太鉅第東南北三面既係無可
 措手亦祇能於西面池內加做護堤較有依據舍此更
 無捍患之策且仍擬一面築堤一面再行設法消滅或
 用斗運水或用舡打水冀可稍裨毫末總之灘內之水
 少一分即馬道之險減一分庶幾鹽池可保無患此現
 在池內添築護堤工程刻不可緩之實在情形也伏查
 康熙十九年水決鹽池令各商開懇六小池補助澆晒
 究屬費多鹽少乾隆二十二年水決鹽池各商借動司
 庫銀三十萬兩脩治畦地并到長蘆花馬池等處借運
 鹽斤此時商力久疲萬一馬道不保致令灘水灌畦恐
 辦理更形掣肘自應盡力補救防患於未然惟各商現

在捐脩馬道其費已至三萬餘金若再派令捐辦不但
竭蹶且慮遲延貽悞查河東坐商前捐銷價本銀十五
萬兩於嘉慶十六年

奏請發交各運商一分生息卽於原

奏摺內聲明倘有工程緊急歲脩不敷准其詳請動用在案
現在算至道光二年冬季止除本年搶脩各堰工程及
應支各項外實存息銀八萬六千餘兩所有此項估需
銀五萬餘兩相應詳請

奏明准其在銷價息銀內動支與脩統俟工竣造冊報

部再此段堤工實爲異常吃緊仰祈

憲臺迅賜

奏請

允行一面先行

批准動用俾得卽時委員督同總李商等趕辦免致天
寒地凍工難堅固實爲公便至此外尙有應辦大脩姚
暹渠工程現在委員分段確估容俟覆勘確實另詳辦
理所有急應築堤護池情形理合詳請

憲臺察核具

奏爲此備由具呈伏乞

照詳施行

請動項脩理姚暹渠工程詳稿

爲詳請具

奏懇准動支生息銀兩脩濬姚暹渠以衛鹽池事竊查河東
鹽池在條山之北形如釜底山水建瓴而下易於侵灌

是以治鹺必先治渠而姚暹渠尤關緊要其原由夏縣王峪口起歷安邑解州虞鄉四州縣延長一百三十餘里會合東南一帶山峪之水西達五姓湖以入黃河使水有所歸自不致犯池爲患惟渠道灣環延亘山水發時挾沙帶泥而來水經一次卽淤積一層從前雍正年間由運庫公務項下動欸脩濬乾隆年間歷次

奏請借支

帑項大脩每次或三萬兩或四萬餘兩不等俱由坐運各商分年攤徵歸欸在案嗣於乾隆四十三年

前憲巴

奏明請將姚暹渠歲爲經理每年農隙水涸之時委員勘明責令坐運各商僱夫挑濬所需工費卽令衆商公攤毋

庸報

部等因其時立法未嘗不善迨乾隆五十七年裁商之後經理無人章程遂廢嘉慶十二年復商時亦未議復遵辦因是每年農隙督商濬渠一節迄今並無行之者卽間有派令各商捐資脩理之時俱以衆力未能厚集僅僅剗削浮淤渠不加深堰不加厚以致旋脩旋壞至於每年搶脩則第就壞處補苴仍須輪脩之年扣還借欸三年輪修則又遲之日久始能遞及查運庫額徵歲脩銀五千兩爲分修渠堰禁墻馬道水眼工程及支給開夫堰戶等工食之用是渠道遠工長輪到應脩年分經費有限實在不能遍及遂至因循敗壞全失舊形舊制渠口寬濶二丈四尺底寬二丈深至一丈二三尺不

等今則渠口狹窄漸被北岸民田侵佔渠底淺仰轉比
 旁地形高以條山數百里自高而下之水而欲使受制
 於寬深僅止數尺之渠此實萬不能容之勢本年入夏
 以來雨水過大渠流激駛堰身冲刷塌齧之處十居四
 五單薄不堪抵禦八月初間霪雨旬日山水漲發運城
 北門外南堰缺口漫入長樂灘內侵損池西諸堰當經
職道督率官員晝夜搶堵幸免灌入鹽池而夏縣上游
 之李綽堰因地當山水之衝屢脩屢壞必須另買民地
 改挖河身重築新堰方保無虞查李綽堰即係姚暹渠
 之來路必應歸併同時脩築此現在大脩姚暹渠工程
 斷不可緩之實在情形也職道飭委監掣同知秦恒柄
 候補庫大使侯錚會同前往確實勘估去後茲據該委

員等繪圖貼說前來稟稱共需銀四萬六千餘兩職道
 恐有浮多情弊復自渠首至渠尾親加履勘與該委員
 勘估無異實緣累年未加通挑又經大雨冲壞且向來
 祇修姚暹渠此次并須改建李綽堰是以需費較之歷
 次增多伏查脩渠所以護池嘉慶十六年前道茅豫詳
 請將扣存商捐銷價銀十五萬兩發商生息於原奏內
 聲明倘有工程緊急歲脩不敷准其詳請動用自十六
 年起至道光二年冬季止除應支各項并前詳趕築帮
 護馬道土堤案內請動息銀五萬餘兩以及前次搶脩
 要工稟明暫時借動業已另行籌款歸還外現在存銀
 四萬餘百兩所有此次估脩姚暹渠李綽堰工需請仍
 在銷價息銀項下支領與脩尚不敷銀六千餘兩相應

詳請

憲臺

奏懇

聖恩准其於運庫鹽課公務項下如數借支俾得乘此農隙之時趕緊辦理庶要工速成有備無患所借銀兩卽於道光三年各商繳到銷價生息銀兩內扣還歸欸至承脩工段必須誠實諳練之員容俟

職道

遴選辦理并責令

照例保固三年如限內冲壞無論調任陞任及有事故各員俱卽詳請參處仍將本員調赴運城分別賠脩工段並防草率偷減之弊其虞鄉縣境緊接渠尾之五姓湖爲洩水去路近來湖身漸高遇水大時虞有逆行之患又涑水河在姚暹渠北地勢北高南下夏秋雨大汎

漲南趨姚暹渠每被冲決乾隆年間大脩姚暹渠均與涑水河同時興工俾各循故道以免奔流合一之患此次挑濬姚暹渠而五姓湖涑水河亦當一律濬治合水勢通暢直達黃河應俟委員查勘確估如何疏通之處續行核議詳辦所有應脩姚暹渠堰高厚寬深丈尺實需夫工物料統俟工竣造冊詳請咨

部

職道

爲保護鹽池緊要起見不揣冒昧理合詳請

憲臺察核據情

奏明再修築李綽堰須另買民地價銀尙未一併估計合併聲明爲此備由具呈伏乞

照詳施行

詳覆 奏請動用銷價生息銀兩修濬姚暹渠李綽堰

等工詳稿

爲詳覆事道光二年十月二十九日蒙

憲臺批

職道

詳請具

奏懇准動支銷價生息銀兩脩濬姚暹渠一案緣由蒙批查姚暹渠自乾隆年間以至於今歷次借動大修又每年有歲修銀五千兩輪修各堰卽本年山水漲發有沖決之處該道前已詳請動用銷價生息銀五萬餘兩築堤護池甫經具

奏在案今復詳請興修李綽渠堰各工估需銀四萬六千餘兩亦屬過多况保護鹽池卽屬保護畦地自應分派坐運兩商公同捐修以資保護未便復行具

奏再請致干駁飭卽再行確查妥議詳奪繳等因蒙此遵

查乾隆年間節次大修姚暹渠工程原係借庫項由坐運兩商分年公捐歸還乃今秋雨水過多環池東西渠堰多被沖決每年額設歲修遠不敷用而東石馬道加高培厚等工經坐運兩商捐辦已費銀三萬餘兩若姚暹渠李綽堰工程飭令同時捐脩察看商力實有未逮况銷價生息本於原

奏摺內聲明倘有工程緊急歲修不敷准其詳請動用是以請將前項息銀具

奏懇准動支修理茲蒙批飭前因

職道

遵復體察商情再四

籌議所有此次估需工費銀兩自應援照乾隆年間大修章程仍由坐運兩商公捐修理惟銀數較多商本微薄一時力難奏辦應請亦照舊章借項興修分年征還

今運庫別無閑款查有銷價息銀一項截至本年冬底除應支各款并前次詳蒙

奏准添築幫護馬道土堤案內動用生息銀五萬餘兩以及前因搶修要工稟明暫行借動業已另行籌款歸還外現在實存銀四萬餘百兩合無仰懇

憲臺

奏懇

聖恩准其於存剩銷價息銀內儘數借動尙有不敷併請在於公務項下如數借支一俟來歲春融趕緊動工修築所借銀兩卽於道光三年爲始分作八年由坐運商公同捐攤按年隨同正課征還歸款如此辦理庶商力不致竭蹶而要工可期速成矣至前估姚暹渠李綽堰工需

聲明須另買民地價銀不在其內計需銀四萬六千餘兩今職道督同委員覆加樽節確估核計連買民地實共需銀四萬八千餘兩委無浮多情弊緣奉批飭妥議是否有當除另行具詳請

奏外理合詳覆

憲臺察核示遵爲此備由具呈伏乞

照詳施行

詳請 奏懇借動銷價生息銀兩修濬姚暹渠李綽堰等工詳稿 爲詳請具

奏懇准借動生息銀兩修濬姚暹渠以衛鹽池事竊舊形舊鹽池在條山之北形如釜底山水建筑一丈二三尺不

是以治鹺必先治渠而姚暹渠尤關緊要至本年冬底王峪口起歷安邑解州虞鄉四州縣延長一百一十里會合東南一帶山峪之水西達五姓湖以入黃河使水有所歸自不致犯池爲患惟渠道灣環延亘山水發時挾沙帶泥而來水經一次卽淤積一層從前雍正年間由運庫公務項下動欸修濬乾隆年間歷次

奏請借支

帑項大修每次或三萬兩或四萬餘兩不等俱由坐運各商分年攤征歸欸在案嗣於乾隆四十三年

前憲巴

奏明請將姚暹渠歲爲經理每年農隙水涸之時委員勘明責令坐運各商僱夫挑濬所需工費卽令衆商公攤毋

庸報

部等因其時立法未嘗不善迨乾隆五十七年裁商之後經理無人章程遂廢嘉慶十二年復商時亦未議復遵辦因是每年農隙督商修濬一節迄今並無行之者卽間有派令各商捐資修理之時俱以衆力未能厚集僅僅剗削浮淤渠不加深堰不加厚以致旋修旋壞至於每年搶修則第就壞處補苴仍須輪修之年扣還借欸三年輪修則又遲之日久始能遞及查運庫額征歲修銀五千兩爲分修渠堰禁墻馬道水眼工程及支給開夫堰戶等工食之用是渠道遠工長輪到應修年分經費有限實在不能遍及遂至因循敗壞全失舊形舊制渠口寬濶二丈四尺底寬二丈深至一丈二三尺不

等今則渠口狹窄漸被北岸民田侵佔渠底淺仰轉比
旁地形高以條山數百里自高而下之水而欲使受制
於寬深僅止數尺之渠此實萬不能容之勢本年入夏
以來雨水過大渠流激駛堰身冲刷塌蟄之處十居四
五單薄不堪抵禦八月初間霖雨旬日山水漲發運城
北門外南堰決口漫入長樂灘內侵損池西諸堰當經
職道督率官員晝夜搶堵幸免灌入鹽池而夏縣上游
之李綽堰因地當山水之衝屢修屢壞必須另買民地
改挖河身重築新堰方保無虞查李綽堰即係姚暹渠
之來路必應歸併同時修築此現在大修姚暹渠工程
斷不可緩之實在情形也
職道飭委監掣同知泰恒柄
候補庫大使侯錫會同前往確實勘估去後旋據該委

員等繪圖貼說前來稟稱一切工費連買民地價值共
需銀四萬八千餘兩
職道恐有浮多情弊復自渠首至
渠尾親加履勘與該委員等勘估無異實緣累年未加
通挑又經大雨冲壞且向來祇修姚暹渠此次并須改
建李綽堰是以需費較之歷次增多伏查修渠所以護
池估需銀兩自應援照乾隆年間節次大修章程由坐
運兩商公捐修理惟銀數較多商本微薄一時力難湊
辦應請亦照舊章借項興修分年征還查從前歷次大
修俱係借動鹽課正欵今查有嘉慶十六年前道茅豫
詳請將扣存商捐銷價銀十五萬兩發商生息於原奏
內聲明倘有工程緊急歲修不敷准其詳請動用自十
六年起至道光二年冬季止除應支各項并前次詳蒙

奏准添築幫護馬道土堤案內動用生息銀五萬餘兩外現
存銀四萬餘百兩所有此次借項興修姚暹渠李綽堰
工需自可無庸全數借動正欸相應詳請

憲臺

奏懇

聖恩准其於運庫存剩銷價息銀內儘數借動尙不敷銀八千
餘兩請暫於公務項下如數借支一俟來歲春融趕緊
辦理庶要工速成有備無患所借銀兩卽於道光三年
爲始分作八年由坐運兩商公攤按年隨同正課征還
歸欸至承修工段本係解州安邑夏縣虞鄉四州縣所
轄地方應請卽責成該州縣等承修并令照例保固三
年如限內冲壞無論調任陞任及有事故各員俱卽詳

請參處仍將本員調赴運城分別賠修工段以防草率
偷減之弊至開工時再由

職道

遴選誠實諳練之員分

往督辦較爲核實其虞鄉縣境緊接渠尾之五姓湖爲
洩水去路近來湖身漸高遇水大時慮有逆行之患又
涑水河在姚暹渠北地勢北高南下夏秋雨大汛漲南
趨姚暹渠每被冲決乾隆年間大修姚暹渠均與涑水
河同時興工俾各循故道以免奔流合一之患此次挑
濬姚暹渠而五姓湖涑水河工亦當一律濬治令水勢
通暢直達黃河應俟委員查勘確估如何疏通之處續
行核議詳辦

職道

爲保護鹽池緊要起見不揣冒昧理

合詳請

憲臺察核具

奏再查此項工程目前雖屬借動閒款辦理將來仍由各商攤捐歸款卽與商修無異應請於

奏摺後聲明請免造冊報

部實爲公便爲此備由具呈伏乞

照詳施行

詳坐運兩商分八年攤繳借款稿

爲詳報事竊照姚暹渠李綽堰工程前經

職道詳蒙

憲臺

奏准借項大修在案所借銷價生息銀并公務項下銀四萬八千兩原詳聲明分作八年由坐運兩商攤還歸款其應如何分攤之處當飭監掣同知查議去後茲據該同知秦恒柄詳稱蒙此遵查現在三場坐商額哇四百六

十五號計二千七百八十八錠半均有錠票每錠運商給坐商銷價銀十七兩五錢七分以爲澆晒工本之需餘哇一百二十號並無錠票所有此次借動前項工費銀四萬八千兩分作八年每年坐運兩商共應攤銀六千兩若令坐商與運商對平均攤則坐商資本較薄卑職體察情形悉心籌議應請飭令坐商分攤四分運商攤出六分其坐商每年應攤四分銀二千四百兩除餘哇不計外在於所得額哇二千七百八十八錠半銷價內每錠扣銀八錢六分六毫八絲至運商每年應攤六分銀三千六百兩查現在三省各商行銷額餘活引五千六百九十八名八十五引除活引七百二十九名二十引不計外應於額餘引四千九百六十九名六十五

引內每引攤銀六釐三絲六忽八微自道光三年五月開徵為始隨同正課一併按月完繳是否允協擬合詳覆查核轉詳等情到道據此職道覆查此次借脩渠堰工費銀兩據監掣同知議以坐商分攤四分運商攤出六分之處尙屬平允應請俯如該同知所議坐商每年應攤四分銀二千四百兩在於所得額哇銷價內每錠扣銀八錢六分六毫八絲運商應攤六分銀三千六百兩在於各商行銷額餘引內每引攤銀六釐三絲六忽八微統自道光三年五月開徵為始隨同正課銀兩一併按月完繳俟每年九月後收足六千兩之數造冊詳請專案咨報如此辦理庶商力不致竭蹶而公項得以按年歸還矣除諭飭坐運兩商遵照外理合詳請

憲臺查核批示飭遵為此備由具呈伏乞

照詳施行

詳報內堤工程完竣并節省銀兩歸還原欸稿

為搶築池東馬道內護堤工程完竣詳請

奏報事道光二年十一月初七日蒙

巡鹽部院邱 憲札內開照得本鹽院於十月二十日具

奏河東鹽池東西各堰被山水冲決動用銷價生息銀兩築

堤保護一摺今於十一月初三日奉到

硃批另有旨欽此同日即奉到道光二年十月二十六日內閣奉

上諭邱 奏鹽池各堰衝決請築堤保護一摺晉省河東鹽

池東西各堰因本年秋間連日大雨山水盛漲致被衝決
經該撫委員查明亟須築堤保護着照所請辦理所有估
需銀五萬兩准其在商捐銷價生息銀內照數動支趕緊
興修務使堤身堅固以資保衛不得稍有浮冒工竣核實
報銷該部知道欽此合亟恭錄札知爲此仰道官吏卽便
欽遵照數動支趕緊興脩務使堤身堅固以資保衛不
得稍有浮冒工竣核實報銷毋違此札等因蒙此遵查
鹽池東馬道內帮築護堤因工程緊要先經職道飭委
蒲州府同知陳世昌監掣同知秦恒柄安邑縣知縣劉
養鋒各分段趕緊承辦於道光二年十月初六日開工
嗣因天寒地凍誠恐工作不能堅固於十一月初十日
暫行停止至本年正月二十九日復行開工均經職道

稟蒙

憲鑒在案伏查前項護堤工程曾於原

奏摺內聲明自北至南計長十餘里約估需銀五萬餘兩旋

於本年二月間因馬道又被風浪擊壞而灘水浩瀚再

四設法無可疏消時有冲齧之患復經職道相度形勢

嚴飭各商將馬道一律改做灰砌石工再於外面水深

處所排釘椿木堆做碎石坡一道使風浪先有碎石攔

護不致馬道吃重其工係飭各商捐辦並未動項是外

面既有帮護而內堤工程卽間有可以從省之處隨督

飭各委員節省辦理去後嗣於三月十九日蒙

憲臺親臨查勘其時各員所辦之工已有九分茲據該

委員等陸續稟報於三月二十九三十暨四月初二等

年譜
日一律趕築完竣前來職道隨親詣逐段查驗其底面
高寬丈尺悉與原報相符并用鐵筓在堤身打眼灌水
試驗俱係結實堅固並無草率偷減浮冒情弊統共用
銀三萬五千三百七十餘兩較原奉

諭旨准動支五萬兩之數內節省銀一萬四千六百二十餘兩
查此項工程先係通盤約估後經職道連日逐細覆勘
凡有可以核減之處卽行核減是以節省較多所有餘
剩銀一萬四千六百二十餘兩應請

奏明仍歸原欸貯庫倘將來遇有緊要工程應行動用之處
再行詳請

奏明辦理除將用過夫工物料銀兩以及堤身長寬丈尺飭
令各委員造具細數清冊並照例取具保固印結另文

詳請咨

部核銷外所有搶築護堤工竣日期并節省銀兩數目
合先具詳呈請

憲臺察核據情

奏明爲此備由具呈伏乞

照詳施行

詳報姚暹渠工竣并善後章程詳稿

爲驗收渠堰工程完竣籌酌善後章程并節省銀兩存
脩別項堰工詳請

奏報事道光三年二月初九日蒙

巡鹽部院邱 憲札河東道照得本鹽部院於正月二
十二日具

奏借動河東道庫內銷價息銀等款脩濬渠堰要工以衛鹽池一摺今於二月初五日奉到

硃批另有旨欽此同日即奉到道光三年正月三十日內閣奉上諭邱 奏懇借項脩濬姚暹渠李綽堰各要工以衛鹽池

一摺河東姚暹渠因上年秋雨過多山水盛漲堰身被冲其上游之李綽堰屢脩屢壞據該撫勘明必須另買民地改挖河身重築新堰請與姚暹渠一併脩築方可保護鹽池着照所請估需銀四萬八千餘兩准其將河東道庫所存商捐銷價生息銀四萬餘兩儘數借動其不敷銀八千兩着於公務項下如數借支該撫即飭令該州縣乘此春融之時趕緊脩築照例保固並飭該道隨時查察該撫於赴省南查閱營伍時即親往查勘所借銀兩自本年夏季

為始分作八年由坐運兩商公攤按年徵還歸款毋庸造冊報銷該部知道欽此合亟恭錄札知為此仰道官吏即便欽遵動支即飭該州縣乘此春融之時趕緊脩築照例保固該道隨時查察并候本部院親往查勘務期挑挖深通工程堅固其所借銀兩按年攤征歸款毋庸造報此札等因蒙此遵即分飭承脩之解州安邑夏縣虞鄉等州縣各於本管境內按照估定工程領銀趕緊興工并遴委幹員分往各州縣認真督脩職道復不時親赴工所督飭各該員實心辦理以期工堅用節嗣於三月二十一二三等日蒙

憲臺親臨各處查勘其時各該員所辦工段有將次完竣者有修至七成者旋據各該州縣陸續具稟於三月

二十六八三十等日一律報竣前來職道查水勢之通
 暢全憑渠底之順平特製造水平於收工時親自帶赴
 各處按段測驗自夏縣至虞鄉縣境百餘里之長俱已
 平順其渠之底面寬濶及高深丈尺悉與原估相符所
 築堰身亦俱結實堅固尙無草率偷減浮冒情弊核計
 夫工物料連買民地價值統共實用銀四萬一千一百
 八十三兩四錢一分三釐七毫五絲較原估銀四萬八
 千餘兩之數節省銀六千八百十六兩零應請留為將
 來脩築別項堰工之用緣渠堰為眾商命脈所關舊志
 刊載各堰名目共五十餘處聲明其中二十二堰尤關
 緊要茲查報

部例准歲脩者祇有十八堰如二十二堰中之申家堰
 青龍堰等處為攔禦東西客水之要藩今皆傾圯不脩
 僅存形迹以致水大時往往直逼陂池職道屢經委員
 帶同諳練商人察看水源地勢據稟情形與舊志所載
 符合自應以有餘之力補已廢之工一俟交秋即當估
 辦如有不敷飭商捐補所有借動銷價息銀等款四萬
 八千兩仍欽遵

諭旨准於本年夏季為始分作八年攤徵歸欵并將每年各商
 攤繳之數按次報

部以備稽核而清欵項惟是姚暹一渠受諸山之水挾
 沙帶泥而來最易淤阻此後應請明定章程歲為經理
 每年於農隙水涸之時責成監掣同知詳細履勘飭令
 運商僱夫挑濬所需工費即令公攤并每年於挑濬完

工後由監掣同知報道詳

院一次以昭慎重庶將來鹽池永資鞏衛而工力亦不

至大費矣至猗氏等縣境內之涑水河前經

聲明亦應一併挑脩在案此項工程雖歷屆例係民脩

第自乾隆四十三年至今積久未加大濬河身淤塞水

勢漫流辦理實屬費力當經

并委員前往會同召集沿河村民剴切勸諭旋皆踴躍

從事本年三月二十日後

憲臺親赴各處查看時已驗有八九成工程不等茲據

各該縣稟報竣工

一律如式現在虞鄉縣境內之五姓湖水由永濟縣之

湖口橋溢流至薛家崖以下直達黃河是下游既得通

暢卽將來上游之姚暹渠水滙入湖中自無滿溢阻滯

之患除安邑縣境內工段無多外計猗氏臨晉永濟等

三縣境內河身共長一百八十餘里各該縣捐廉獎勵

督飭有方得以未及三月卽行葺工洵爲能事前蒙

憲臺於覆

奏查勘鹽池工程摺內業將各縣暨各該委員名姓一一上

達

聖聰并分別飭司記功示獎仰見

憲恩優渥微勞必錄之至意該員等無不益加感奮查

蒲州府同知陳

次委辦各工尤能樽節妥善益矢慎勤平陽府經歷王

玉樸實無華當甫議開挖涑河之際衆情觀望畏難經

職道 委令協同籌辦旋據各沿河村民具限興工實由

該員首先勸導之力居多以上二員可否再求

憲臺逾格鴻慈量予儘先陞用以示鼓勵之處出自恩

施再姚暹渠李綽堰工程欽遵

諭旨毋庸造冊報銷除照例取具承脩之解州等各州縣保固

印給備案外所有大脩渠堰工竣日期暨善後事宜并

節省銀兩留存備用及民挑凍水河工程一律完竣緣

由理合具詳呈請

憲臺察核具

奏為此備由具呈伏乞

照詳施行

詳據商稟每年攤繳六千兩定於八月內清完稿

為詳明事道光三年三月初三日蒙

巡鹽部院邱 批職道 呈詳大修姚暹渠李綽堰工程

借動銷價生息等項銀兩議飭坐運兩商四六分攤按

年徵收歸款緣由蒙批如詳照議飭遵辦理繳等因蒙

此遵即諭飭坐運兩商一體遵照議定章程即以本年

五月為始按限完繳去後茲據年季商王 恒泰 等稟稱

竊此次大修姚暹渠李綽堰工程前蒙詳請具

奏准其借動銷價生息並公務項下共銀四萬八千兩分作

八年由坐運兩商按四六分攤歸款本年應封銀六

千兩諭令自五月為始分作五限於每月下旬封納等

因商等自應恪遵辦理惟查運商每年應封六分銀三

千六百兩在額餘引內分攤坐商每年應封銀二千四

百兩在應給銷價內劃扣但運商共有六十餘家坐商
哇有二千七百餘錠銀數不多只是零星不一每月恐
不能照數收齊轉致有悞限期合無仰懇恩准於八月
內一併封納俾商等於六七月內趕緊催收齊全臨期
呈繳如蒙俯准並請每年以此爲例庶各商得以專辦
正課而此項捐款亦得及早備辦不致貽悞矣等情據
此職道覆查坐運兩商分攤前項工費銀兩原議自道
光三年五月開徵爲始隨同正課一併按月完繳每年
九月收足造冊詳請咨報在案今據稟商家多而銀數
零星若每年分作五限完納恐每月不能收齊轉致悞
限之處委係實在情形自應俯如所請准其於八月內
將五限應封銀數一併呈繳歸款較爲簡便除批飭如

稟辦理倘有遲悞惟該年季商等是問外理合具詳呈
請

憲臺察核示遵爲此備由具呈伏乞

照詳施行

詳報馬道內幫築護堤工程完竣詳請 題銷銀兩稿
爲報銷搶築馬道護堤工程銀兩詳請核咨事案蒙
巡鹽部院邱 憲札內開札河東道照得本部院於道
光三年五月二十六日具

奏添築馬道護堤並修濬姚暹渠李綽堰以及挑挖涑水河
工程均已完竣等因一摺今於六月初九日奉到

硃批另有旨同日卽奉到道光三年六月初三日內閣奉

上諭邱

奏添築鹽池馬道護堤脩濬姚暹渠李綽堰及挑

年譜
卷一
挖涑水河各工程完竣並請歲為經理一摺河東鹽池添
築馬道護堤並修濬姚暹渠李綽堰及挑挖涑水河各工
程據該撫查明該委員及各該縣俱能實力樽節趕緊辦
理並能勸諭村民出力挑挖均已一律妥速完竣所有馬
道護堤工程係奏明動用商捐銷價生息銀兩辦理計共
用銀三萬五千三百七十餘兩較原估節省銀一萬四千
六百二十餘兩著即將原估節省銀兩仍歸原款至脩濬
姚暹渠李綽堰工程所借銷價生息各款銀四萬八千兩
今較原估節省銀六千八百十六兩零尚有應修申家堰
青龍堰等處工程著即將此項銀兩於秋後動工辦理仍
於本年夏季為始分作八年由坐運兩商攤徵還款按年
報部其姚暹渠受諸山之水挾沙帶泥最易淤阻請歲為

經理著照所請於每年農隙水涸之時專責成監掣同知
詳細履勘飭令運商僱夫挑濬所需工費即令各商公攤
由河東道驗收具報至涑水河已挑挖深通民田廬舍得
資保護亦著於每年農隙水涸之時責成各該縣勸用民
力隨時修濬該撫當飭屬認真查勘以期一律通暢終須
於民田鹽池均有裨益毋致日久壅塞徒多糜費也該部
知道欽此合亟恭錄札知為此仰道官吏即便查照辦理
毋違此札等因蒙此職道即欽遵分行知照一面催飭
承辦馬道護堤工程之各委員趕緊造冊報銷去後茲
據蒲州府同知陳世昌監掣同知秦恒柄安邑縣知縣
劉養鋒會詳稱竊卑職等於上年九月奉委會同勘估
馬道內添築護堤工程遵即會勘得該處內係鴨子池

外臨陡坡灘均屬汪洋一片取土維艱緣鹽池甚爲危
險必須搶堵以資保衛連日相度形勢惟有在陡坡取
土約有十里之遙較平時歲修工價多至十數倍及應
用椿木處所當將大概情形面稟本道親詣履勘核詳
請

奏旋奉札委卑職等卽趕緊分段搶修遵復會同馳赴工所
細加確勘其時水勢稍定池中灘內間有露出土堆土
雖無多較之全在陡坡取用稍可樽節有在百丈以內
附近取土處所亦有遠約二三百丈及至一千二百餘
丈以外取土不等亦間有水激堰根應用頑石在水中
立脚壘砌排釘木椿方足以資鞏固情形不一若不
晰量估難期合一查河東歲修舊例在百丈以內取土

每方應估用運土夫二工今取土遠近不同似應比照
歲修百丈以內估用運土夫二工之例其遠土按百丈
遞加分段逐細量估俾得遠近合一工價平允以便遵
照分段搶堵各專責任所有卑職等分辦工程段落實
用夫工物料銀數高寬遠近丈尺理合造具清冊各四
本保固印結各四張呈送查核轉詳等情到道據此
道覆查馬道搶築護堤工程內係鴨子池外靠陡坡灘
俱屬汪洋一片取土維艱原估均在陡坡取土約有十
里之遙嗣因水勢稍定池中灘內間有露出土堆土雖
無多較之全在陡坡取土自可樽節前經職道督同該
委員等細加查勘內有附近取土有遠在一百丈以外
至一千二百丈以外不等其附近取土者仍照河東歲

修成例每方用挑土夫二工築打夫一工遠處取土按
百丈加給挑土夫二工核其取土丈尺以次遞加洵爲
平允前據該委員等申報工竣經職道親詣工所切實
驗收實做工長一千一百八十四丈二尺內間段工長
五百九十一丈一尺緣水勢刷激堰根必須先用頑石
灌漿壘砌簽釘排椿在水中立脚上面再用土加高培
厚其餘間段工長五百九十三丈一尺用土加幫高厚
杵築堅實至底面高寬丈尺悉與原估相符茲據各該
委員造送銷冊前來查土石夫匠并椿灰價銀共銀三
萬五千三百七十五兩九錢五分二釐較原估五萬兩
之數節省銀一萬四千六百二十四兩四分八釐所用
銀兩職道覆加確核均係實用實銷委無浮冒情弊合

將送到報銷清冊并照例保固印結具詳呈請

憲臺查核咨

部

題銷爲此備由具呈伏乞

照詳施行

三年癸未五十四歲

宏運書院係商籍生童肄業之地而民籍生童亦附課其
中余到任時詢之屬僚據監掣沈君面稟云民籍生童所
肄業之河東書院舊址距城八里年久頽廢斷難再復余
後因事蒞其地親加相度延袤幾數十畝古柏數十株鬱
森可愛惜乎頽垣蔓草除僅存聚奎堂三間老屋外餘盡
犁爲麥田矣然形勢據高原而面中條秀氣斯鍾勝槩具

在躊躇久之奮然興工復建并捐廉助膏火為經久之計
又訪求品學兼優之姬杏農進士延主講席俾多士克端
趨向蓋不數月間而曠野平蕪變為廣廈崇墉絃誦彬彬
之地余蒞任兩年來第一慰心者此舉也最後又得私離
入官一欸以之添構補讀堂三楹該處生童根柢欠厚額
名特用示勗茲堂續成在余告養將歸之候是以前二碑
中未及所有稿案章程及碑記并規條俱附後

詳請飭三十六屬每年攤捐書院經費稿

為詳明立案事竊照運城河東書院建自前明自乾隆
四十八年以來陸續坍塌遂爾頽廢職道前奉通飭各
屬修整書院之

諭旨當即欽遵勘估詳蒙

憲臺批准在於歲修盈餘及鹽池生息項下動用銀二
千六百二十餘兩將書院房屋重行建造今工程業已
完竣所有延請院長及生童膏火等費急須籌備應用
溯查乾隆四十四年前運司程國表重興書院諭飭合
網商人籌議經費當經總商荆懷仁王恆泰等稟請在
加增鹽引二萬六百五十五引銷價內每年每引捐銀
六分共捐銀一千二百三十九兩三錢呈繳運庫備用
歷年遵辦在案迨乾隆五十七年課歸地丁此欸遂廢
嘉慶十二年復商以來迄未議及茲書院雖已脩復鼎
新作養人材全資經費裕如方能核實課功昭垂久遠
况近年諸物昂貴較之乾隆年間不啻數倍統計書院
中每歲需費必得二千餘金現在商力甫蘇自宜勤加

體卹未便令其全攤因查河東書院例得檄飭三十六屬申送英秀之士赴院肄業從前原係各屬協濟惟刻下各屬別項捐攤已經不少又難議令多出伏思事圖善全必當先自努力今職道首捐養廉庫平紋銀一千兩卽於本年八月初三日發交總商王恆泰尉世隆兩家收領以一分生息計每年可得息銀一百二十兩遇閏加銀十兩再由道署無論何任每年按季捐銀六十兩又議令監掣同知每季捐銀十兩在於應領加增養廉內按季扣存其道屬各府州內除隰州并所屬大蒲永三縣暨平陽府屬之吉州岳陽汾西鄉宦缺分均係清苦不計外應令平陽府每年捐銀三十六兩所屬臨汾洪洞太平曲沃每縣每年捐銀十八兩翼城襄陵每

縣每年捐銀十四兩浮山每年捐銀四兩蒲州府每年捐銀二十兩所屬永濟臨晉猗氏每縣每年捐銀十二兩滎河萬泉虞鄉每縣每年捐銀六兩解州每年捐銀二十兩所屬安邑夏縣每縣每年捐銀十五兩平陸芮城每縣每年捐銀六兩絳州每年捐銀二十六兩所屬聞喜稷山河津絳縣每縣每年捐銀十四兩垣曲每年捐銀六兩霍州并所屬靈石趙城每縣每年各捐銀十二兩以上捐項并發商生息之欸共計每年得銀八百兩此外尙短銀一千二百餘兩仍照乾隆年間舊章諭令閭閻商人按引均攤彙總呈繳道庫以便同各官捐欸及道署息銀按時支發如此斟酌辦理經費無虞絀乏商力亦易輸將且合屬所出之數甚微而士林所沾

年譜
卷下
之惠甚鉅從此可以絃誦相聞人文蔚起矣至各府州縣應捐前項銀兩卽於本年八月爲始無論正署各照所捐銀數由該管府州彙齊定限於八月底轉解道庫兌收事關遵

旨育才不容稍有拖欠除分別檄飭各府州縣并諭飭閤綱商人遵照外合將籌議河東書院經費緣由具文詳請

憲臺查核批示立案遵行并將應支欸項及設立條規另繕清冊二本敬呈

憲覽除詳

撫憲外爲此備由具呈伏乞

照詳施行

詳報另籌書院經費免合屬攤捐稿

爲詳明立案事竊照運城河東書院前因頽廢多年經職道於道光二年春間欽遵通飭脩整書院之

諭旨勘估工程詳蒙

院憲批准在於歲修盈餘及鹽池生息項下動支銀二千六百餘兩將書院房屋重建完竣所有延請院長及生童膏火等項經費每年需銀二千餘兩因無欸可籌經職道捐銀一千兩於二年發商一分生息每年計得息銀一百二十兩再由道署每年按季捐銀六十兩監掣同知每季捐銀十兩又查照乾隆年間舊章飭令閤綱運商每年按引攤捐銀一千二百餘兩共計每年得銀一千六百餘兩此外尙短銀四百兩因查河東書院例得道屬三十六州縣申送士子肄業議令各屬攤捐

協濟內除隰州并所屬之大寧蒲縣永和暨平陽府屬之吉州岳陽汾西鄉寧缺分均係清苦不計外其餘各府州縣按缺分繁簡照數攤捐共成銀四百兩自二年為始由該管府州彙解道庫兌收以備按時支發并將議攤緣由詳蒙

院憲批飭遵照在案茲查近年各府州縣別項攤捐已多催解甚為費力雖所攤書院經費每處不過二三十兩至數兩不等為數甚屬有限究宜加之體卹况振興文教全憑經費有資方可計垂久遠萬一將來催提不到必致有名無實始成終廢職道再四籌畫特再捐廉庫平紋銀一千兩又勸諭殷商王恒泰尉世隆兩家各捐銀一千兩并總季商及散商等常通裕捐銀四百兩

葛廣濟張隆泰各捐銀一百兩劉洪茂侯六來各捐銀

七十五兩雷運隆曹七合王費合孫慶餘史嘉會張天

福王益泰陳凝泰趙永吉楊葆泰溫燕樹等各捐銀五

十兩統共捐銀四千三百兩即於道光三年五月為始

發商一分生息每年計得息銀五百十六兩連前次職

道捐銀一千兩每年共有息銀六百三十六兩再由道

署每年按季仍捐銀六十兩監掣同知每季仍捐銀十

兩并各商由引攤捐銀一千二百餘兩每年共銀二千

一百餘兩支發經費已屬有盈無絀所有前飭各府州

縣攤捐銀兩應行停止以示體卹至職道先後兩次捐

銀發商生息之欸及此次捐輸各商姓氏并由引攤捐

各項銀數現已勒石書院中以杜侵欺而勵多士除檄

行各該府州縣知照外合將河東書院經費銀兩業已
籌備毋庸各屬攤捐緣由理合具文詳請

憲臺查核批示立案再前次詳請飭屬攤捐原案應請
註銷合併聲明除徑詳

撫憲外為此備由具呈伏乞

照詳施行

重建河東書院記

運治河東書院建自前明侍御張公士隆後遞改爲三聖
廟宗聖館育才館我

朝康熙十九年御史黃公斐復舊名是時講經堂退思堂崇
義遠利諸齋園亭尙在迨乾隆四十八年運使沈公業富
重脩時已頽圯無存計相去未及百年而書林藝圃瓦礫

荆榛矣無惑乎覽古者之題詩壁間也

詩見沈公記云向

之屋瓦鱗次燈火青熒絃誦相聞之盛未能卽復以待來
者余承乏此邦不敢不勉爰於道光二年三月鳩工庀材
先葺三聖祠竣次而藏書樓之舊者新之四教亭之廢者
復之聚奎堂之欹者整之由堂而南添東西屋六間堂前
後樹塞門顏其前曰進德修業門左建山長屋十三間門
右建監院屋五間皆別爲庭院而坊表相向再東建士子
學舍止中下九間西亦如之東西舍前庭各負墻植槐俾
障夏日便誦讀焉他如庖廡與丁胥廬舍皆具築內外周
垣二百八十餘丈大門外石杠南崇以屏墉蓋前運使沈
公所未復者至是而規制乃備以本年秋七月告成是役
也崇實黜浮舉前志所載園亭名目概從畧焉舊有田三

十九畝飭解州州判汪應璧勘丈清釐立案備查復捐廉
 倡籌經費歲得二千餘金藉以延師育才庶臻寬裕此後
 豫陝兩省及三十六屬民籍生童准送院中肄業其隸商
 籍者另歸宏運書院肄業運城蕞爾地有兩書院以磨礪
 人材文風當益振夫書院之設仿古者黨庠術序而推廣
 之務在考其德行道藝俾士子相觀而善成有本有文之
 學所關於世道人心者甚鉅至僅事帖括掇科名抑末矣
 近乃以講學之地為射利之場朝挾一紙書來夕卷數百
 金去詩與文絕不過問嗚呼末且失之尙何論其本哉河
 東係

堯舜禹誕生舊地士氣淳樸其文章不趨華靡於人道為近惟
 視教之者何如人耳教之而果君子儒也修於鄉為善士

登於朝為名臣必能仰副

聖天子之作人雅化是則余今日復建書院之本心而重有望
 於後之維持風教者也

新建河東書院聚奎堂前重廈五間並各商捐輸經費銀
 兩記

余重脩河東書院既成集多士試於堂方點名時紛如翼
 如齊立階下慮其兩沾衣或失容也爰建重廈五間覆之
 夫事難慮始尤難圖終圖終之道惟在經費充裕而已余
 兩次捐養廉銀二千兩以為眾倡而王恆泰尉世隆王費

合三家相繼各捐銀一千兩富而好禮良堪嘉尚此外常
通裕捐銀四百兩葛廣濟張隆泰各捐銀一百兩劉洪茂

侯六來各捐銀七十五兩雷運隆曹七合孫慶餘史嘉會

張天福王益泰陳凝泰趙永吉楊葆泰溫燕樹等各捐銀

五十兩共得銀陸千二百五十兩發商一分行息按季繳銀計每年得息銀七百五十兩遇閏加銀六十二兩五錢再由道署每年捐銀二百四十兩監掣同知每年捐銀四十兩及各商按引攤銀一千二百餘兩統計一年所入銀二千二百三十兩有奇以為脩脯膏火之資有贏無絀從此經費既足有舉莫廢百年樹人之心庶幾稍慰矣守斯土者勿視書院為具文延名師掌之選秀士教之不至以今日艱難積成之經費暗耗於日後猾吏蠹胥之手而又能出其盈餘以時脩葺使絃誦之地輪奐常新茲邦人士更體良有司厚意爭自濯磨讀有用書求致用術不至咕嗶一生困頓漏下斯則官殫厥心士勤厥業交相勸勉以

佐

文教昌明之治豈不懋哉豈不懋哉

鹿樵觀察重修河東書院落成同游敬賦

張克儉

育才舊館久桑田振起風流三百年士有萬間歡庇厦人

看一柱獨擎天工程皆公一手經直從蔓草荒榛裏整

到崇垣曲院邊舊址已傾自此扶輪歸大雅文光夜夜燭

奎躔講堂額

聖帝明王共誕生河東靈秀振寰瀛淵源道脈唐虞夏講

後有堯舜禹三聖祠陶鑄英髦晉豫秦為政最難興教化讀書端

不為科名文中經術文清學能續前賢哲匠成

古木槎枒繞屋栽樹人先已樹名材書院古木為蓮城八景之一泉聲

巖瀑層層出雨嶂雲屏面面開正在

中天依

日月

書院

中有萬歲碑亭巍然平地煥亭臺

四教亭藏書閣因舊址而新之

嫻嫻絕少烟霞

趣如此藏脩亦快哉

同人連轡出郊游縹緲山光豁遠眸

書院直隸對中條纔得升堂思

入室每逢進步又擡頭摩挲古碣遺文在

歷覽今題采藻

幽真是張星通一脈後先輝映照千秋

始創河東書院者為前明巡按張公

隆士

司署外西首近城有古廟一所規制極崇而廟前隙地侵

占將盡廟貌亦頽損殊甚余出入必過其地因不列祀典

久未致問偶一日喚隨行吏詢之知係崔府君廟也該吏

檢呈舊刻府君靈顯事跡一本閱之知府君生而正直孝

於親忠於國靈應久彰前代加崇封號尊禮特甚余敬念

聰明正直之神必能為民降福禮云有舉莫廢因捐廉俸

二百兩飭商協助修理併清查廟址地界落成之日潔齋

致祭朔望委員行禮著為令撰文記之命屬吏解州州判

汪應璧書丹勒石

余觀察河東三載杜絕請托執法如山然外嚴內慈不為

已甚嘗自書聯語於堂柱示僚屬云存真實心行無愧事

獎廉能吏杜倖進門蓋直據胸臆也凡尋常案件幕友擬

批委員提究者余必將委員二字抹去若輩奉差徒增地

方之累其上控案件非事涉緊要就近飭該管府州覆審

完結從不僉差提轅審訊俾免往返拖累因此道府書吏

清苦特甚微員中之無能者優容之貪戾者參撤之誠謹

有品者獎勵而資助之如芮城縣林

芬詩人也而操履脩

潔余曾密加保薦長樂司巡檢呂

以微末而能耐清

苦不似他鹽官之妄取其妻本常廉訪女能同守苦啖小

米飯余特地列入薦剡安邑縣典史林立老成而貧窘特

甚余時時分俸相助今又數年聞呂已病故良深嗟憫林

仍令芮城曾未升除外間風尚可見三年中從未向屬員

薦一幕友長隨人有薦余者亦概不收有請余飭商幫助

者余解囊厚贈而不為啓齒守此硜硜之行究恐大不合

時不若善刀而藏之為妙也

八月中告養公牘外另呈 撫憲信稿

敬稟者竊職道於元年二月專丁回南迎養未就即擬

是年冬間告養因公事牽繫未得脫身滿意上年八九

月間必可請假詎料秋雨兼旬鹽池幾被水灌竊念仰

蒙

恩命職任監司又沐

憲恩青睞斷不敢當地方猝遇災患之時轉至置身事外

而去是以竭力補救各處工程直至今年五月中始行

告竣其時已值盛暑不能啓行此職道兩年來時思告

養而輾轉未遂之實在苦衷也現經伏雨頻番之後各

工俱甚完好已可放心本任亦無經手未完事件回望

南雲寸心百結雖職道之母切盼職道升遷冀得近省

尚思就養但職道弟兄已故侍奉無人何忍再稍遷延

至兩年以來凡遇公事從未會以內有退心少涉懈弛

即現在呈請告養於後任未接印以前亦仍矢勤矢慎

不避嫌怨逐日將應辦之事竭力整治萬不敢偶形廢

弛上辜

憲恩素蒙

慈愛逾格用敢細陳委曲懇祈速為據情

代

奏俾職道得早一日承歡即早拜一日

厚賜下情無任感悚激切之至除另呈公牘外謹再瀝忱

上懇恭請

鈞安伏惟

恩鑒

十月中於後任未到之先余自委監掣同知安邑縣知縣將道庫存款眼同當堂彈兌絲毫無缺即令該二員監同收貯封庫移交新任無庸再盤余於十三日交印十六日

即起身因屬僚稟勸慎擇吉辰改於十九日啓行十一月

二十四日抵家拜見老母康強逢吉十餘年來心情

為之大慰且官事脫身超然無累而以久未回家之人今

得長侍老母不覺興致飛越精神倍旺城西履思堂

屋係先大夫分授之屋奈僅空一椽只得就步道巷

詩禮堂老屋中安頓眷屬行李此係十世祖建寧公

所建自前明至今未嘗更姓為邑中難得之事先祖

靜谷公尙生此屋中上年吾聞其將售異姓敬念三百餘

年之祖居豈忍坐視易主乃以重價歸之然重造良不易

也

四年甲申五十五歲

四月至杭州上天竺進香為吾

母祈壽順道拜見帥

中丞數年之別藉以話舊又拜方伯黃季侯黃係二兒聯元齡姻章氏之原媒故托其札致章氏將於明年爲之完姻又拜廉訪伊公係山西同僚人極醇古

是年春二月中浣興工重建前焚之傳望樓至秋九月杪始落成改顏之曰恩賚基址照本生曾祖之舊而柱板磚瓦則遜前遠甚然費已倍于前矣統計樓之上下及兩廂房共廿六間本生曾祖原構時物料工價較此日俱賤也

冬又修整聞濤軒添構娛暉閣聞香亭娛暉本吾家舊屋名見譜中

五年乙酉五十六歲

先大夫於嘉慶十二年冬仰奉

恩旨准其入祀鄉賢因大鑄遠宦日久尙未送位入祠四年春卽擬恭舉此禮奈鄉賢祠已圯余乃捐貲重建始於本年正月請兩邑侯公同送位入祠欽感

國恩載揚先德不勝慶幸之至

春爲大兒元禧娶媳王氏爲二兒元齡娶媳章氏吾因太恭人年高又急思完向平之累故同時爲之完娶

脩理杏花臺籐溪兩處先塋

十月長孫長年生命名曰瑞東

六年丙戌五十七歲

得北門享帚山庄屋改建張氏鄉賢世祠奉

先遜志公

先端巖公

先立齋公

先息園公四先生神位於中撰記立碑請學使筠谷辛公書之其東爲義庄房屋其西爲半野園俱另有記所有鄉賢世祠記附錄於後

南張鄉賢世祠記

功令品官立家廟舉得奉其高曾祖禰四親以時嚴事俾士大夫各申報本追遠之忱

典至渥也若夫保姓氏守宗祧仰推

國家錫類之仁用章世德之縣延攸自緣乎情起乎義而不悖禮經此南張鄉賢世祠所由助與南張系出宋忠獻公代有名氏其崇祀鄉賢者在明則武邑府君建宣贛州兩府君我

朝則先大夫中憲府君並儒雅宏朝高尙軌物事炳冊府衣

冠俎豆之盛方諸甲門華胄競以閎闊相矜尙者殊科矣

傳曰莫爲之前雖美弗章莫爲之後雖盛弗傳大鏞謹按

世譜自武邑上溯忠獻十一世下逮建宣贛州皆再世又

八世而中憲其間或束脩庠序或養晦邱園胚胎前光劬

躬燾後歷四朝五百年二十六世研研然爲士族奕世之

德未渝有源以印浦而後大道光癸未大鏞陳情養親蒙

恩予告旋里庀家贍族規畫次第有緒永維先世光膺鄉賢祀

典者四而專祠蓋闕甚非所以揚

聖天子休命爲先靈妥也乙酉中夏迺市城北永安社屈氏享

帚山莊一區鼎建祠堂經始於次年季春迄季秋工畢諮

詢經儒仿製祠版恭奉武邑府君祭初室建宣府君祭二

室贛州府君祭三室中憲府君祭東室令月吉日潔蠲將
事然則南張鄉賢世祠之所以成實本世德之由來者遠
豈大鏞區區力哉祠東旁舍爲義莊出納金穀倉庾悉具
更闢西園虞侍太恭人俱別有記大鏞因世祠發明其義
討論往牒準式時宜無於禮者之爲禮也其殆庶幾用志
歲月并列條約九章詒示孫子世世遵守

三月葬亡副室甄宜人於寶巖新塋

十月二兒入泮爲郡庠生 十二月二媳因歸寧病沒於
金陵章親家寓中

七年丁亥五十八歲

遵 太恭人命設立義莊清釐田畝細數將一千餘畝
撥入庄內爲贍族之費詳立規條同田畝庄房清冊呈送

昭文縣轉詳撫藩二憲給帖立案并聲明不願請

旌免其咨部

校刻

先祖靜谷公寶閒齋詩

先侍御公蔚秀軒

詩稿及年譜先友柏兄詩集前在河東已寄貲回屬爲付
梓矣

得詩禮堂西首吳氏房屋欹倒已甚重加脩葺計買價及
葺費共二千五百千文此屋本與詩禮堂通連聞十世祖
端巖公時曰自守堂余額以燕翼蓋官河東時偶得一舊
印章上鐫此二字也前嘉慶十年奉 先公諱歸里以
壽萱名堂幸 太恭人福壽絲長適符所頌已額於詩
禮堂之東而燕翼則額於西云

八年戊子五十九歲

春重建端巖公專祠并於其東添建堂三間題之曰念昔
立碑記之又呈請昭邑侯出示永禁停櫬寄物所有碑記
詩章並錄於後

重建

十世祖端巖公專祠記

十世祖端巖先生專祠創建於乾隆壬午年

先祖靜

谷公獨力爲之有記刊入譜中有詩梓於集內炳炳可考
閱今七十年日就傾圯且正寢三楹奉祀事外幾無餘地
每春秋二祭率就輪祭之後裔家散福或遠或近諸多未
便蓋當時締造艱難規模未竟也謹按

先生於

本朝崇祀鄉賢前年秋

大鏞卽

先生半野堂舊地建張氏鄉賢世祠奉

先生神位於中具呈本學轉詳上憲檄縣立案春秋委官
致祭固已蒸嘗永安俎豆孔光矣然舊祠係我

祖手

澤所存禮云有舉莫廢曷敢怠緩弗脩

先生神像旁舊有

九世祖聽菴公象作侍坐狀其緣

起不知何時聞自三峯移建時已然

聽菴公當前明

嘉靖年間首捐腴產築城禦倭凡撤屋守陴散粟諸要策
奮然爲衆紳倡當時有張公活我之謠迨邑令戰歿則又
經紀其喪而存卹其後事詳梁溪鄒

迪光

所撰墓志是

公之造福於鄉里者甚鉅邑之人皆當尸祝之矧在子
姓其肖而祀之也固宜爰擇日鳩工卑者崇之歆者整之
復於祠之東拓地添建廣廈三間爲子孫飲福所顏之曰
念昔堂俾來者顧名思義觸目警心其他規制悉仍我

祖之舊至於不准以無依木主拉雜送入自取侮慢先
人之咎此前訓也宜各凜遵呈請 邑侯示禁寄觀貯物
并酌給看祠人月費責承洒掃此新規也宜各保護凡此
諄諄勸戒豈有私意存焉惟願我族中人人知奉先思孝
之義耳是役也計費制錢六百餘千卽在我 祖所立
祭田積年羸息內支銷當年經始者我 祖而今日重
脩者仍我 祖力也何莫非
先生垂裕之遠且長哉

重建 十世祖端巖公專祠成敬步 先祖韻

吾 祖恢前烈崇祠令典稽壽珉躬作記聰訓耳常提鴻
業光青瑣

龍綸錫紫泥舊規昭日月新彩炳雲霓柏聳烏應集梧高

鳳合樓北虞晴靄接東墻暝烟齊閩粵懷孚若 端巖公使
粵官閩俱

政績卓著鄉閭仰穆今龜皇遺緒拓念昔重標題 余新題
堂名

三月葬次媳章氏於五丈石新坐係請同鄉陸君 藻 字蜚
九所擇也共計買地連葬費一千餘洋

請西賓無錫邵吟泉先生書義莊等規條勒石備查

半野園五色牡丹正開而苦雨不止剪供瓶中靜玩獨墨
色者一朵先謝余因口占一絕後二句云從來貪墨應先
敗試看當場富貴人適言臬雲太守來出示之太守因談
及從前阿文成公和致齋相國同爲軍機大臣時適一日
盛孟巖前輩爲和相畫山水扇畢和相大加贊賞文成公
就便取閱微笑曰畫甚佳但何必如此太滿恐貪墨之風
從此而甚矣阿公此語蓋諷和也然冷而峭奇而趣可見

年譜
勲業蓋代之名臣卽偶爾吐屬亦自不凡

昨冬余得王石谷江山無盡圖卷長四丈餘經營慘澹爲此老生平不能有兩之作價百千本年四月又得其寫陸放翁詩意冊頁十二幀亦精妙入神價一百二十千計余生平所見石谷筆墨不下百數十種此二件則神乎技且技而進於道矣真乃吾虞至寶余不忍其流落俗手攜致遠方浸至磨滅故不屑重價購之亦余極得意事故記於此

將桃源澗杏花臺兩處

祖塋呈請常邑侯張敦道立案

出示勒碑永禁族姓盜葬示碑并錄於後

爲據稟示禁事據前任山西河東道張大鏞呈稱六世祖前明武邑教諭入祀鄉賢諱懋葬於北門外桃源澗

舊有墓圖刊載譜中年久日削先侍御公於乾隆五十八年修整其地侵削之餘僅存數弓祭掃僅容拜跪近日竟有擅自私葬其旁者呈叩勒石永禁等情到縣據此合行給示勒石永禁爲此示仰該墳裔及地保墳丁人協力防護自示之後如有後裔盜葬者許卽指名稟縣以憑提究各宜凜遵毋違特示

爲據稟示禁事據前任山西河東道張大鏞呈稱西門外邵家灣之西杏花臺左暑號山地七畝零係大鏞家之先壟前明遷虞一世祖至五世祖俱葬其上族祖耐葬不下數十塚譜中刻有墓圖可考迄今四百餘年地漸削而耐葬之塚益多旣紊昭穆兼廢規模乾隆五十八年先侍御公告養歸里脩整親撰文記會集族衆咨

祭不葬第恐日久廢弛難保無私賣盜葬之弊呈叩示
禁勒石等情到縣據此合行給示勒石爲此示仰該墳
裔及地保墳丁人協力保護自示之後該處墳塋只許
春秋祭埽不許私賣盜葬如敢故違許卽指名稟
縣以憑提究各宜凜遵毋違特示

吾鄉城垣久圯不堪入目余自三年冬杪初歸見之卽惻
然難安幸遇太平

聖世高枕無憂譬如人家住屋不可因地方安靜遂任聽門
朽垣毀不加脩治也因屢向當事言之奈費繁工鉅竟難
措手本年春額觀察騰伊到任巡視城垣亦以爲太不像
事商之常昭兩邑尊觀察設席邀請各紳議脩事無成說
觀察旋押運北上又復遷延冬初兩邑尊仍申前議余首

先倡捐通足錢一千千文有從勸而和者有力勸而不和
者余歸田已閱六載境非有餘亦祇盡吾之心而已嗟乎
築室道謀人各異志其事何日方成耶查本邑城垣歷係
民脩故不得不藉桑梓之力在兩邑尊亦屬無可如何也

九年己丑六十歲

二月十九日爲二兒元齡續婚係無錫秦小峴侍郎之女
本年五月常邑侯張君敦道字厚齋調署青浦余書楹帖

贈之云欸語獨饒真意味盟心可質古循良張葢真讀書
君子也每枉過余齋談論逾一兩時許侍者更番告倦其
書味流露自然又精於制藝課書院中士子娓娓不厭名
師循吏兩俱不愧張係帥僊舟中丞主試廣東所拔士而
中丞爲先侍御公之門生故於吾母席太恭人

前執小門生之禮甚恭歲時佳節必製肴饌一二簋敬獻于席太恭人以代其師申敬養之忱即此其古道可概也春秋二次致祭北門鄉賢世祠必親到先侍御

公神位前恭敬行禮余雖堅辭弗聽其意尤為可感

余生平不仗友朋推挽不叨世誼情面故地方官長之來也世交亦可非世交亦可舊交固好非舊交亦好皆於我

心中空空洞洞毫不相干實緣自信得過而無求於外古云立脚怕隨流俗轉此處全在自己立脚得定耳地方官

無論識我不識我背後皆知敬我重我處世之道豈甚難哉上年因重修十世祖端巖公祠堂曾撰一聯書示

族姓云富善用財斯保富貧能立品豈長貧即此意也然仰賴先人清芬餘蔭在官在家每值門生故舊投分

言歡雖中無冀幸畢竟門第風光今兒子輩讀書俱尚未能成就竊恐先芬易墜尙其勉旃特書於此以為後嗣勗

自前年春杪至本年陸續買得北門外梅園山落平陽地

一塊約計十畝因即定為壽藏請陸君蜚九指穴定向程君譜梅代予董理其事即於九月中擇吉開工蜚九係舊

好陸叔華之兄人極樸誠素精堪輿並不營利即杯酒酬情亦不肯領全無地師陋習其人品實為可敬余所買地

在梅園而為余作合者適號譜梅事有天緣或者將來春占百花之兆乎前此余為先侍御公營吉壤慮及平

陽有水特卜葬於西山之龍養巖嗣安葬二媳章孺人亦在北山五丈巖往來攀陟頗覺艱難因有改就平壤之意

茲地吉否未知姑喜其近自爲謀究不必如爲先人
謀之其難其慎凡事完其在我餘者悉聽之天且二見已
有壽藏茲兆特爲加展羅城至三丈六尺備日後大見等
昭穆之位用昭平允

本年八月二十六日爲余六十誕辰杜門謝客弗敢自壽
凡親友見惠賀祝禮物俱堅却之惟詩文則難以峻拒不
得已而拜受然承譽彌自惶愧也詩文中屈侃甫散體程
心宇駢體程譜梅七律較佳另裝成卷

十年庚寅六十一歲

本年正月初八日夜間 席太恭人忽患小恙余聞信
趕往省問及歸漏已五鼓肩輿過石梅之麓微覺寒氣侵
骨自是余遂抱恙日間仍在外勉強應酬初不甚以爲意

至二月初二三兩日陡患人事不省衆醫束手妻子俱旁
皇失措連夜赴郡請曹仁伯顧研山來家診視據仁伯云
係陽虛之症服其藥稍有轉機合家神情少定直醫治到
三月中旬方能起床其時章質甫親家適自廬江來常在
過余病中竟未了了計月餘之久老妻兩兒驚擾不安全感
未解帶安睡而余心中昏翳却無所苦如夢如醉此身總
似常在河東署中到三月杪神氣方清同人咸謂余有再
生之慶然自此兩足不良于行夜間亦時不能寐形雖存
而人幾廢矣

是年三月二十三日 席太恭人疾終於履思堂內寢
先數日間並無大恙至臨終日五更時問余妻薛恭人曰
天明未薛恭人對曰尙未旁有侍者遽曰將明矣 太

恭人聞之曰時辰已到急命易衣著履更束甫畢卽安臥
長逝方逝之時滿屋忽有異香嗚呼痛哉 太恭人平
生奉佛甚虔故得神佛引度了然于生死之際哉獨怪余
先八年早經告養迨值棄養偏值病危 太恭人身後
一切諸事皆命薛恭人率同兩兒及姪豐玉盡心料理幸
而 太恭人之兆域余前於 先侍御公安葬時已
辦理妥協屆期啓壙起去穴中填土四邊磚墻顏色如新
毫無剝蝕土色燥中帶潤蓋距 先公葬時已二十五
年矣此地洵爲吉壤惟自揣諸事究未親辦終天抱恨不
孝之罪夫復何辭

十一年辛卯六十二歲

是年仍常請蘇州顧研山來家調理專治不寐之症仍未

見大效

本年十一月初四日值薛恭人六十正壽因在服中概不
舉動恭人素多恙性又過儉從不肯進滋補之品余前在
京中山西之日每思送渠先歸又慮乏人調護長途難耐
辛苦今歸里數年轉甚安健且已花甲慶逢不可謂非其
儉以養福也

十二年壬辰六十三歲

本年四月中營梅臬別墅成余時往相度經營曾隨意吟
詩數首聊以遣興

本年春間爲太倉馮偉人年伯刻古文稿成偉人先生伯
兄友柏師也余幼時曾藏友柏所鈔其古文集不知緣何
失去心殊悵快今因西賓周小江所請因命二兒爲之校

閱付鐫

本年六月二十三日余已服闋理應赴部補官自揣衰病不能振作卽於起服文內聲請病假九月中奉到院批仰候移咨吏部科仍飭趕緊調治一俟病痊卽行請咨赴部候補勿遲

是年六月席蓮舫舅氏自山西告病歸余往視之已雙瞽矣然精神興致尙好方擬到光福治目疾重作出山之想乃延至閏九月間一病遽亡回憶余在晉時頗賴其指示關照甚爲切至余亦百計爲之彌縫推挽卒未能小有補救命何如也

十三年癸巳六十四歲

本年春間開局抄繕校刊陳芳績歷代地理沿革表全書

工程浩大自揣衰殘朽質未必能觀厥成功詎意閱三載而全書版片告竣眞天幸也

十四年甲午六十五歲

夏初自怡悅齋書畫錄全部完功司校錄者景雲屏甥司刊刻者何敏夫甥也余豈敢妄擬墨林之收藏然性之所好恐其久而散佚徒化雲烟故彙而誌之俾後之好古者覽而知某書某畫曾藏某家亦結習未除也

十五年乙未六十六歲

是年二月二兒赴京謁選四月初七日次孫長羸生八月

二兒選授湖北鄖陽府通判九月回家十二月初一日挈

其眷屬赴任聞此缺事簡地瘠然此官本屬得之意外亦只可度外置之

爲趙巢寄先生刻遺稿先生品學余最所欽佩惜無子稿將散失余故特爲刻之凡如此等事雖多所費然余心頗樂爲之也

十六年丙申六十七歲

是年六月十四日何氏三姊病歿於其西門第中遂促敏夫甥於十月間卽爲安葬北山梅園新阡并建節孝坊於墓前次年余爲建節孝專祠於余丙舍中卽於八月初八日恭送神位入祠是日幸天氣晴和余因撰碑與詩記之十七年丁酉六十八歲

雖不能步履而精神甚好每日惟以筆墨爲消遣信筆吟詩或一二首至四五首不等非不自戒不可費心耗血然執筆妄塗並不覺苦難且勝於悶坐無聊也夏日刻沈葵

岡先生詩文集完又刻師善錄三本又自刻吾面齋詩集第九卷起至十二卷四卷俱完又刻戒宗族領米之詩石刻完并送縣存案凡此皆善保本族董勸兼用之苦心也是年五月十一日接_{二兒}四月二十二日來稟知於三月

初一日又得第三孫卽作回信乳名命之曰_{長安}因其官

地已近長安也彼地不能僱乳母只可自乳但二孫_{果東}

尙只二年將周已斷乳甚爲慮心聞其每日已能食飯半

甌或童體稍壯尙不妨事三孫官名命曰_{湛東}俟明年周

歲時當爲虔祀張仙初生時余因未知其八字中有缺

陷否琴六適在余家請其排看據云一無所缺其命勝於

_{二兒}姑記於此以俟後驗

十八年戊戌六十九歲

正月初六日聞程心宇於十二月二十四日怛化余哭以詩并撰聯句輓之曰成佛羨君先證果養疴剩我尙看花

自敘年譜稿卷下終

虞山博文齋劉寶成刊

先公自

予養後左圖右史丹鉛不撤暇又綜生平大概分年編次署之

曰自敘年譜稿屆歲杪輒將終年著錄俾

元禧

等繕正以

爲常且諭之曰余立身行事具在於斯他日毋庸另撰行

狀也

先公於庚寅春遭

先祖母之喪哀毀成疾

數年來養疴閉戶猶以筆墨自遣方冀藥鑪茗椀侍奉如常詎意元宵後舊疾大作延至二十五日竟棄不孝等而長逝嗚呼痛哉面命如新音容頓隔亟遵遺訓付劖劂以告立言之君子

道光十有八年夏五月不孝男元

禧

泣血謹識



--	--	--

Red seal impression, likely a collector's or library's mark.



